

Ekwo Ógú

Agú ndu Ízurelu ogu

1 ¹ Chipfu pfuru opfu yeru Mósisu l'ulo-ekwa-ndzukọ ndu Ízurelu le g'ephe nọ l'echiegu Sayinayi l'abali mbu l'onwa k'ebo l'apha, kwe ndu Ízurelu apha labo, ephe shi l'ali Ijiputu wufuta. O sọru iya: ²“Unu gua ndu Ízurelu g'ephe hakota ogu. Gua phe l'onulo l'onulo; me l'enya-unuphu l'enya-unuphu. Unwoke be ii-deshikota epha phe nanu nanu. ³Ge gu le Eronu tukọ iphe, bu unwoke le Ízurelu gukota ogu; mbu ndu nọwaru ukporo apha kwaseru; bya aburu ndu suwaru eje ogu. ⁴Unu hotachaa nwoke lanu l'okpa-ipfu l'okpa-ipfu g'o yetaru unu eka. Ndu unu a-hota bu ndu-ishi l'enya-unuphu ibe phe. ⁵Waa epha ndu ono, unu a-hota g'ephe yeru unu eka obu baa:

“Onye unu a-hota l'okpa-ipfu Rubenu bu Elizuru nwa Shediyo.

⁶“Onye unu a-hota l'okpa-ipfu Simiyonu buru Shelumelu nwa Zurishadayi.

⁷“Onye unu a-hota l'okpa-ipfu Jiuda buru Nashonu nwa Aminadabu.

⁸“Onye unu a-hota l'okpa-ipfu Isaka buru Netanelu nwa Zuwa.

⁹“Onye unu a-hota l'okpa-ipfu Zebulun buru Eliyabu nwa Helonu.

¹⁰“A -bya l'okpa-ipfu k'unwu Jiosesu; onye unu a-hota l'okpa-ipfu Ifu-remu bu Elishama nwa Amihudu. Unu ahota Gamalelu nwa Pedazo l'okpa-ipfu ke Manase.

¹¹“Onye unu a-hota l'okpa-ipfu Benjaminu buru Abidanu nwa Gidiyoni.

¹²“Onye unu a-hota l'okpa-ipfu Danu buru Ahiyeza nwa Amishadayi.

¹³“Onye unu a-hota l'okpa-ipfu Asha buru Pagelu nwa Okuranu.

¹⁴“Onye unu a-hota l'okpa-ipfu Gadu buru Eliyasafu nwa Diyuwele.

¹⁵“Onye unu a-hota l'okpa-ipfu Nafutali buru Ahira nwa Enanu.”

¹⁶Ndu ono be bu unwoke, a hotaru le Ízurelu l'ophu. Ephe bukota ndu-ishi l'okpa-ipfu, shi le ndiche phe; bya abuchaaru ishi l'enya-unuphu, du le Ízurelu.

¹⁷Mósisu yele Eronu bya achita ndu ono, a gushiru epha phe ono; ¹⁸ephe kukobe ndu Izurelu g'ephe ha; deshia epha phe l'ekwo l'abali mbu l'onwa k'ebo ono. Ephe deshuru epha onyemonye l'onulo l'onulo; me l'enya-unuphu l'enya-unuphu. Iphe, bukpo unwoke, nowaru ukporo apha kwaseru be e dekotaru epha phe nanu nanu; ¹⁹egube ono, Chipfu suru Mósisu g'o mee ya ono. Oo ya bu; Mósisu gua ndu Izurelu ogo l'echiegu Sayinayi.

Umadzu ole, a gutaru l'ipfu l'ipfu

²⁰A -bya l'oshilokpa Rubenu, bu okpara Izurelu; iphe, bukota unwoke, nowaru ukporo apha kwaseru; mbu ndu suwaru eje ogo be a gutokaru; deshikota epha phe nanu nanu l'ekwo. E deshuru epha phe l'onulo l'onulo; me l'enya-unuphu l'enya-unuphu. ²¹Iphe, a gutaru l'ipfu Rubenu be bu ukporo unu nemadzu mgbo ise l'unu iri l'ishii l'ukporo umadzu ise.

²²Oshilokpa Simiyonu be a gutokaru iphe, bu unwoke, nowaru ukporo apha kwaseru, bu ndu suwaru eje ogo; bya edeshia epha phe nanu nanu l'ekwo. E deshuru epha phe l'onulo l'onulo; me l'enya-unuphu l'enya-unuphu. ²³Iphe, a gutaru l'ipfu Simiyonu be du ukporo unu nemadzu mgbo esaa l'unu esato l'umadzu ukporo ise.

²⁴Oshilokpa Gadu be a gutokaru iphe, bu unwoke, nowaru ukporo apha kwaseru, bu ndu suwaru eje ogo; bya edeshia epha phe nanu nanu l'ekwo. E deshuru epha phe l'onulo l'onulo; me l'enya-unuphu l'enya-unuphu. ²⁵Iphe, a gutaru l'ipfu Gadu be du ukporo unu nemadzu mgbo ise l'unu iri l'eno l'umadzu ukporo labo l'iri.

²⁶Oshilokpa Jiuda be a gutokaru iphe, bu unwoke, nowaru ukporo apha kwaseru, bu ndu suwaru eje ogo; bya edeshia epha phe nanu nanu l'ekwo. E deshuru epha phe l'onulo l'onulo; me l'enya-unuphu l'enya-unuphu. ²⁷Iphe, a gutaru l'ipfu Jiuda be du ukporo unu nemadzu mgbo tete l'unu ishii l'umadzu ukporo iri.

²⁸Oshilokpa Isaka be a gutokaru iphe, bu unwoke, nowaru ukporo apha kwaseru, bu ndu suwaru eje ogo; bya edeshia epha phe l'ekwo. E deshuru epha phe l'onulo l'onulo; me l'enya-unuphu l'enya-unuphu. ²⁹Iphe, a gutaru l'ipfu Isaka be du ukporo unu nemadzu mgbo ishii l'unu iri l'ishii.

³⁰Oshilokpa Zebulun be a gutokaru iphe, bu unwoke, nowaru ukporo apha kwaseru, bu ndu suwaru eje ogo; bya edeshia epha phe l'ekwo. E deshuru epha phe l'onulo l'onulo; me l'enya-unuphu l'enya-unuphu. ³¹Iphe, a gutaru l'ipfu Zebulun be du ukporo unu nemadzu mgbo esaa l'unu eto l'umadzu ukporo iri.

³²A -bya l'oshilokpa Jiosefu; mbu awa Ifuremu be a gutokaru iphe, bu unwoke, nowaru ukporo apha kwaseru, bu ndu suwaru eje ogo; bya edeshia epha phe. E deshuru epha phe l'onulo l'onulo; me l'enya-unuphu l'enya-unuphu. ³³Iphe, a gutaru l'ipfu Ifuremu be du unu nemadzu ukporo ise l'unu lanu l'umadzu ukporo ise.

³⁴Awa Manáse bẹ a gùkataru iphe, bụ unwoke, nọwaru ùkporo apha kwaseru, bụ ndu sùwaru eje ogu; bya edeshia epha phe l'ekwo. E deshiru epha phe l'onulo l'onulo; me l'enya-unuphu l'enya-unuphu. ³⁵Iphe, a gùtaru l'ipfu Manáse bẹ dọ ùkporo unu nemadzọ mgbo eno l'umadzu ùkporo iri.

³⁶A -bya l'oshilokpa Benjaminu bẹ a gùkataru iphe, bụ unwoke, nọwaru ùkporo apha kwaseru, bụ ndu sùwaru eje ogu; bya edeshia epha phe l'ekwo. E deshiru epha phe l'onulo l'onulo; me l'enya-unuphu l'enya-unuphu. ³⁷Iphe, a gùtaru l'ipfu Benjaminu bẹ dọ ùkporo unu nemadzọ mgbo eno l'unu esato l'umadzu ùkporo iri.

³⁸Oshilokpa Danu bẹ a gùkataru iphe, bụ unwoke, nọwaru ùkporo apha kwaseru, bụ ndu sùwaru eje ogu; bya edeshia epha phe l'ekwo. E deshiru phe l'onulo l'onulo; me l'enya-unuphu l'enya-unuphu. ³⁹Iphe, a gùtaru l'ipfu Danu bẹ dọ ùkporo unu nemadzọ mgbo esaa l'unu iri l'ishii l'umadzu ùkporo iri l'ise.

⁴⁰Oshilokpa Asha bẹ a gùkataru iphe, bụ unwoke, nọwaru ùkporo apha kwaseru, bụ ndu sùwaru eje ogu; bya edeshia epha phe l'ekwo. E deshiru epha phe l'onulo l'onulo; me l'enya-unuphu l'enya-unuphu. ⁴¹Iphe, a gùtaru l'ipfu Asha bẹ dọ ùkporo unu nemadzọ mgbo ise l'unu eto l'umadzu ùkporo iri l'ise.

⁴²Oshilokpa Nafutali bẹ a gùkataru iphe, bụ unwoke, nọwaru ùkporo apha kwaseru, bụ ndu sùwaru eje ogu; bya edeshia epha phe l'ekwo. E deshiru epha phe l'onulo l'onulo; me l'enya-unuphu l'enya-unuphu. ⁴³Iphe, a gùtaru l'ipfu Nafutali bẹ dọ ùkporo unu nemadzọ mgbo ishii l'unu iri l'eto l'umadzu ùkporo iri.

⁴⁴Ndu ono bẹ bụ ndu Mosisu yele Eronu guru ogu. Ndu yetaru phe eka gua ogu ono bụ ndu-ishi ndu Izurelu umadzu iri lebo ono, no-chigbaaru enya-unuphu unuphu phe ono. ⁴⁵Iphe, bụ unwoke Izurelu l'ophu, nọwaru ùkporo apha kwaseru, bụ ndu sùwaru ejeru ndu Izurelu ogu bẹ a gùkataru l'enya-unuphu phe l'enya-unuphu phe. ⁴⁶Mkpako iphe, ephe dọ g'ephe ha bẹ bụ ùkporo unu nemadzọ mgbo ùkporo eto l'umadzu ùkporo iri l'ise; l'unu umadzu esato; l'umadzu ùkporo iri l'esaa; l'umadzu iri.

A gufuru ipfu Lívayi

⁴⁷Ole ipfu Lívayi bẹ a ta guduru teke a guru ndu Izurelu ophuna. ⁴⁸O noo kele Chipfu bẹ suru Mosisu le-a: ⁴⁹"Ndu i tii gudu kpoloko bụ ipfu Lívayi. Ta gùkobekwa phe me i guje ndu Izurelu ophuna. ⁵⁰Iphe, l'ii-mechia bụ g'i hota ndu Lívayi ono g'ephe letaje enya l'ulo-ekwa, eedobeje ekwo-ekemu Chileke; ephe eletaje enya l'ivu, dọ iya nù; me iphemiphe, bụ iphe, aduje l'ulo-ekwa ono. Oo ephebedua bẹ a-noduje apa ulo-ekwa ono; me iphe, bụ ivu, dukota iya nù. O buru phe a-nwuberu iya enya; ephe egudeje ulo-ekwa nkephe kpọ-pee ulo-ekwa ono mgburugburu.

⁵¹Iphe, bú teke ọ̀lo-ẹ̀kwa ono abya atugbu; g'ọ̀ búru ndu Lívayi bẹ̀ a-pho-tsutajẹ́ iya. Iphe, bú teke aakpọ̀bẹ́ ọ̀lo-ẹ̀kwa ono; g'ọ̀ búkwarupho ndu Lívayi bẹ̀ a-kpọ̀bẹ́je iya nù. Onye ọ̀zo mmanù, jekuberu iya ntse bẹ̀ ee-gbu egbugbu. ⁵²Ndu Ízùrẹ̀lù a-kpọ̀bẹ́je ọ̀lo-ẹ̀kwa phẹ́ l'ọ̀nu-ogo l'ọ̀nu-ogo. Iphe, bú nwoke nonu a-kpọ̀bẹ́je ọ̀lo-ẹ̀kwa iya l'ọ̀nu-ogo nkepẹ́ l'ẹ̀ka ẹ̀phe kpọ̀beru ẹ̀kwa-ọ̀hubama ipfu phẹ́. ⁵³Obenu lẹ́ ndu Lívayi bẹ̀ e-gude ọ̀lo-ẹ̀kwa nkepẹ́ kpọ̀-pheta ọ̀lo-ẹ̀kwa ono, eedobeje ẹ̀kwo-ekemu Chileke mgburugburu; k'ọ̀phu Chileke ẹ̀ta atù-koshidu edzudzu-ọ̀ha Ízùrẹ̀lù oke ẹ̀hu-eghu iya. Ọ̀o ndu Lívayi bẹ̀ a-nọ̀du eleta ọ̀lo-ẹ̀kwa ẹ̀ka eedobeje ẹ̀kwo-ekemu Chileke ono ẹ̀nya.”

⁵⁴Tọ̀budu iya bú; ndu Ízùrẹ̀lù mekọ̀taepo iphemiphe ono ẹ̀gube ono, Chipfu sùru Mósìsù g'ọ̀ mee ya.

Ekeshi ẹ̀ka ndu ipfu nonu a-kpọ̀bẹ́ ọ̀lo-ẹ̀kwa nkepẹ́

2 ¹Chipfu bya epfuaru Mósìsù waa Erọ̀nu; sù phẹ́: ²“Gẹ́ ndu Ízùrẹ̀lù kpọ̀bẹ́je ọ̀lo-ẹ̀kwa phẹ́ g'ọ̀ gha iphu l'ọ̀lo-ẹ̀kwa-ndzukọ́. Ẹ̀phe ebuphee ọ̀lo-ẹ̀kwa-ndzukọ́ ono mgburugburu. G'onyenonù kpọ̀bẹ́jekwa ọ̀lo-ẹ̀kwa nkiya l'ọ̀nu-ogo nkepẹ́ l'ẹ̀ka ndu ẹ̀nya-unuphu phẹ́ kpọ̀beru ẹ̀kwa-ọ̀hubama phẹ́.”

Ipfu ọ̀phu a-kpọ̀bẹ́ ọ̀lo-ẹ̀kwa ebubu phẹ́ laaru ọ̀zo ẹ̀nyanwu-awawa

³“Ndu Jiuda bú ẹ̀phebedua a-kpọ̀bẹ́ ọ̀lo-ẹ̀kwa nkepẹ́ l'ọ̀zo ẹ̀nyanwu-awawa; l'ọ̀nu-ogo l'ọ̀nu-ogo; l'ẹ̀ka ipfu ono kpọ̀beru ẹ̀kwa-ọ̀hubama phẹ́. Onye a-bùru ishi ndu Jiuda bú Náshọ̀nu nwa Amínadabu. ⁴Iphe, a gùtaru l'ipfu Jiuda ono bẹ́ dù ọ̀kporo unu nemadzù mgbo tete l'unu ishii l'umadzù ọ̀kporo iri.

⁵“Ndu a-kpọ̀bẹ́ ọ̀lo-ẹ̀kwa nkepẹ́ tsota phẹ́ bẹ́ bú ndu ipfu kẹ́ Isaka. Onye a-bùru ishi l'oshilọ̀kpa Isaka bú Netanẹ̀lù nwa Zuwa. ⁶Iphe, a gùtaru l'ipfu Isaka bẹ́ dù ọ̀kporo unu nemadzù mgbo ishii l'unu iri l'ishii.

⁷“Ndu ọ̀zo, a-kpọ̀bẹ́ nkepẹ́ tsota phẹ́ bẹ́ bú ndu ipfu kẹ́ Zebulọ̀nu. Onye a-bùru ishi l'oshilọ̀kpa Zebulọ̀nu bú Eliyabu nwa Helọ̀nu. ⁸Iphe, a gùtaru l'ipfu Zebulọ̀nu bẹ́ dù ọ̀kporo unu nemadzù mgbo ẹ̀saa l'unu ẹ̀to l'umadzù ọ̀kporo iri.

⁹“Ipfu ono, a họtaru g'ẹ̀phe l'ipfu Jiuda kpọ̀-kube ọ̀lo-ẹ̀kwa phẹ́ l'ọ̀nu-ogo l'ọ̀nu-ogo ono bẹ́ tukuru dù ọ̀kporo unu nemadzù mgbo ọ̀kporo l'unu ishii. Ọ̀ búru ẹ̀phebedua e-vutajẹ́ ọ̀zo; ndu ọ̀zo etso phẹ́.”

Ipfu ọ̀phu a-kpọ̀bẹ́ ọ̀lo-ẹ̀kwa ebubu nkepẹ́ laaru ọ̀zo ndọ̀hali

¹⁰“Ndu ọ̀phu a-kpọ̀bẹ́ ọ̀lo-ẹ̀kwa ebubu nkepẹ́ l'ọ̀zo ndọ̀hali bẹ́ bú ipfu Rúbẹ̀nu bẹ́ a-kpọ̀bẹ́ iya l'ọ̀nu-ogo l'ọ̀nu-ogo. Onye a-bùru ishi l'oshilọ̀kpa Rúbẹ̀nu bú Elizuru nwa Shediyo. ¹¹Iphe, a gùtaru l'ipfu Rúbẹ̀nu bẹ́ dù ọ̀kporo unu nemadzù mgbo ise l'unu iri l'ishii l'umadzù ọ̀kporo ise.

¹²“Ndu a-kpòbe ọ̀lò-ẹ̀kwa nkepẹ́ tsota ipfu Rúbenu bẹ̀ bụ́ ipfu kẹ́ Simiyonu. Onye a-bùrú ishi l'oshilọ́kpa Simiyonu bụ́ Shelumẹ̀lú nwa Zurishadayi. ¹³Iphe, a gùtaru l'ipfu Simiyonu bẹ̀ dọ́ ọ̀kpọ́rọ́ ọ̀nụ́ nemadzụ́ mgbo ẹ̀saa l'ọ̀nụ́ ẹ̀sato l'ụ́madzụ́ ọ̀kpọ́rọ́ ise.

¹⁴“Ndu ọ̀phu a-kpòbe nkepẹ́ tsota pẹ́ bẹ̀ bụ́ ipfu Gadu. Onye a-bùrú ishi l'oshilọ́kpa Gadu bụ́ Ẹ̀liyasafulu nwa Diyuwẹ̀lú. ¹⁵Iphe, a gùtaru l'ipfu Gadu bẹ̀ dọ́ ọ̀kpọ́rọ́ ọ̀nụ́ nemadzụ́ mgbo ise l'ọ̀nụ́ iri l'ẹ̀no l'ụ́madzụ́ ọ̀kpọ́rọ́ labọ́ l'iri.

¹⁶“Ipfu ono, a họtaru g'ẹ̀pẹ́ l'ipfu Rúbenu kpọ́-kube ọ̀lò-ẹ̀kwa pẹ́ Ọ̀nụ́-ogo Ọ̀nụ́-ogo ono bẹ̀ tukurọ́ dọ́ ọ̀kpọ́rọ́ ọ̀nụ́ nemadzụ́ mgbo iri l'ẹ̀sato l'ọ̀nụ́ iri l'ẹ̀sato; l'ọ̀kpọ́rọ́ ụ́madzụ́ iri l'ẹ̀bo l'ụ́madzụ́ iri. Ọ́ bụ́rú ẹ̀pẹ́bedua bụ́ ndu k'ẹ̀bo, a-palihuje mẹ́ a -gbẹ̀shi ije.

¹⁷“Ọ́o ya bụ́; ndu Lívayi evuta ọ̀lò-ẹ̀kwa-ndzukọ́ nọ́dú l'echilabọ́ ndu ipfu ono tų́gbushia. Ọ́o ẹ̀pho g'ẹ̀pẹ́ gude kpọ́ ọ̀lò-ẹ̀kwa pẹ́ Ọ̀nụ́-ogo Ọ̀nụ́-ogo ono bụ́ g'ẹ̀pẹ́ e-gudeje gbẹ̀shi ije pẹ́. Ndu nọ́nụ́ ẹ̀pẹ́ apagbaaru ẹ̀kwa-ọ̀hubama pẹ́.”

Ipfu ọ̀phu a-kpòbe ọ̀lò-ẹ̀kwa ebubu nkepẹ́ l'ụ́zo ẹ̀nyanwu-arị́ba

¹⁸“Ndu ọ̀phu a-kpòbe ọ̀lò-ẹ̀kwa ebubu nkepẹ́ l'ụ́zo ẹ̀nyanwu-arị́ba bẹ̀ bụ́ ipfu kẹ́ Ifuremu; Ọ̀nụ́-ogo Ọ̀nụ́-ogo. Onye a-bùrú ishi l'oshilọ́kpa Ifuremu bụ́ Elishama nwa Amihudu. ¹⁹Iphe, a gùtaru l'ipfu Ifuremu bẹ̀ dọ́ ọ̀kpọ́rọ́ ọ̀nụ́ nemadzụ́ mgbo ise; l'ọ̀nụ́ nemadzụ́; l'ụ́madzụ́ ọ̀kpọ́rọ́ ise.

²⁰“Ndu a-kpòbe ọ̀lò-ẹ̀kwa nkepẹ́ tsota ipfu Ifuremu bẹ̀ bụ́ ipfu Manáse. Onye a-bùrú ishi l'oshilọ́kpa Manáse bụ́ Gamalelú nwa Pedazọ́. ²¹Iphe, a gùtaru l'ipfu Manáse bẹ̀ dọ́ ọ̀kpọ́rọ́ ọ̀nụ́ nemadzụ́ mgbo ẹ̀no; l'ụ́madzụ́ ọ̀kpọ́rọ́ iri.

²²“Ndu ọ̀phu a-kpòbe ọ̀lò-ẹ̀kwa nkepẹ́ tsota pẹ́ bẹ̀ bụ́ ndu ipfu kẹ́ Benjiaminu. Onye a-bùrú ishi l'oshilọ́kpa Benjiaminu bụ́ Abidanu nwa Gidiyoni. ²³Iphe, a gùtaru l'ipfu Benjiaminu bẹ̀ dọ́ ọ̀kpọ́rọ́ ọ̀nụ́ nemadzụ́ mgbo ẹ̀no; l'ọ̀nụ́ ụ́madzụ́ ẹ̀sato; l'ụ́madzụ́ ọ̀kpọ́rọ́ iri.

²⁴“Ipfu ono, a họtaru g'ẹ̀pẹ́ l'ipfu Ifuremu kpọ́-kube ọ̀lò-ẹ̀kwa pẹ́ Ọ̀nụ́-ogo Ọ̀nụ́-ogo ono bẹ̀ tukurọ́ dọ́ ọ̀kpọ́rọ́ ọ̀nụ́ nemadzụ́ mgbo iri l'ẹ̀to; l'ọ̀nụ́ ụ́madzụ́ iri; l'ụ́madzụ́ ọ̀kpọ́rọ́ ise. Ọ́ bụ́rú ẹ̀pẹ́bedua bụ́ ndu k'ẹ̀to, a-palihuje mẹ́ a -gbẹ̀shi ije.”

Ipfu ọ̀phu a-kpòbe ọ̀lò-ẹ̀kwa ebubu nkepẹ́ l'ụ́zo isheli

²⁵“Ndu ọ̀phu a-kpòbe ọ̀lò-ẹ̀kwa ebubu nkepẹ́ l'ụ́zo isheli bẹ̀ bụ́ ipfu Danu; Ọ̀nụ́-ogo Ọ̀nụ́-ogo. Onye a-bùrú ishi l'oshilọ́kpa Danu bụ́ Ahiyeza nwa Amishadayi. ²⁶Iphe, a gùtaru l'ipfu Danu bẹ̀ dọ́ ọ̀kpọ́rọ́ ọ̀nụ́ nemadzụ́ mgbo ẹ̀saa; l'ọ̀nụ́ ụ́madzụ́ iri l'ishii; l'ụ́madzụ́ ọ̀kpọ́rọ́ iri l'ise.

²⁷“Ndu l'a-kpòbe ọ̀lò-ẹ̀kwa nkepẹ́ tsota ipfu Danu bẹ̀ bụ́ ipfu Asha. Onye a-bùrú ishi l'oshilọ́kpa Asha bụ́ Pagẹ̀lú nwa Ọ́kuranu. ²⁸Iphe, a

gutaru l'ipfu Asha bẹ dọ ụkporo ọnu nemadzu mgbo ise; l'unu ụmadzu ẹto; l'ụmadzu ụkporo iri l'ise.

²⁹“Ndu ọphu a-kpọbe ọlo-ẹkwa nkepẹ tsota pẹ bẹ bụ ndu ipfu Nafutali. Onye a-buru ishi l'oshilokpa Nafutali bụ Ahira nwa Enanu. ³⁰Iphe, a gutaru l'ipfu Nafutali bẹ dọ ụkporo ọnu nemadzu mgbo ishi; l'unu ụmadzu iri l'ẹto; l'ụmadzu ụkporo iri.

³¹“Ipfu ono, a họtaru g'ẹpẹ l'ipfu Danu kpọ-kube ọlo-ẹkwa pẹ l'ọnu-ogo l'ọnu-ogo ono bẹ tukurọ dọ ụkporo ọnu nemadzu mgbo iri lẹ tete; l'unu ụmadzu iri l'ẹno. Ọ buru ẹphebedua bẹ e-kpejeru azu l'ije pẹ ono; pagbaaru ẹkwa-ọhubama pẹ.”

³²Ndu ono bẹ bụ ndu Ízurelu; g'e gude gụa pẹ ọgu l'ẹnya-unuphu pẹ l'ẹnya-unuphu pẹ. Mkpakọ ndu nọkota l'ẹka a kpọberu ọlo-ẹkwa, bụ ndu a guru ọgu l'ọnu-ogo l'ọnu-ogo bẹ dọ ụkporo ọnu nemadzu mgbo ẹto; l'ụkporo ụmadzu iri l'ise; l'unu ụmadzu ẹsato; l'ụmadzu ụkporo iri l'ẹsaa; l'ụmadzu iri. ³³Ọle ndu Lívayi bẹ a ta gụkobeduru lẹ ndu Izurelu ọphuu; ọ buru ẹgube ono bẹ Chipfu sụru Mósisu g'ọ mee ya.

³⁴Ọo ya bụ; ndu Ízurelu mekọtaephe iphemiphe, Chipfu turu Mósisu ekemu iya. Ọ buru ẹgube ono bẹ ẹphe kpọbechaaru ọlo-ẹkwa pẹ l'ọnu-ogo l'ọnu-ogo; pẹbechaa ya ẹkwa-ọhubama pẹ. Nokwapọ g'ẹpẹ eshije gbeshi tugbua; ndu ọphu nonu ẹphe lẹ ndu ọnu-ọlo nkepẹ; mẹ ndu ẹnya-unuphu nkepẹ.

Ndu Lívayi

3 ¹Ọwaa bụ oshilokpa Eronu yẹle Mósisu lẹ teke ono, Chipfu pfuru yeru Mósisu l'úbvú Sayinayi pọ: ²Epha unwu Eronu bẹ bụ Nadabu, bụ iya bụ ọkpara iya; waa Abihu; mẹ Eleyaza; waa Itama. ³Noo ẹpha unwu Eronu, bụ ndu a wuru manụ l'ishi; mbụ ndu ono, a họtaru dobe g'ẹpẹ buru ndu-uke Chileke. ⁴Ọle Nadabu yẹle Abihu bẹ daru l'atatiphu Chipfu nwushihu; kẹle ẹphe gude ọku, ta adudu nsọ kpọoru Chipfu ngweja ọku l'echiegu Sayinayi. Ọphu ẹphe emetaduru unwegirima; ọ buru Eleyaza yẹle Itama bẹ jehaarụ ozi ndu-uke Chileke lẹ teke ono, nna pẹ, bụ Eronu nọkwaduro ndzụ.

⁵Ọo ya bụ Chipfu bya asụ Mósisu: ⁶“Chịta ipfu Lívayi jeye l'ẹka Eronu, bụ onye uke Chileke; k'ọphu ẹphe a-nọdu ejebude iya ozi. ⁷Epe a-nọdu ejeru Eronu ozi; bya ejeru ndu Ízurelu l'ọphu ozi l'ọlo-ẹkwa-ndzuko; mbụ l'ẹphe a-nọdu eje ozi, rwuberu pẹ nụ l'ọlo Chileke. ⁸Epe a-nọduje eleta ivu, dọ l'ọlo-ẹkwa-ndzuko ono ẹnya; shi nno ejeru ndu Ízurelu ozi, rwuberu pẹ nụ l'ọlo Chileke. ⁹Tụko ndu Lívayi l'ọphu ye Eronu yẹle unwu iya l'ẹka; mbụ l'a họtutawaru pẹ g'ẹpẹ hakọta l'echilabọ ndu Ízurelu l'ọphu woru ye iya l'ẹka. ¹⁰L'i tya Eronu mẹ unwu iya ẹka g'ẹpẹ buru ndu-uke Chileke. Iphe, bụ onye ọzo mmanụ, jekuberu mgboru ọlo-nsọ ono bẹ ee-gbu egbu.”

¹¹Chipfu byakwa epfuaru Mósísu ozo sù iya: ¹²“Lenu; mu shiwaá l'echi-labò ndu Ízùrelù hòta ndu Lívayi g'èphe nòchia ẹnya iphe, bụ ọkpara; mbụ iphe, bụ nwoke, vu ụzo waa ne iya ẹkpa-nwa lẹ Ízùrelù. Ọo ya bụ lẹ ndu Lívayi bẹ bụ nkemu; ¹³noo kẹle ndu bụkota ọkpara bụ nkemu. Mbọku ono, mu gbushiru ndu bụ ọkpara l'alị Ijiputu ono bẹ mu wotaru iphe, bụ ọkpara ndu Ízùrelù; doberu onwomu; mbụ e shikpoo lẹ nemadzụ je akpaa l'anụ. Èphe a-bùru nkemu. Ọo mbedua bẹ bụ Chipfu.”

Agụ ndu Lívayi ọgu.

¹⁴No iya; Chipfu bya epfuru yeru Mósísu l'echiegu Sayinayi sù iya: ¹⁵“Gua ndu Lívayi ọgu; gua phẹ l'ẹnya-unuphu l'ẹnya-unuphu; mẹ l'ọnu-lo l'ọnulo. Ndu ịi-gụ bẹ bụ unwoke, nọwaru a -gbẹ l'ọnwa lanụ kwaseru.”

¹⁶Tọbudu iya bụ; Mósísu gua phẹ egube ono, Chipfu pfuru iya ya ono.

¹⁷Waa epha unwu Lívayi baa: Geshonu; mẹ Kohatu; waa Merari.

¹⁸Ọwaa bụ epha unwu Geshonu l'ẹnya-unuphu phẹ l'ẹnya-unuphu phẹ: Libuni waa Shimeyi. ¹⁹Unwu kẹ Kohatu l'ẹnya-unuphu phẹ l'ẹnya-unuphu phẹ bẹ bụ Amuramu; mẹ Izuha; mẹ Hẹburonu; waa Uzẹlu. ²⁰Unwu kẹ Merari l'ẹnya-unuphu phẹ l'ẹnya-unuphu phẹ bẹ bụ Mahuli waa Mushi. Ndu ono tukuru buri ipfu Lívayi; egube epepe dọ l'ẹnya-unuphu l'ẹnya-unuphu phẹ.

²¹Unwu Geshonu bụ ndu ọnu-ulo Libuni waa ndu ọnu-ulo Shimeyi. Ọ buri phẹ bụ ndu ọnu-ulo Geshonu. ²²Unwoke, nọwaru ọnwa lanụ kwaseru l'ọnulo Geshonu bẹ dọ unu nemadzụ iri l'esato; l'umadzu ukporo iri l'ise. ²³Ndu ọnu-ulo Geshonu bẹ akpọbeje ụlo-ẹkwa ebubu phẹ l'uzo ẹnyanwu-ariba; l'azu ụlo-ẹkwa Chileke. ²⁴Onye bụ ishi l'ọnulo Geshonu bụ Elijasafu nwa Layẹlu. ²⁵Ozi, e yeru unwu Geshonu ono l'eka g'èphe jeje l'ulo-ẹkwa-ndzukọ ono bụ eleta ụlo-ẹkwa Chileke ẹnya; waa ẹkwa, e gude kpua ya; mẹ eleta ẹkwa, e gude gbobuta ọnu-abata ụlo-ẹkwa-ndzukọ ono ẹnya; ²⁶mẹ eleta ẹkwa, e gude gbobuta ọma-unuphu; waa ẹkwa, e gude gbobuta ọnu-abata ọma-unuphu ono, nọ-pheru ụlo-ẹkwa Chileke ono; waa ọru-ngweja mgburugburu; mẹ eleta udo ẹnya; waa iphe, bụkpoo ozi, gbaru phẹ nụ.

²⁷Unwu Kohatu bụ ndu ọnu-ulo Amuramu; mẹ ndu ọnu-ulo Izuha; mẹ ndu ọnu-ulo Hẹburonu; mẹ ndu ọnu-ulo Uzẹlu. Ọ buri phẹ bụ ndu ọnu-ulo Kohatu. ²⁸Unwoke, nọwaru ọnwa lanụ kwaseru lẹ ndu ọnu-ulo Kohatu bẹ dọ ukporo unu nemadzụ; l'unu umadzu lanụ; l'umadzu ukporo iri. Ọ buri phẹ bẹ ọ duru; mbụ ozi, eeje l'ulo dọ nsọ. ²⁹Ndu ọnu-ulo Kohatu bẹ akpọbeje ụlo-ẹkwa ebubu phẹ l'uzo ndohali ụlo-ẹkwa Chileke. ³⁰Onye bụ ishi l'ọnulo Kohatu bụ Elizafanu nwa Uzẹlu. ³¹Ozi, duru phẹ nụ bụ eleta okpoko Chileke ẹnya; mẹ teburu; mẹ iphe, aapfubeje orọku; mẹ ọru-ngweja; mẹ ivu, dọ l'ulo-nsọ, ndu-uke egudeje eje ozi; mẹ ẹkwa, e gude gbobuta ẹka-kakota-adu-nsọ; waa iphe, bụkpoo ozi ozo, gbaru

phẹ nụ. ³² Onye-ishi ndu-ishi ndu Lívayi l'ophu bụ Eleyaza nwa Erõnu, bụ onye uke Chileke. Oo yẹbedua bẹ a họtaru g'ò bụru onye-ishi ndu eleta ẹnya l'ulo-nsọ ono.

³³ Ụnwu kẹ Merari bẹ bụ phẹ bụ ndu ọnu-ulo Mahuli waa ndu ọnu-ulo Mushi. O bụru ndu ono bụ ọnu-ulo Merari. ³⁴ Unwoke, nọwaru ọnwá lanụ kwasẹru lẹ ndu ọnu-ulo Merari dụ unu nemadzụ iri l'ise l'umadzu ụkporo iri. ³⁵ Onye bụ ishi l'ọnulo Merari ono bụ Zuriyẹlu nwa Abihelu. Ndu ọnu-ulo Merari akpọbeje ulo-ẹkwa ebubu phẹ l'uzo isheli ulo-ẹkwa Chileke. ³⁶ Ozi, e yeru ụnwu Merari l'ẹka k'ẹjeje bụ: eleta mgbo ulo-ẹkwa Chileke ono ẹnya; mẹ oshi, e swebushiru lẹ mgbo ono; mẹ itso iya; mẹ ẹnya ẹka aakpọbeje ọkpa mgbo ono; waa itso ono; mẹ iphe, bụ ngwa, dụkota iya nụ; waa ozi ọzo, gbaru phẹ nụ. ³⁷ Ozi ọzo, e yeru phẹ l'ẹka g'ẹphe jeje bụ: eleta ẹnya l'itso, e gude kpọ-pheta ọma-unuphu ono mgburugburu; mẹ ọkpa iya; mẹ nggu, a kpọru l'ulo-ẹkwa Chileke ono; mẹ eri, e kegbaaru iya.

³⁸ Ndu bụ phẹ a-kpọbeje ulo-ẹkwa ebubu nkephe l'uzo ẹnyanwu-awawa ulo-ẹkwa Chileke; mbụ l'atatiphu ulo-ẹkwa-ndzukọ ono; bẹ bụ Mósisu; yẹle Erõnu; mẹ ụnwu Erõnu. Oo phẹ e-jekọtaje iphe, bụ ozi, ejeje ejeje l'ulo Chipfu. Onye ọzo mmanụ, jekuberu mgboru ulo Chipfu bẹ ee-gbu egbugbu. ³⁹ Iphe, bụ ndu a gụru ọgu l'ipfu Lívayi; mbụ ndu Mósisu yẹle Erõnu gụru ọgu l'ọnulo l'ọnulo, bụ gẹ Chipfu sụru g'ẹphe mee ya; mbụ unwoke, nọwaru ọnwá lanụ kwasẹru bẹ dụ ụkporo unu nemadzụ mgbo labọ l'unu iri l'ise.

⁴⁰ Chipfu bya asụ Mósisu: “Gụkota unwoke, bụ ọkpara l'alị Ízurelu l'ophu ọgu; mbụ unwoke, nọwaru a -gbẹ l'ọnwá lanụ kwasẹru; woru ẹpha phẹ deshia. ⁴¹ Li woru ndu Lívayi doberu mube Chipfu iche; g'ẹphe nọdu l'ugwo ndu bụ ọkpara l'ulo l'ulo lẹ Ízurelu. Li woru anụ, bụ iphe-edobe ndu Lívayi ono doberu mu; g'ẹphe nọdu l'ugwo anụ, vuru ụzo waa ẹkpa-nwa l'iphe-edobe ndu Ízurelu l'ophu.” ⁴² Oo ya bụ; Mósisu gua iphe, bụ ọkpara l'alị Ízurelu l'ophu ọgu; egube ono, Chipfu sụru g'o mee ya. ⁴³ Mkpakọ ndu bụ ọkpara l'iphe, bụ unwoke l'alị Ízurelu l'ophu; mbụ unwoke, nọwaru a -gbẹ l'ọnwá lanụ kwasẹru bẹ dụ ụkporo unu nemadzụ mgbo labọ; l'unu iri l'ise; l'umadzu ụkporo iri l'eto; l'umadzu iri l'eto. A gụru phẹ ọgu; deshia ẹpha phẹ l'ẹkwo.

⁴⁴ Tọbudu iya bụ; Chipfu bya asụ Mósisu: ⁴⁵ “Woru ndu Lívayi doberu mu iche; g'ẹphe nọdu l'ugwo ndu bụ ọkpara l'ulo l'ulo lẹ Ízurelu. Li woru anụ, bụ iphe-edobe ndu Lívayi ono doberu mu; g'ẹphe nọdu l'ugwo anụ, vuru ụzo waa ẹkpa-nwa l'iphe-edobe ndu Ízurelu l'ophu. O kwa mbẹdua bẹ bụ Chipfu. ⁴⁶ A -bya abya l'ụkporo umadzu iri l'eto l'umadzu l'iri l'eto ono, bụ iphe, ọkpara ndu Ízurelu gude ka oshilọkpa Lívayi shii ono; iphe, aa-pfu gude gbata phẹ bẹ bụ ⁴⁷ mkpọla-ọchaa, ẹrwa iya dụ shẹkelu ise, bụ iphe, eegudeje atụ ẹrwa iphe l'eze-ulo Chileke bẹ e gude tụa ya. Ẹrwa

shékèlu lanu bú ùkpòrò gèrà. Úgwò onò bẹ àà-pfù l'ìshì onyè l'onyè. ⁴⁸Lì woru okpògà onò, èe-gudè gbata ùmadzù olè onò, èphè gudè kà ndu Lí-vayì shì onò nù Èrònu yèlè ùnwu iya.” ⁴⁹Oò yà bú; Mòsìsù nakòò okpògà onò, èe-gudè gbata ndu onò; l'èkà ndu onò, à gùrù ògù; èphè kà ndu Lí-vayì shì onò. ⁵⁰Iphe, Mòsìsù natakòtaru l'èkà ndu bú òkpara l'alì Ízùrèlù bẹ bú mkpòlà-òchaa, èrwa iya dù ùnu shékèlù ètò; l'ùkpòrò shékèlù èsàtò lẹ shékèlù isè, bú iphe, eegudejè atù èrwa iphe l'eze-ùlò Chìlèkè bẹ è gudè tù yà. ⁵¹Mòsìsù wòtá okpògà-agbafùtá onò nù Èrònu yèlè ùnwu iya; ègù-bè onò, Chìpfu tùrù iya yà l'èkèmu.

Awa Kohatu

4 ¹Chipfu bya epfuru yeru Mòsìsù yèlè Èrònu; sù phẹ: ²“Unu gùà ùnwu Kohatu, bú ndu shì l'èrì Lí-vayì ògù. Unu gùà phẹ l'ònulo l'ònulo; mẹ l'ènya-unuphu l'ènya-unuphu. ³Ndu unu a-gù bẹ bú iphe, bú unwoke, nòwaru ùkpòrò apha l'apha iri jẹ akpaa l'ùkpòrò apha labò l'apha iri; mbù ndu sùwaru èjè ozi l'ùlò-èkwa-ndzùkò.

⁴“Ozi, ùnwu Kohatu a-nòdù èjè l'ùlò-èkwa-ndzùkò onò bú: èlètá iphe, kakòtá adù nsò ènya. ⁵Ndu Ízùrèlù -nòdù abya aphòtá ùlò-èkwa phẹ tùgbuá; gẹ Èrònu yèlè ùnwu iya bahù l'ìmè ùlò-èkwa-ndzùkò jẹ atòfùtá èkwa, eegudejè gbòbutá èkà-kakòtá-adù-nsò; gudè iya phù-chiá okpòkò-èkèmu. ⁶Oò yà bú; èphè ewòtá akpò umorò-ènyìmu phù-kputá iya; gudè èkwa, dùkòtá urwùkpù-urwùkpù phù yà l'èlì; bya eworù mgbòrò, eegudejè èkà apa iya yè iya.

⁷“Lèlì tẹburu phò, eedòbèjè búredì onò, adùjè l'ìphù Chìpfu onò bẹ èe-kwèbèjè èkwa, dù urwùkpù-urwùkpù; l'è wòtá gbamùgbamù tù-kòbè iya l'èlì; mẹ ite; mẹ nkwèkà; wáà okorò, ngwèjá-mẹè adùjè. Aatù-kòbèkwa iya phò búredì onò, adùjè l'atátìphù Chìlèkè mkpùrumkpùrù onò. ⁸Èphè abya eworù èkwa uswè-uswè túsáà l'èlì iphèmìphè onò; kwèchìtá iya akpò umorò-ènyìmu; wòtá mgbòrò, eegudejè èkà apa iya yè iya.

⁹“Èphè abya egudè èkwa, dù urwùkpù-urwùkpù kwèchìá iphe, aatukòbèjè oròkù, è gudè anwù òkù; gudè iya kwèchìá oròkù l'onwìyá; mẹ iphe, apájè oghù iya; mẹ iphe, aagùjè òkù; mẹ iphèmìphè, eeyèjè manù, è gudè anwù òkù. ¹⁰Oò yà bú; èphè egudè akpò umorò ènyìmu phù-kputá iphèmìphè onò; mẹ ìvù, dùkòtá iya nù; woru dòbè l'èlì iphe, àà-dòbèjè iya gudè apa iya.

¹¹“Èphè a-phùshì èkwa, dù urwùkpù-urwùkpù l'èlì òrù-ngwèjá onò, è mèrù lẹ mkpòlà-òdòdò onò; gudè akpò umorò ènyìmu kwèchìá yà; woru mgbòrò, eegudejè apa iya yè iya.

¹²“Èphè ewòtakòtá iphe, bú ìvù, eegudejè èjè ozi l'ùlò Chìpfu; gudè èkwa, dù urwùkpù-urwùkpù kẹkòbè iya; bya egudè akpò umorò ènyìmu kwèchìtá iya; woru iya tükòbè l'èlì iphe, eegudejè apa iya.

¹³“Èphè è-kpòfù ntù, nò l'òrù-ngwèjá onò; woru èkwa oruswè oruswè túsáà l'èlì iya. ¹⁴Noo yà; èphè ewòtá iphe, bú ìvù, eegudejè èjè ozi l'òrù-ngwèjá onò;

tukobe l'eli ẹkwa oruswe oruswe ono. Mbù l'ẹphe a-tukobe iya iphe, aagujẹ ọkù; mẹ oji; mẹ iphe, eegudeje ekpo ntù; mẹ gbamugbamù. Iphemiphe ono bẹ ee-kwechita akpọ umoro ẹnyimù; woru mgbọro, eegudeje apa iya ye iya.

15 “Erọnu yẹlẹ ẹnwu iya -kwechishigbuchaẹpho ọlọ Chipfu; mẹ ivu, dù iya nù; ndu Ízurelù -byaẹpho apha ọlọ-ẹkwa phẹ tugbua; g'ọ buru ẹnwu Kohatu e-vuta iphe ono. Ọlẹ ọọ g'ẹphe te edenyikwa ẹka l'iphe, dù nsọ; ọdumeka bẹ ẹphe a-nwuhukwa. Ọọ ẹnwu Kohatu bẹ e-vutajẹ iphe ono, dù l'ọlọ-ẹkwa-ndzuko ono.

16 “Eleyaza nwa Erọnu, bụ onye uke Chileke bẹ kẹ manù, eegudeje anwu ọkù dù l'ẹka; mẹ ẹnwù-isensu, anọduje eshi mkpọ; mẹ ngweja-nri, eegweje mbọku-mboku; mẹ manù, aawujẹ l'ishi. Ọọ yẹbedua bẹ a-nọdu eleta ọlọ-ẹkwa Chileke l'ophu ẹnya; mẹ iphemiphe, dù iya nù; mbù ọlọ Chipfu; mẹ ivu, dukota iya nù.”

17 Chipfu sù Mósìsù yẹlẹ Erọnu: 18 “Unu te ekwekwa g'ọnulo Kohatu chihu l'ipfu ndu Lívayi. 19 Waa iphe, unu e-meru phe; k'ophu ẹphe a-nọdu ndzù; ẹphe taa nwuhudu m'ẹphe jekube iphe, kakọta-adù-nsọ ntse baa: G'ọ buru Erọnu yẹlẹ ẹnwu iya a-bahujẹ l'ime ọlọ Chipfu je akaru onyenonu ozi ophu oo-je; mẹ ivu, oo-vuta. 20 Ọlẹ g'oshilokpa Kohatu ta abahukwa je ele ẹnya l'iphe, dù nsọ ono; m'obeta ọ buru g'ọ chaa ya ẹnya achacha mgbo lanù; ọdumeka bẹ ẹphe a-nwushihukwa.”

Unwu Geshonu

21 Chipfu bya asù Mósìsù: 22 “Gukwaapho ẹnwu Geshonu ọgu. Gúa phẹ l'ọnulo l'ọnulo; mẹ l'ẹnya-unuphu l'ẹnya-unuphu. 23 Ndu ịi-gù bụ iphe, bụ unwoke, nọwaru ụkporo apha l'apha iri jeye l'ụkporo apha labọ l'apha iri; mbù ndu sùwaru eje ozi l'ọlọ-ẹkwa-ndzuko.

24 “Iphe, a-buru ozi ndu ọnu-ọlọ Geshonu l'ozi, eejẹ eejẹ l'ọlọ-ẹkwa-ndzuko; mẹ iphe, eevu evuvu bẹ bụ: 25 Ẹphe e-vutajẹ ẹkwa, e gude mee ọlọ-ẹkwa Chileke; mbù vuta ọlọ-ẹkwa-ndzuko ono, mẹ ẹkwa, e gude kpua ya; mẹ akpọ umoro-ẹnyimù, e gude kwechia ya; mẹ ẹkwa, eegudeje gbobuta ọnu-ọlọ-ẹkwa-ndzuko; 26 mẹ ẹkwa, eekobutajẹ mgburugburu l'ọma-unuphu ono, nọ-pheru ọlọ-ẹkwa Chileke ono; mẹ ọru-ngweja ono; waa ẹkwa, eekobutajẹ l'onuzo; mẹ eri, e gude gebe iya; mẹ iphe, bukota ngwa, eegudeje eje ozi, dù iya nù. Ọọ ndu Geshonu ono bẹ e-gude iphe ono g'ọ ha mee iphe, ọ gbaru g'e gude iya mee. 27 Iphe, bukpo ozi, ẹnwu Geshonu ejekpọ eejẹ; obeta ọ buru evu ivu; ọzoo eje ozi ọzo; bẹ bụ Erọnu yẹlẹ ẹnwu iya bẹ e-goshije g'ẹphe e-je iya. Ọọ unubedua bẹ e-goshije phẹ ivu, gbaru phẹ levuvu. 28 Noo ozi, ndu ọnu-ọlọ Geshonu a-nọduje eje l'ọlọ-ẹkwa-ndzuko bụ ono. Iphe, bụ ozi phẹ bẹ bụ Itama nwa Erọnu, bụ onye uke Chileke bẹ a-nọdu egoshije phẹ g'ẹphe e-je iya.”

Unwu Merari

29 “A -bya abya l'ẹnwu Merari; gúa phẹ ọgu l'ọnulo l'ọnulo; mẹ l'ẹnya-unuphu l'ẹnya-unuphu. 30 Ndu ịi-gù bụ iphe, bụ unwoke, nọwaru ụkporo

apha l'apha iri jeye l'ụkporo apha labọ l'apha iri; mbụ ndu sụwaru eje ozi l'ụlo-ẹkwa-ndzuko. ³¹Waa iphe, gbaru ụnwu Merari l'ememe teke ẹphe eje ozi l'ụlo-ẹkwa-ndzuko baa: Ẹphe e-vutajẹ mgbo ụlo-ẹkwa Chileke; mẹ oshi, e swebushiru lẹ mgbo ono; mẹ itso iya; mẹ ọkpa mgbo. ³²Ẹphe e-vutajẹkwapho itso, nọ-pheru ọma-unuphu mgburugburu; mẹ ọkpa itso ono; mẹ nggu, a kporu l'ụlo-ẹkwa ono; mẹ ụdo iya; mẹwaro ivu, etsoje iya nū g'ọ ha; waa iphemiphe, e gude eje ẹgube ozi ono. Unu ketarụ onyenọnu iphe, gbaru iya l'evuvu.

³³“Noo ozi, ndu ọnu-ulo Merari a-nọduje eje l'ụlo-ẹkwa-ndzuko bụ ono. Ọ bụru Itama nwa Eronu, bụ onye uke Chileke bẹ a-nọduje egoshi pẹ g'ẹphe e-je ozi ono.”

Iphe, ndu Lívayi kpakọru dū

³⁴No iya; Mósísu yẹle Eronu; mẹ ndu-ishi ndu Ízurelụ bya atụko ndu Kohatu gụkota ọgu; gụa pẹ l'ọnulo l'ọnulo; mẹ l'ẹnya-unuphu l'ẹnya-unuphu. ³⁵Ndu bụ unwoke, nọwaru shita l'ụkporo apha l'apha iri jeye l'ụkporo apha labọ l'apha iri; mbụ ndu sụwaru eje ozi l'ụlo-ẹkwa-ndzuko; ³⁶mbụ ndu a gụru l'ọnulo Kohatu bẹ dū unu nemadzụ ishii; l'ụmadzu ụkporo iri l'ẹsaa l'ụmadzu iri. ³⁷Noo mkpakọ unwoke, a gụru ọgu l'ipfu Kohatu bụ ono; mbụ ndu jeru ozi l'ụlo-ẹkwa-ndzuko. Mósísu yẹle Eronu gụru ọgu ono ẹgube Chipfu tūru Mósísu ekemu g'ọ gụa ya.

³⁸Ụnwu Geshonu bẹ a gụkwarupho ọgu l'ọnulo l'ọnulo; mẹ l'ẹnya-unuphu l'ẹnya-unuphu. ³⁹Iphe, bụ unwoke, nọwaru shita l'ụkporo apha l'apha iri jeye l'ụkporo apha labọ l'apha iri, bụ ndu sụwaru eje ozi l'ụlo-ẹkwa-ndzuko ⁴⁰bẹ a gụru ọgu l'ọnulo l'ọnulo; mẹ l'ẹnya-unuphu l'ẹnya-unuphu pẹ. Iphe, a gụtaru bẹ dū unu nemadzụ ishii l'ụkporo iri lẹ nanụ l'ụmadzu iri. ⁴¹Noo mkpakọ unwoke, a gụru ọgu l'ọnulo Geshonu; mbụ ndu sūru eje ozi l'ụlo-ẹkwa-ndzuko teke Mósísu yẹle Eronu gụru pẹ ọgu gẹ Chipfu tūru pẹ iya l'ekemu.

⁴²Ụnwu Merari bẹ a gụkwarupho ọgu l'ọnulo l'ọnulo; mẹ l'ẹnya-unuphu l'ẹnya-unuphu. ⁴³Iphe, bụ unwoke, nọwaru shita l'ụkporo apha l'apha iri jeye l'ụkporo apha labọ l'apha iri, bụ ndu sụwaru eje ozi l'ụlo-ẹkwa-ndzuko ⁴⁴bẹ a gụru ọgu l'ọnulo l'ọnulo; gụta unu ụmadzu ẹsato damụ. ⁴⁵Noo mkpakọ unwoke, a gụtaru l'ọnulo Merari bụ ono. Ọ bụerupho gẹ Chipfu pfuru iya Mósísu bụ gẹ Mósísu yẹle Eronu gụru pẹ ọgu ono.

⁴⁶Ọo ya bụ; Mósísu yẹle Eronu; mẹ ndu-ishi ndu Ízurelụ gụkota ndu Lívayi l'ophu ọgu; l'ọnulo l'ọnulo; mẹ l'ẹnya-unuphu l'ẹnya-unuphu. ⁴⁷Ndu ẹphe gụru bẹ bụ iphe, bụ unwoke, nọwaru shita l'ụkporo apha l'apha iri jeye l'ụkporo apha labọ l'apha iri, bụ ndu sụwaru eje ozi l'ụlo-ẹkwa-ndzuko; mẹ evu ivu. ⁴⁸Iphe, ẹphe tukuru dū bụru ụkporo unu nemadzụ; l'unu ụmadzu lanụ; l'ụmadzu ụkporo tete. ⁴⁹E goshichaa ndu nonu l'ẹhu l'ẹhu ozi, ẹphe a-nọduje eje; mẹ ivu, ẹphe a-nọduje evu. Ọ bụerupho gẹ Chipfu sūru Mósísu g'o mee ya bụ g'o meru iya.

Edobe ẹka ndu Ízurelu kpọberu ọlo-ẹkwa phe nsọ

5 ¹Chipfu bya asu Mosisu: ²“Pfuaru ndu Ízurelu g'ephe chishia iphe, bu ndu ekpenta eme l'ẹka ono, ephe kpọberu ọlo-ẹkwa ebubu phe ono; ephe achishia ndu iphe alwashì alwashì l'ẹhu. Ephe achishikwaapho ndu denyiru ẹka l'odzu; shi nno merwua onwophe. ³Unu chifukota phe; unwoke; me unwanyi. Unu chishia phe l'ẹka ono, unu kpọberu ọlo-ẹkwa unu g'ephe be merwu iya; mbu l'ẹka ono, mu bu l'echilabo unu ono.” ⁴Ndu Ízurelu mee ya egube ono; bya achishikota ndu ono l'ẹka ono, ephe kpọberu ọlo-ẹkwa phe ono. O buru ge Chipfu pfuru iya Mosisu bu g'ephe meru iya.

K'apfu ugwo iphe, e mebyiru

⁵Chipfu su Mosisu: ⁶“Pfuaru ndu Ízurelu le-a: Teke nemadzu; mbu nwoke; ozoo nwan yi mesweru nwibe iya egube ono, ndiphe emeje; mbu shi nno meswee Chipfu; be ikpe nmaakwaru onye obu. ⁷Onye obu be e-pfu iphe-eji ono, o meru ono. Lo pfu-dzukota ugwo ejo-iphe obu, o meru obu go ha; wota uto lanu l'uto ise l'iphe iya yekobe iya nu onye ono, o mesweru ono. ⁸O -buru l'onye ono, e mesweru ono te nwedu abubu, bu onye aa-pfu ugwo iphe ono; oo ya bu; ugwo ono aburu ke Chipfu. Onye aa-nu iya be bu onye uke Chileke. Aakpuru ebili, e gude apfu ugwo iphe-eji yekobe iya. ⁹Iphe, bu iphe, ndu Ízurelu doberu nsọ g'ephe nu Chipfu, bu iphe, ephe wotaru bya anu onye uke Chileke bukota k'onye uke ono. ¹⁰Iphe, onye doberu nsọ ge ya nu Chileke be bu onye uke Chileke be nwe iya nu. Iphe, bukpo iphe, a nuru onye uke Chileke buru onye uke Chileke ono nwe iya.”

Ke nwan yi, ji iya ele enya l'oori ogori

¹¹Tobudu iya bu; Chipfu bya asu Mosisu: ¹²“Pfuaru ndu Ízurelu; su phe: O -buru le nwoke be nyee ya akpa njo uri; shi nno emeswe ji iya; ¹³mbu; o -buru le yele nwoke ozo kwaru; o shi nno merwua onwiya; ophu ji iya ta amadu; teme ophu egechiduru iya teke oome iya; ophu o dudu onye gbaru ekebe loo iphe, o meru bu ono; ¹⁴mbu; o -buru le nwoke ono be nonyaaru; o koaharu nyee ya ono okophoo; leahaa ya enya l'o merwuaru onwiya; le teke nwan yi ono merwuru onwiya; ozoo l'a nonyaaru; o koaharu nyee ya ono okophoo; leahaa ya enya l'o merwuru onwiya lebe abu l'o merwuru onwiya; ¹⁵ge nwoke ono duta nyee ya ono jepfu onye uke Chileke. Lo gude uto lanu l'ime nkweka ukpokutu balì, e keru uto iri, ee-gude gwee eja ehu nyee ya ono. G'o to yekwa manu l'ukpokutu balì ono; ophu o yekwa iya unwu-isensu; noo kele oo ngweja-nri, e gweru le k'okophoo; mbu ngweja, e gude anyata ejo-iphe.

¹⁶“G'onye uke Chileke duritaru nwan yi ono ntse go pfuru l'atatiphu Chipfu. ¹⁷Oo ya bu; onye uke Chileke ono ekuta mini, e doberu nsọ l'ite, a kpuru l'urwa;

kpota udzu eja, shi l'oma-ulo ulo-ekwa Chileke wuru ye l'ime mini ono. ¹⁸Onye uke Chileke -pfubechaepho nwanyị ono l'atatiphu Chipfu; l'ootofu iya iphe, o keberu l'ishi; pata ngweja-nri ono, e gude anyata ejo-iphe ono nụ iya g'ọ parụ l'eka; mbụ ngweja-nri ono, e gwerụ lẹ k'okophoo ono. Onye uke Chileke ono l'onwiya aparụ mini, atso ilu ono, emeje gę nemadzụ buru onye a turu onu ono. ¹⁹Ọ buru teke ono bę onye uke Chileke a-nụ nwanyị ono nte g'ọ ria sụ: 'Ọ -buru l'ọ tọ dudu nwoke ozo, gụ l'iya kwajeru; ophu i tị kpaduru njo uri; shiwa nno merwua onwongu l'ehu-nwoke ozo, gbahakwa ji ngu-a; gę mini, atso ilu-a, emeje gę nemadzụ buru onye a turu onu-a ta adukwa iphe, oo-me ngu. ²⁰Ọloburu l'i nọ l'eka ji ngu-a; bya akpaa njo uri; gụ lẹ nwoke ozo kwaa gbahakwa ji ngu-a; i shi nno merwua onwongu; ²¹gę Chipfu mekwaa g'ekpa-nwa chihu ngu; mbụ g'i tị tų nwa l'utapfu; g'i buru onye aa-noduje ephu l'iphu; bya anma l'ejo etu l'ibe unu.' Noo nte, onye uke Chileke ono a-sụ nwanyị ono g'ọ ria; tų onwiya onu bu ono. ²²'Mbụ; gę mini, atso ilu-a, emeje gę nemadzụ buru onye a turu onu-a kpobakwa ngu l'epho; k'ophu ekpa-nwa e-chihu ngu; g'i tị tų nwa l'utapfu.'

"Oo ya bụ; nwanyị ono asu: 'G'ọ dụ nụ g'i pfuru. G'ọ dụ nụ g'i pfuru.'

²³"Onye uke Chileke ono abya atuko ejo enwa ono, o guru ono deshikota l'ekwo; l'ọ bya asaru iphe ono, o deru ono ye lẹ mini, atso ilu ono. ²⁴Lọ bya eworu mini, atso ilu ono, emeje nemadzụ g'ọ buru onye a turu onu ono nụ nwanyị ono g'ọ ngua. Ọ -ngue ya pho; mini ono anodu iya l'epho; mee g'ejo iphe-ehuka, tsoghuru ilu dapfuta iya. ²⁵Lẹ teke ono bę onye uke Chileke ono a-nata nwanyị ono ngweja-nri ono, e gwerụ lẹ k'okophoo ono, nwanyị ono pa l'eka ono; l'obya amaa ya amama l'atatiphu Chipfu; woru iya je edobe l'oru-ngweja. ²⁶Onye uke Chileke ono abya ahajia ngweja-nri ono mkpoji-eka; woru kpo odu l'oru-ngweja ono. Ngweja ono a-buru ngweja, e gude anyata ejo-iphe ono. O -mechaepho nno; l'ọ bya anụ nwanyị ono mini ono g'ọ ngua. ²⁷Ọ -buru l'ọ merwurwu onwiya; mbụ l'ọ mesweru ji iya; bę bụ teke a nueru iya pho mini ono; o ngua; o bahụ iya l'epho bę oo-me g'ejo iphe-ehuka, atso ilu dapfuta iya. Oo-me g'ekpa-nwa chihu iya; g'ọ tọ tų nwa l'utapfu; temanu o buru onye vu onu l'ibe phe. ²⁸Teke o bụ lẹ nwanyị ono bę te emerwuduru onwiya; mbụ-a; o -buru lẹ nwanyị ono dụ ree; bę o tọ dudu iphe, bya l'e-me iya nụ; oo-nodu anwushi unwegirima.

²⁹"Noo ekemu, a turu swiberu nwanyị, ji iya ekoru okophoo; mbụ nwanyị, nọ l'eka ji iya; o nodu akpaję njo uri; emerwushi onwiya; ³⁰ozoo l'a nonyaaru nwoke koaharu nyee ya okophoo; leahaa ya njo enya. G'onye uke Chileke pfube nwanyị obu l'iphu Chipfu mekota iya iphemiphe ono, a turu l'ekemu ono. ³¹Nwoke ono l'onwiya bę ta adukwa ejo-iphe, a-tukoru iya l'ishi. Oo nwanyị ono e-vuru ejo-iphe, o metaru kpua onwiya."

Onye woru onwiya doberu Chipfu iche

6 ¹Chipfu sụ Mosisu; ²"Pfururu yeru ndu Ízurelu sụ phe-a: O -nweru nwoke; ozoo nwanyị, kweru ukwe, gbaru iche sụ lẹ ya a-duru Chipfu

iche; mbù lẹ ya e-dobe onwiya gẹ ya b̄uru onye gbaru iche l'ẹnya Chipfu; ³g'onye ọbu ta ngujekwa mee; ọzoo iphe, aangũ angũngu, atsu atsutsu. Ọphu ọ ngujekwa mee-veniga; ọzoo ọphu e meru l'iphe, aangũ angũngu ọzo, atsu atsutsu. G'ò tọ ngujekwa mini akpuru vayinu; ọphu o rijekwa akpuru vayinu oyii; ọzoo ọphu e gheru egheghe. ⁴G'ò to rijekwa iphe, shi l'oshi vayinu; m'ò b̄u akpuru vayinu ọbu l'onwiya; ọzoo egbo vayinu jeye teke ọo-b̄u-beru onye d̄uru Chipfu iche.

⁵“Akwo ta abyadu e-rwu iya l'ishi jeye g'ọo-b̄u-beru onye doberu onwiya iche ono. Ọo-d̄uepho iche g'ò d̄u iya jas̄u; teke ono, o doberu onwiya Chipfu iche ono edzua. Egbushi, nọ iya l'ishi bẹ ọo-ha g'ò rwuchia erwuchi. ⁶L'ògè teke ono, ọ d̄uru Chipfu iche ono bẹ ọ tọ byadu e-je lẹ mgboru ẹka odzu nọ. ⁷Mb̄u; obeta ọ b̄uru l'ọo nna iya nwuhuru; ọzoo l'ọo ne iya nwuhuru; ọzoo l'ọo nwune iya kẹ nwoke; ọzoo nwune iya kẹ nwan̄yị bẹ ọ tọ b̄udu iya e-me g'ò t̄urwua onwiya; kẹle ab̄ubu, ọ b̄u onye d̄uru Chileke iche; tukoru iya l'ishi. ⁸Lẹ teke ono ọo-nokotakpo b̄uru onye doberu onwiya iche ono bẹ ọ b̄u onye d̄uru Chipfu nsọ.

⁹“Teke o nweru onye gbabuhuru nwuhu lẹ mgboru ẹka ọ nọ; o shi nno t̄urwua onwiya l'ab̄ubu ono, ọ b̄u onye d̄uru Chileke iche ono, b̄u ọphu tukoru iya l'ishi ono; g'ò nọo abalì ẹsaa; o -rwuepho lẹ mb̄oku k'ẹsaa; l'ọ kpushia ishi; shi nno rọo onwiya ẹhu ọzo. ¹⁰O -be lẹ mb̄oku k'ẹsato; l'ọ wota ndo lab̄o; ọzoo un̄wu kparaka lab̄o wojeru onye uke Chileke l'onu ọlo-ẹkwa-ndzuko. ¹¹Ọo ya b̄u; onye uke Chileke ono abya ewota nanu gwee ngweja-iphe-ẹji; l'ọ wota nanu ọphuu gwee ngweja-akpo-ọku gude pf̄u ọgwo iphe-ẹji ono, o meru ono; mb̄u l'ọ n̄oru lẹ mgboru ẹka nema-dz̄u nwuhuru. Ọ b̄uru mb̄oku onokwapho bẹ oo-me g'ishi iya d̄u-phu nsọ az̄u. ¹²L'ọ byakwa ab̄uru onye d̄uru Chipfu iche g'ò shi b̄uru iya. Ọ -nọ-dzua ya; l'ọ kp̄uta ebili, gbaru apha je an̄u g'e gude gweeru iya ngweja-apf̄u-ọgwo. Ọphu, ọ n̄ohawaru pho bẹ a taa ḡukwa eye iya; kẹle ọ nọ iya t̄urwua onwiya.

¹³“Owaa b̄u ekemu, d̄uru onye woru onwiya doberu Chipfu iche; nọo ya nọ-dzua. Ee-duru onye ọbu bya l'onu ọlo-ẹkwa-ndzuko. ¹⁴Ọ b̄uru l'ẹka ono bẹ ọo-nodu woru iphe, ọonu Chipfu n̄u iya. Ọo-n̄u iya ebili, gbaru apha, te nwed̄u ẹka iphe mebyiru iya g'e gude gwee ngweja-akpo-ọku; l'ọ bya an̄u nwada at̄uru, gbawaru apha, te enwed̄u ẹka iphe mebyiru iya g'e gude gwee ngweja-iphe-ẹji; l'ọ n̄u ebili, te enwed̄u ẹka iphe mebyiru iya g'e gude gwee ngweja-ẹhu-guu. ¹⁵Iphe ọzo, oo-yekobe iya b̄u nkata buredi, e te yed̄uru iphe ekoje buredi; waa akara, e meru l'ukpokutu witi, gwoo lẹ man̄u; mẹ ẹcha-mbekee, a w̄uru man̄u l'eli; waa ngweja-nri; yele ngweja-mee, ayijeru iya n̄u.

¹⁶“Iphe ono g'ò ha bẹ onye uke Chileke e-gweru n̄u Chipfu. L'ọ gwee ngweja-iphe-ẹji ono; waa ngweja-akpo-ọku ono. ¹⁷Onye uke Chileke ono bẹ e-woru nkata buredi ono, ekoduru ekoko ono n̄u Chipfu; bya egbua

ebili phọ gude gwee ngweja-ẹhu-guu nù Chipfu; bya eyekobekwa iya phọ ngweja-nri; yee ngweja-mee, etsoje iya nù tũko gwee. ¹⁸Ọ bũru l'ọnu ọlo-ẹkwa-ndzukọ bẹ onye ono, woru onwiya doberu Chipfu iche ono a-nọdu kpũshia ishi ono, o shi doberu Chileke iche ono. Lọ kpota ẹgbushi iya ono ye l'ọku, nọ lẹ mkpula ẹka iphe, e gude gwee ngweja-ẹhu-guu nọ.

¹⁹“Onye ono, dũru Chipfu iche ono -kpũshichaepho ishi ono, o doberu iche ono; g'onye uke Chileke wota ẹka ebili ono ọphu e shiru eshishi dẹ ya l'ẹka; l'ọ bya ewotafua akara lanu, te koduru ekoko lẹ nkata ono; waa ẹcha-mbekee lanu, te koduru ekoko nù iya. ²⁰Ọo ya bũ; onye uke Chileke ono abya amaa ya amama l'iphu Chipfu g'ọ bũru ngweja amama. Iphe ono bẹ dũ nsọ; ọ bũru onye uke Chileke bẹ nwe iya nù; yele ñdũ ebili ono, a maru amama; mẹ ọtapfu iya ono, a nũru Chipfu ono. E -mechaa nno; onye ono, dũru Chipfu iche ono angũwaro mee.

²¹“Ono bũ ekemu dũru onye woru onwiya doberu Chipfu iche; mbũ onye kwetarũ ukwe lẹ ya e-woru onwiya doberu Chipfu iche; wakwaphọ iphe, ọo-nuje Chipfu mẹ ọ nọ-dzue ya phọ; a -gũfukwa iphe ọzo, ọo-dũ ike gbatafua. Ọle o medzufutaje iphe, o kweru ukwe iya; lẹ g'ekemu onye dũru Chipfu iche gude dũ.”

Ọnu-ọma ndu-uke Chileke l'ẹhu ndu Ízurelu

²²Chipfu bya asũ Mosisu: ²³“Pfuaru Eronu yele unwu iya sũ phẹ g'ẹphe gojeru ndu Ízurelu ọnu-ọma. Waa g'ẹphe epfufe iya baa:

²⁴ “ ‘Gẹ Chipfu gọru ọnu-ọma nũ unu; chee unu.

²⁵ Gẹ Chipfu mee g'atatiphu iya gbuaru unu nwĩinwii;
l'o meeru unu eze-iphe-ọma.

²⁶ Gẹ Chipfu ghaaru unu iphu;
mee g'ẹhu dũ unu guu.’

²⁷“Ọo ya bũ; ẹphe -gude ẹpha mu gọru ọnu-ọma nũ ndu Ízurelu; mu agọru ọnu-ọma nũ phẹ.”

Ngweja, e gude edobe ọlo-ẹkwa Chipfu iche

7 ¹Tọbudu iya bũ; Mosisu bvubechaepho ọlo-ẹkwa Chipfu ono; ọ wua ya manũ; bya edobe iya iche; bya edobekwaphọ iphe, bũ ivu nọ iya nũ g'ọ ha iche. Nokwaphọ g'ọ wũru manũ l'ọru-ngweja; dobe iya iche; bya edobekwaphọ iphe, bũ ivu ọru-ngweja ono g'ọ ha iche. ²Ọo ya bũ; ndu-ishi ndu Ízurelu, bũ ndu-ishi l'ẹnya-unuphu l'ẹnya-unuphu; mbũ ndu-ishi l'ipfu l'ipfu, bũ iya bũ ndu ono, bũ ishi ndu ọphu a gũru ọgu ono bya eworu iphe nũ. ³Iphe, ẹphe nũru Chipfu bẹ bũ ọgba-kperekpere ishii, e kpuchiru iphe; mẹ oke-eswi iri l'ẹbo. Ndu-ishi ono bẹ nũchaaru oke-eswi lanu oke-eswi lanu l'ẹhu l'ẹhu. Ẹphe dũ ẹbo ẹbo nũcha ọgba-kperekpere lanu. Noo iphe, ẹphe wotaru bya anũ l'iphu ọlo-ẹkwa Chipfu bũ ono.

⁴Chipfu sũ Mosisu: ⁵“Natakọta phẹ iphe ono, ẹphe nũru; k'ọphu ee-gude iya eje ozi l'ọlo-ẹkwa-ndzukọ. L'i woru iya nũ ndu Lívayi. Onyenọnu bẹ ọi-nũcha ya lẹ g'ọzi iya gbaru.”

⁶Qo ya bu; Mósísu bya ewota ọ́gba-kperekpere ono; me oke-eswi ono nu ndu Lívayi. ⁷Unwu Geshonu be o nuru ọ́gba-kperekpere labo; waa oke-eswi eno g'ephe gude jeje ozi, gbaru phe nu. ⁸O nu unwu Merari ọ́gba-kperekpere eno; waa oke-eswi esato g'ephe gude jeje ozi, gbaru phe nu. G'ephe ha be nokota l'eka Itama nwa Eronu, bu onye uke Chileke eje ozi phe. ⁹Obenu l'o to dudu ophu o nuru unwu Kohatu; kele oo ephebe-dua be evu iphe, du nsọ ono l'ukuvu duru.

¹⁰Mboku, a wuru manu l'oru-ngweja Chileke g'e gude woru iya ye Chileke l'eka be ndu-ishi ono wotagbaaru iphe bya anu Chileke l'iphu oru-ngweja ono. ¹¹Chipfu bya asu Mósísu: "Ge ndu-ishi ono byaje nanu nanu le mboku le mboku bya anu iphe ngweja phe g'e gwee l'oru-ngweja ono; shi nno woru iya ye Chileke l'eka."

¹²Onye wotaru iphe nkiya bya anu le mboku ke mbu be bu Nashonu nwa Amínadabu, bu onye-ishi ndu Jiuda. ¹³Iphe, o nuru bu gbamugbamumu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'o ha bu iphe, eegudeje atu erwa iphe leze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manu; g'e gude gwee ngweja-nri. ¹⁴Iphe ozo, o nuru be bu ago lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu; ¹⁵bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku; ¹⁶waa mkpi lanu, ee-gude gwee ngweja-iphe-eji; ¹⁷me oke-eswi labo; waa ebili ise; me mkpi ise; me unwu ebili ise, gbachaaru apha, ee-gude gwee ngweja-ehu-guu. Noo iphe, Nashonu nwa Amínadabu wotaru bya anu bu ono.

¹⁸O be le mboku k'ebo; Netanelu nwa Zuwa, bu onye-ishi l'ipfu Isaka wota iphe nkiya bya anu. ¹⁹Iphe, o nuru bu gbamugbamumu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'o ha bu iphe, eegudeje atu erwa iphe leze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manu; g'e gude gwee ngweja-nri. ²⁰Iphe ozo, o nuru be bu ago lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu; ²¹bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku; ²²waa mkpi lanu, ee-gude gwee ngweja-iphe-eji; ²³me oke-eswi labo; waa ebili ise; waa mkpi ise; me unwu ebili ise, gbachaaru apha, ee-gude gwee ngweja-ehu-guu. Noo iphe, Netanelu nwa Zuwa wotaru bya anu bu ono.

²⁴O be le mboku k'eto; Eliyabu nwa Helonu, bu onye-ishi ndu ke Zebulon wota iphe nkiya bya anu. ²⁵Iphe, o nuru bu gbamugbamumu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo

shékèlù ẹ̀to lẹ̀ shékèlù iri. G'ò ha bú iphe, eegudeje atọ̀ ẹ̀rwa iphe l'eze-ùlò Chileke bẹ̀ e gude tọ̀a ya. Ọ̀phu nọ̀nu bẹ̀ e yejishikọ̀taru ukpokutu ereshi, a gwọ̀ru lẹ̀ manù; g'e gude gwee ngweja-nri. ²⁶Iphe ọ̀zo, ọ̀ nùru bẹ̀ bú agọ̀ lanù, e meru lẹ̀ mkpọ̀la-ododo, ẹ̀rwa iya dọ̀ shékèlù iri; iphe, jiru iya nù bú ùnwù-isẹ̀nsu; ²⁷Ọ̀ bya anù nwa oke-eswi lanù; waa ebili lanù; waa nwa ebili lanù, gbaru apha, ee-gude gwee ngweja-akpọ̀-ọ̀ku; ²⁸waa mkpi lanù, ee-gude gwee ngweja-iphe-ẹ̀ji; ²⁹waa oke-eswi labọ̀; mẹ̀ ebili ise; waa mkpi ise; mẹ̀ ùnwu ebili ise, gbachaaru apha, ee-gude gwee ngweja-ẹ̀hu-guu. Noo iphe, Eliyabu nwa Helọ̀nu wotaru bya anù bú ono.

³⁰O be lẹ̀ mbọ̀ku k'ẹ̀no; Elizuru nwa Shediyo, bú onye-ishi, ùnwu Rúbẹ̀nu wota iphe nkiya bya anù. ³¹Iphe, ọ̀ nùru bú gbamùgbamu mkpọ̀la-ọ̀chaa lanù, ẹ̀rwa iya dọ̀ ukporo shékèlù ishii lẹ̀ shékèlù iri; bya anùkwapho ochi lanù, e meru lẹ̀ mkpọ̀la-ọ̀chaa, ẹ̀rwa iya dọ̀ ukporo shékèlù ẹ̀to lẹ̀ shékèlù iri. G'ò ha bú iphe, eegudeje atọ̀ ẹ̀rwa iphe l'eze-ùlò Chileke bẹ̀ e gude tọ̀a ya. Ọ̀phu nọ̀nu bẹ̀ e yejishikọ̀taru ukpokutu ereshi, a gwọ̀ru lẹ̀ manù; g'e gude gwee ngweja-nri. ³²Iphe ọ̀zo, ọ̀ nùru bẹ̀ bú agọ̀ lanù, e meru lẹ̀ mkpọ̀la-ododo, ẹ̀rwa iya dọ̀ shékèlù iri; iphe, jiru iya nù bú ùnwù-isẹ̀nsu; ³³Ọ̀ bya anù nwa oke-eswi lanù; waa ebili lanù; waa nwa ebili lanù, gbaru apha, ee-gude gwee ngweja-akpọ̀-ọ̀ku; ³⁴waa mkpi lanù, ee-gude gwee ngweja-iphe-ẹ̀ji; ³⁵waa oke-eswi labọ̀; mẹ̀ ebili ise; waa mkpi ise; waa ùnwu ebili ise, gbachaaru apha, ee-gude gwee ngweja-ẹ̀hu-guu. Noo iphe, Elizuru nwa Shediyo wotaru bya anù bú ono.

³⁶O be lẹ̀ mbọ̀ku k'ise; Shelumẹ̀lu nwa Zurishadayi, bú onye-ishi ùnwu Simiyọ̀nu wota iphe nkiya bya anù. ³⁷Iphe, ọ̀ nùru bú gbamùgbamu mkpọ̀la-ọ̀chaa lanù, ẹ̀rwa iya dọ̀ ukporo shékèlù ishii lẹ̀ shékèlù iri; bya anùkwapho ochi lanù, e meru lẹ̀ mkpọ̀la-ọ̀chaa, ẹ̀rwa iya dọ̀ ukporo shékèlù ẹ̀to lẹ̀ shékèlù iri. G'ò ha bú iphe, eegudeje atọ̀ ẹ̀rwa iphe l'eze-ùlò Chileke bẹ̀ e gude tọ̀a ya. Ọ̀phu nọ̀nu bẹ̀ e yejishikọ̀taru ukpokutu ereshi, a gwọ̀ru lẹ̀ manù; g'e gude gwee ngweja-nri. ³⁸Iphe ọ̀zo, ọ̀ nùru bẹ̀ bú agọ̀ lanù, e meru lẹ̀ mkpọ̀la-ododo, ẹ̀rwa iya dọ̀ shékèlù iri; iphe, jiru iya nù bú ùnwù-isẹ̀nsu; ³⁹Ọ̀ bya anù nwa oke-eswi lanù; waa ebili lanù; mẹ̀ nwa ebili lanù, gbaru apha, ee-gude gwee ngweja-akpọ̀-ọ̀ku; ⁴⁰waa mkpi lanù, ee-gude gwee ngweja-iphe-ẹ̀ji; ⁴¹waa oke-eswi labọ̀; mẹ̀ ebili ise; waa mkpi ise; waa ùnwu ebili ise, gbachaaru apha, ee-gude gwee ngweja-ẹ̀hu-guu. Noo iphe, Shelumẹ̀lu nwa Zurishadayi wotaru bya anù bú ono.

⁴²O be lẹ̀ mbọ̀ku k'ishii; Ẹ̀liyasafu nwa Diyuwẹ̀lu, bú onye-ishi ùnwu Gadu wota iphe nkiya bya anù. ⁴³Iphe, ọ̀ nùru bú gbamùgbamu mkpọ̀la-ọ̀chaa lanù, ẹ̀rwa iya dọ̀ ukporo shékèlù ishii lẹ̀ shékèlù iri; bya anùkwapho ochi lanù, e meru lẹ̀ mkpọ̀la-ọ̀chaa, ẹ̀rwa iya dọ̀ ukporo shékèlù ẹ̀to lẹ̀ shékèlù iri. G'ò ha bú iphe, eegudeje atọ̀ ẹ̀rwa iphe l'eze-ùlò Chileke bẹ̀ e gude tọ̀a ya. Ọ̀phu nọ̀nu bẹ̀ e yejishikọ̀taru ukpokutu ereshi, a gwọ̀ru lẹ̀ manù; g'e gude gwee ngweja-nri. ⁴⁴Iphe ọ̀zo, ọ̀ nùru bẹ̀ bú agọ̀

lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu; ⁴⁵O bya anu nwa oke-eswi lanu; waa ebili lanu; me nwa ebili lanu, gbaru apha, ee-gude gwee ngweja-akpo-oku; ⁴⁶waa mkpi lanu, ee-gude gwee ngweja-iphe-eji; ⁴⁷waa oke-eswi labo; me ebili ise; waa mkpi ise; waa unwu ebili ise, gbachaaru apha, ee-gude gwee ngweja-ehuguu. Noo iphe, Eliyasafu nwa Diyuwelu wotaru bya anu bu ono.

⁴⁸O be le mboku k'esa; Elishama nwa Amihudu, bu onye-ishi ndu Ifuremu wota iphe nkiya bya anu. ⁴⁹Iphe, o nuru bu gbamugbamu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'o ha bu iphe, eegudeje atu erwa iphe leze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manu; g'e gude gwee ngweja-nri. ⁵⁰Iphe ozo, o nuru be bu ago lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu; ⁵¹O bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku; ⁵²waa mkpi lanu, ee-gude gwee ngweja-iphe-eji; ⁵³waa oke-eswi labo; me ebili ise; waa mkpi ise; waa unwu ebili ise, gbachaaru apha, ee-gude gwee ngweja-ehuguu. Noo iphe, Elishama nwa Amihudu wotaru bya anu bu ono.

⁵⁴O be le mboku k'esato; Gamalelu nwa Pedazo, bu onye-ishi ndu ipfu Manase wota iphe nkiya bya anu. ⁵⁵Iphe, o nuru bu gbamugbamu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'o ha bu iphe, eegudeje atu erwa iphe leze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manu; g'e gude gwee ngweja-nri. ⁵⁶Iphe ozo, o nuru be bu ago lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu; ⁵⁷O bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku; ⁵⁸waa mkpi lanu, ee-gude gwee ngweja-iphe-eji; ⁵⁹waa oke-eswi labo; me ebili ise, waa mkpi ise; waa unwu ebili ise, gbachaaru apha, ee-gude gwee ngweja-ehuguu. Noo iphe, Gamalelu nwa Pedazo wotaru bya anu bu ono.

⁶⁰O be le mboku ke tete; Abidanu nwa Gidiyoni, bu onye-ishi ndu Benjiaminu wota iphe nkiya bya anu. ⁶¹Iphe, o nuru bu gbamugbamu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'o ha bu iphe, eegudeje atu erwa iphe leze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manu; g'e gude gwee ngweja-nri. ⁶²Iphe ozo, o nuru be bu ago lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu; ⁶³O bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku; ⁶⁴waa mkpi

lanu, ee-gude gwee ngweja-iphe-eji; ⁶⁵waa oke-eswi labo; me ebili ise; waa mkpi ise; waa unwu ebili ise, gbachaaru apha, ee-gude gwee ngweja-ehu-guu. Noo iphe, Abidanu nwa Gidiyoni wotaru bya anu bu ono.

⁶⁶O be le mboku k'iri; Ahiyeza nwa Amishadayi, bu onye-ishi ndu ipfu Danu wota iphe nkiya bya anu. ⁶⁷Iphe, o nuru bu gbamugbamu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'o ha bu iphe, eegudeje atu erwa iphe leze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manu; g'e gude gwee ngweja-nri. ⁶⁸Iphe ozo, o nuru be bu ago lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu; ⁶⁹O bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku; ⁷⁰waa mkpi lanu, ee-gude gwee ngweja-iphe-eji; ⁷¹waa oke-eswi labo; me ebili ise; waa mkpi ise; waa unwu ebili ise, gbachaaru apha, ee-gude gwee ngweja-ehu-guu. Noo iphe, Ahiyeza nwa Amishadayi wotaru bya anu bu ono.

⁷²O be le mboku k'iri le nanu; Pagelu nwa Okuranu, bu onye-ishi ndu ipfu Asha wota iphe nkiya bya anu. ⁷³Iphe, o nuru bu gbamugbamu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'o ha bu iphe, eegudeje atu erwa iphe leze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manu; g'e gude gwee ngweja-nri. ⁷⁴Iphe ozo, o nuru be bu ago lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu; ⁷⁵O bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku; ⁷⁶waa mkpi lanu, ee-gude gwee ngweja-iphe-eji; ⁷⁷waa oke-eswi labo; me ebili ise; waa mkpi ise; waa unwu ebili ise, gbachaaru apha, ee-gude gwee ngweja-ehu-guu. Noo iphe, Pagelu nwa Okuranu wotaru bya anu bu ono.

⁷⁸O be le mboku k'iri lebo; Ahira nwa Enanu, bu onye-ishi unwu Nafutali wota iphe nkiya bya anu. ⁷⁹Iphe, o nuru bu gbamugbamu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'o ha bu iphe, eegudeje atu erwa iphe leze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manu; g'e gude gwee ngweja-nri. ⁸⁰Iphe ozo, o nuru be bu ago lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu; ⁸¹O bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku; ⁸²waa mkpi lanu, ee-gude gwee ngweja-iphe-eji; ⁸³waa oke-eswi labo; me ebili ise; waa mkpi ise; waa unwu ebili ise, gbachaaru apha, ee-gude gwee ngweja-ehu-guu. Noo iphe, Ahira nwa Enanu wotaru bya anu bu ono.

⁸⁴Iphe ono bẹ̀ bụ́ iphe, ndu-ishi ndu Ízurèlu wotaru bya anụ́ g'e gude woru ọ́ru-ngweja ono ye Chileke l'ẹ̀ka; mbụ́ teke ono, a wụ́ru iya manụ́ ono. Iphe, ephe nū́ru bẹ̀ bụ́: gbamụ́gbamu mkpọ́la-ọ́chaa iri l'ẹ̀bo; waa ochi mkpọ́la-ọ́chaa iri l'ẹ̀bo; waa agọ́ mkpọ́la-ododo iri l'ẹ̀bo. ⁸⁵Gbamụ́gbamu lanụ́ bẹ̀ ẹ́rwa iya aduje ụ́kporo shẹ́kelu mkpọ́la-ọ́chaa ishii lẹ́ shẹ́kelu iri. Ẹ́rwa ochi lanụ́ nọ́du aduje ụ́kporo shẹ́kelu mkpọ́la-ọ́chaa ẹ́to lẹ́ shẹ́kelu iri. G'ọ́ ha bụ́ iphe, eegudeje atụ́ ẹ́rwa iphe l'eze-ụ́lo Chileke bẹ̀ e gude tụá ya. ⁸⁶Agọ́ mkpọ́la-ododo ono dụ́ iri l'ẹ̀bo; tẹ́me e yejishichaa ya ụ́nwù-isensu. Ẹ́rwa iya nọ́du abụ́jeru shẹ́kelu mkpọ́la-ododo iri iri. G'ọ́ ha bụ́ iphe, eegudeje atụ́ ẹ́rwa iphe l'eze-ụ́lo Chileke bẹ̀ e gude tụá ya. Mkpọ́la-ododo, e gude mee agọ́ ono bẹ̀ ẹ́rwa iya tṹko dụ́ ụ́kporo shẹ́kelu mkpọ́la-ododo ishii. ⁸⁷Iphe mkpakọ́ anụ́, ee-gude gwee ngweja-akpọ́-ọ́ku ono dṹkota bẹ̀ bụ́; ụ́nwu oke-eswi iri l'ẹ̀bo; waa ebili iri l'ẹ̀bo; waa ụ́nwu ebili iri l'ẹ̀bo, gbachaaru apha; yẹ́le ngweja-nri tso iya nụ́; waa mkpi iri l'ẹ̀bo, ee-gude gwee ngweja iphe-ẹ́ji. ⁸⁸Anụ́, ee-gude gwee ngweja-ẹ́huguu bẹ̀ tṹkoru dụ́ oke-eswi ụ́kporo l'ẹ́no; waa ebili ụ́kporo ẹ́to; mẹ́ mkpi ụ́kporo ẹ́to; waa ụ́nwu ebili ụ́kporo ẹ́to, gbachaaru apha. Noo iphe, a nū́ru g'e gude woru ọ́ru-ngweja ono ye Chileke l'ẹ̀ka; mbụ́ teke ono, a wụ́ru iya manụ́ ono.

⁸⁹O be teke Mósísu bahuru gẹ́ yẹ́le Chipfu bọ́gba l'ime ụ́lo-ẹ́kwa-ndzuko ono; ọ́ numa olu-opfu, a nọ́ l'eli opfu okpoko ono; ẹ́ka aapfufe ụ́gwo iphe-ẹ́ji ono epfu, bụ́ iya bụ́ ẹ́ka ono, e doberu ekemu Chipfu ono. Opfu ono bẹ̀ a nọ́ lẹ́ mgbaka chierobu labọ́ phọ́ epfu eyeru Mósísu.

Edobe orọ́ku

8 ¹Chipfu bya asụ́ Mósísu: ²“Pfuaru Eronu sụ́ iya l'ọ́ -bya adọ́be orọ́ku; g'ọ́ dọ́be orọ́ku ẹ́saa ono k'ọ́phu ìphóró iya a-nga atatiphu iphe ono, a tukoberu iya ono.” ³Eronu mee ya ẹ́gube ono, a sụ́ru g'ọ́ mee ya ono; mbụ́ dọ́be orọ́ku ono; k'ọ́phu ìphóró iya ngakọtaru atatiphu iphe ono, a tṹkoberu iya ono, bụ́ iya bụ́ gẹ́ Chipfu karụ́ Mósísu g'e mee ya. ⁴Waa g'e gude mee iphe ono, aatukobeje orọ́ku ono baa: Ọ́o mkpọ́la-ododo, e tsusaru etsusa bẹ̀ e gude mekọ́ta iya shita l'ike iya jeye lẹ́ nchị́ iya. Iphe ono, aatukobeje orọ́ku ono bẹ̀ e meerupho ẹ́gube Chipfu goshiru iya Mósísu.

Edobe ndu Lívayi iche

⁵Chipfu byakwa asụ́ Mósísu: ⁶“Họ́ta ndu Lívayi l'echilabọ́ ndu Ízurèlu; mee phẹ́ g'ẹ́phe dọ́be ree. ⁷Waa g'ii-shi mee phẹ́ g'ẹ́phe dọ́be ree baa: Wota mini nturwu phee phẹ́ l'ẹ́hu; ephe akpushikota iphe, bụ́ ẹ́ji, dụ́ phẹ́ l'ẹ́hu; bya asashikota uwe phẹ́ shi nno sachaa onwophe ree. ⁸Ẹ́phe ewota nwa oke-eswi; yẹ́le ngweja-nri, ayị́ru iya nụ́, bụ́ iya bụ́ ukpokutu ereshi, a gwọ́ru lẹ́ manụ́. L'i wota nwa oke-eswi ozo, ee-gude gwee ngweja-iphe-ẹ́ji. ⁹L'i duru ndu Lívayi ọ́bu je l'iphu ụ́lo-ẹ́kwa-ndzuko; kukọ́be iphe, bụ́

ndu Ízurelu l'ophu g'ephe dzukoṭa l'eka ono. ¹⁰L'i duru ndu Lívayi ono bya l'atatiṭhu Chipfu. Ndu Ízurelu ebyibe phe ẹka l'ishi. ¹¹Ọ buru Eronu e-woru ndu Lívayi ono ye Chipfu l'eka; ephe aburu ngweja-amama, shi l'eka ndu Ízurelu; k'ophu ephe a-nodu ejeru Chipfu ozi. ¹²Ọo ya bu; ndu Lívayi ono abya ebyibegbaa oke-eswi ono ẹka l'ishi. L'i gude nanu gwee ngweja-
iphe-aji; gude nanu gwee ngweja-akpo-oku nu Chipfu; shi nno pfua ugwo iphe-aji ndu Lívayi.

¹³“L'i mee; ndu Lívayi ono abya atuko pfuru l'iphu Eronu yele unwu iya. L'i woru phe ye l'eka Chipfu g'ephe aburu iya ngweja-amama. ¹⁴Noo g'ii-shi dobe ndu Lívayi iche l'eka ndu Ízurelu ophuna no bu ono; mee ndu Lívayi ono g'ephe buru nkemu. ¹⁵I -sachaeṭhu ndu Lívayi ono; bya eworu phe dobe g'ephe du ge ngweja-amama; ephe ejeahaa ozi l'ulo-ekwa-ndzuko. ¹⁶Ọo ephebedua g'ephe hakoṭa be e shi le ndu Ízurelu hoto ye mu l'eka. Mu nata phe; mee phe; ephe buru nkemu; nochia enya ndu bu okpara l'ali Ízurelu; mbu iphe, bukota unwoke mbu, vu uzo waa ekpa-nwa l'ali Ízurelu. ¹⁷Iphe, bu okpara l'ophu l'ali Ízurelu; nemadzu-o; me anu be bukota nkemu. Le teke ono, mu gbushikotaru iphe, bu okpara l'ali Ijiputu be mu doberu phe iche g'ephe buru nkemu. ¹⁸Nta-a be mu wowaru ndu Lívayi mee; ephe nochia enya ndu bu okpara l'ali Ízurelu l'ophu. ¹⁹Mbu le mu shi waa l'echilabo ndu Ízurelu l'ophu hoto ndu Lívayi woru ye Eronu yele unwu iya l'eka; g'ephe jejeru ndu Ízurelu ozi l'ulo-ekwa-ndzuko; ephe apfuje ugwo iphe-aji unwu Ízurelu; k'ophu mgbu-onwu ete egbudu phe m'ephe jekube ulo Chipfu ono ntse.”

²⁰Mosisu; waa Eronu; me iphe, bu ndu Ízurelu l'ophu bya emeeru ndu Lívayi egube ono, Chipfu turu iya Mosisu lekemu su g'e mee ndu Lívayi. Ọ buru ge ndu Ízurelu meru phe iya bu ono. ²¹Ndu Lívayi be safuru onwophe nturu; bya asaa uwe phe asasa. Ọo ya bu; Eronu woru phe nu Chipfu g'ephe du ge ngweja amama; bya apfua ugwo iphe-aji phe shi nno safu phe nturu. ²²E mechaa; ndu Lívayi nodu Eronu yele unwu iya l'eka wata eje ozi l'ulo-ekwa-ndzuko. Ọ buru ge Chipfu gude turu iya Mosisu lekemu bu g'ephe meru ndu Lívayi ono.

²³Chipfu bya asu Mosisu: ²⁴“Iphe-a be bu ndu Lívayi be o duru: Unwoke nowaru a -gbẹ l'ukporo apha l'apha ise kwaseru be a-wataje eje ozi l'ulo-ekwa-ndzuko. ²⁵Ephe -nowa ukporo apha labo l'apha iri; ephe ahaa eje ozi l'ulo-ekwa-ndzuko ono; ephe te ejebaedu iya. ²⁶Ọle o -buru l'o du phe g'ephe yejeru unwunna phe ẹka l'ozi ulo-ekwa-ndzuko ono; g'ephe yekporo ẹka. Obenu l'ephebedua l'onwophe be l'e-jebuhu ozi. Noo g'ii-shi nu ndu Lívayi ozi, ephe a-noduje eje bu ono.”

Ọbo Ojaghata

9 ¹L'onwa mbu l'apha, kwe ndu Ízurelu apha labo, ephe shi l'ali Ijiputu lufuta be Chipfu pfuru yeru Mosisu l'echiegu Sayinayi su iya: ²“Ge

ndu Ízurelu bokwaa obo Ojegahata teke a boje iya. ³Onwa-a -duɛpho l'abalì iri l'eno; unu boɔ obo Ojegahata ono teke a boje iya. Teke unu a-wata iya abobo be bu me ɛnyanwu ribajeepho. Unu boɔ iphe ono g'ekemu iya gude du waa ge nsɔ iya gude du.” ⁴Oo ya bu; Mòsisu bya epfuaru ndu Izurelu g'ephe boɔ obo Ojegahata ono. ⁵Ephe woru obo Ojegahata ono boɔ l'echiegu Sayinayi g'onwa mbu ono du l'abalì iri l'eno; g'ɛnyanwu abyawaa ariba. Ephe tuko iphemiphe mekota ge Chipfu suru Mòsisu g'emeje iya.

⁶Ole o nwekwanuru ndu ophu ayidu le ndu boru obo Ojegahata ono mboku ono. Ishi iya bu l'ephe turwuru onwophe kele ephe denyiru onye nwuhuru anwuhu aka. Ndu ono byapfuta Mòsisu yele Eronu le mboku ono; ⁷bya asu Mòsisu: “Nta-a be nturuwu du anyi l'ehu kele anyi denyiru onye nwuhuru anwuhu aka. Ole-a; ?denu g'o gude ophu e te ekwedu g'anyi tsoru ndu Ízurelu ophuna nu Chipfu ngweja teke a nuje iya?”

⁸Mòsisu su phe: “Unu ngabe; ge mu maru iphe, Chipfu l'e-pfu l'opfu ehunu.”

⁹Toɓudu iya bu; Chipfu su Mòsisu: ¹⁰“Pfuaru ndu Ízurelu su phe: O -nweru onye shi l'ime unu; ozoo l'onye obu bu oshilokpa unu, denyiru aka lodzu; shi nno turwua onwiya; ozoo l'onye obu jeru aka du enya enya; g'onye ono bolekwaa-a obo Ojegahata ke Chipfu ono. ¹¹Teke ephe a-bo iya be bu l'abalì iri l'eno l'onwa k'ebo iya; me ɛnyanwu ribajeepho. Iphe, ephe e-gude boɔ ya bu: buredi, ekoduru ekoko; waa mkpeekwo, atsogbaa ilu. ¹²G'o to dukwa iphe ono ophu ephe a-ha g'o boɔ nchi; ophu o dukwa okpu iya, ephe a-nyakwo anyakwo. Oo g'ekemu obo Ojegahata ono dukota bu g'ephe e-gude boɔ ya. ¹³Ole onye nturuwu adudu l'ehu; ophu o jeduru iphe; ophu onye obu aboduru obo Ojegahata ono be ee-bufu l'echilabo ndibe phe; noo kele o to nuduru Chipfu ngweja iya teke a turu onu iya. Onye ono be iphe-ɛji, o meru a-tukoru l'ishi.

¹⁴“Onye lwaru alwalwa; unu l'iya buru; o -du iya g'o tsoru unu boɔ obo Ojegahata ke Chipfu ono; g'onye obu mekwaa ya g'ekemu iya; waa nsɔ iya gude du. Oo nsɔ lanu be duru onye a nwuru anwunwu l'ali-a waa onye lwaru alwalwa.”

**Urwukpu aso-kputa
ulo-ekwa Chileke
(Awu 40:34-38)**

¹⁵Mboku ono, a kpoberu ulo-ekwa Chipfu, bu iya bu ulo-ekwa, aka eedo-beje ekwo ekemu Chipfu ono; be urwukpu so-kputeru iya. Luzenyashi be urwukpu ono duɛpho g'oku l'eli ulo-ekwa ono; duɛpho nno jasɔ l'utsu. ¹⁶O buɛrupho g'o du kwaseru bu ono. Leswe be urwukpu ono aso-kputaje ulo-ekwa Chipfu ono; o -be l'enyashi; l'o nwua ke phoo g'oku. ¹⁷O nodu abujeru teke urwukpu ono shi l'eli ulo-ekwa ono palihu imeli imeli; ndu Ízurelu awulihu tugbua ije phe. Eka ephe jeberu; urwukpu ono keshiru; ephe akpobe

ulo-ekwa phe l'eka ono; noshia. ¹⁸Ọ nọdu abujeru Chipfu -sụ ndu Ízurelu g'ephe wu-lihu tugbua; ephe awufu tugbua. Teke ọ bụ l'ọ sụru phe g'ephe nọdu; ephe akpobe ulo-ekwa phe noshia. Ọ bụru g'urwukpu ono nọ-beru l'eli ulo-ekwa Chipfu ono bụ g'ephe anọ-bejeru l'eka ephe kpoberu ulo-ekwa phe ono. ¹⁹Teke urwukpu ono nọru ọdu l'eli ulo-ekwa Chileke ono; ndu Ízurelu emeepho ge Chipfu pfuru phe; nopyabe; ephe ta atugbudu. ²⁰Teke ọ bụ l'urwukpu ono nọru l'eli ulo-ekwa Chipfu ono; nọo ya nwujiku olemole; be bụ Chipfu -sụ g'ephe nọdu; ephe akpobe ulo-ekwa phe noshia. Teke ọ sụru phe g'ephe wu-lihu tugbua; ephe awufu tugbua. ²¹Teke ọ bụ l'urwukpu ono nọru shita l'uzenyashi jasụ l'utsu; o -rwua l'utsu ọ palihu imeli imeli; ephe awufu tugbua. Obetapqoo ọ bụru l'eswe be urwukpu ono palihuru imeli; ozoo l'enyasi; be buepho teke ọ palihuru be ndu Ízurelu awufuje tugbua. ²²Obetapqoo urwukpu ono nọdu l'eli ulo-ekwa Chipfu ono nọo ya abali labo; ozoo nọo ya onwa ophu; ozoo l'oo apha ophu; be ndu Ízurelu a-nodujeepho l'eka ephe kpoberu ulo-ekwa phe g'ephe nọ iya; ophu ephe ta abyadu atugbu atugbu. Obenu le teke a nonyaaru urwukpu ono palihu imeli; ephe awufu tugbua. ²³Ọ nọdu abujeru; Chipfu -sụ phe g'ephe nọdu; ephe akpobe ulo-ekwa phe noshia. Teke ọ sụru phe g'ephe tugbua; ephe awufu tugbua. Iphemiphe, Chipfu pfuru phe be ephe mekotaru egube ọ turu iya Mosisu lekemu.

Opu labo, e meru le mkpola-ochaa

10 ¹Chipfu sụ Mosisu: ²“Gude mkpola-ochaa, e tsusaru etsusa meta opu labo; k'ophu ii-gudeje iya eku ndu Ízurelu g'ephe dzukobe; gudejekwa iya pho karu phe teke ephe a-phutaje ulo-ekwa phe tugbua. ³Teke a tukoru opu labo ono gbua be bụ iphe, oopfu bụ g'iphe, bụ ndu Ízurelu l'ophu dzukobe l'iphu ngu l'onu ulo-ekwa-ndzuko. ⁴Ọ -buru l'oo opu lanu kpoloko be e gburu; iphe, oopfu bụ g'iphe, bụ ndu-ishi dzukobekota l'atatiphu ngu; mbu ndu bu-gbaa ishi ipfu ipfu ndu Ízurelu. ⁵Teke opu ono daru ugbo lanu; iphe, oopfu bụ g'iphe, bụ ipfu, kpoberu ulo-ekwa phe l'uzo enyanwu-awawa wulihu tugbua. ⁶Teke i gburu opu ono k'ugbo ebo; ge ndu ophu kpoberu ulo-ekwa nkephe l'uzo ndohali wulihu tugbua. Ee-gbuje opu ono g'ọ gbaje ama teke ephe a-wufu tugbua. ⁷Unu -byaepho eku edzudzu-oha g'ephe dzukobe; unu egbua opu ono; ole oo g'ọ to dashi g'ophu e gude agba ama. ⁸Ọo unwu Eronu, bụ iya bụ ndu-uke Chileke be e-gbuje opu ono. Ọo-buru omelali, a-duru unu jasuru asuru; e -shi l'ogbo sweru ogbo. ⁹Teke ọ bụ l'unu eje etso ndu ohogu unu ogu l'ali unu; mbu ndu akpa unu ehụ; unu gbua opu ono g'ọ dashia oda ike; k'ophu Chipfu, bụ Chileke unu a-nyata unu; bya adzota unu l'eka ndu ohogu unu ono. ¹⁰No-kwapo g'unu e-gbuje opu me ehụ nọdu atso unu; me teke unu abo obo-iphe, unu abojegbaa; me teke unu abo iphe k'onwa ophuu^a unu; unu -gwechaepho

^a 10:10 Obo-iphe-a be ndu Ízurelu aboje ujiku ophu teke onwa ophuu furu. Huma g'ephe emeje iya le Ógú 28:18.

ngweja-akpo-oku; me ngweja-ehu-guu ono, unu egweje ono; unu egburu opu ye iya; k'ophu Chileke e-gude iya nyata unu. Oo mbedua bu Chipfu, bu Chileke unu."

Ndu Ízurelu awufu l'echiegu Sayinayi

¹¹O be le g'onwa k'ebo du l'ukporo abali; l'apha k'ebo iya; urwukpu ono shi l'eli ulo-ekwa Chipfu ono, bu eka ekwo ekemu aduje ono palia ime-li imeli. ¹²Tobudu iya bu; ndu Ízurelu bya eshi l'echiegu Sayinayi ono; o buru phe atugbu. Epe jee jasul'echiegu Paranu, bu eka urwukpu ono jeburu keshiru.

¹³Onoya bu ke mbu, epe tugburu ije phe ono; egube ono, Chipfu turu iya Mosisu l'ekemu. ¹⁴O buru ipfu Jiuda be vutaru uzo ije ono. Epe dzebe l'okpa l'okpa; paru ekwa-ohubama ipfu phe wuru tugbu. O buru Nashonu nwa Aminadabu be bu onye-ishi ipfu Jiuda ono. ¹⁵Netanelu nwa Zuwa buru onye-ishi ipfu Isaka; ¹⁶Eliyabu nwa Helonu buru onye-ishi ipfu Zebulonu.

¹⁷Oo ya bu; a pho-tsuta ulo-ekwa Chipfu ono; oshilokpa Geshonu; me oshilokpa Merari pata iya; o buru phe atugbu.

¹⁸Ipfu ozo, l'etsota l'atugbu ono be bu ndu ipfu ke Rubenu. Epe dzebekwapho l'okpa l'okpa; gude ekwa-ohubama ipfu phe wuru tugbu. O buru Elizuru nwa Shediyo bu onye-ishi ipfu Rubenu ono. ¹⁹Shelumelu nwa Zurishadayi buru onye-ishi ndu ipfu Simiyonu; ²⁰Eliyasafu nwa Diyuwelu buru onye-ishi ipfu Gadu.

²¹Tobudu iya bu; ndu Kohatu vuta iphe, du nsu ono gude tugbushia. Epe jerwushia; a kpobewa nu ulo-ekwa Chipfu.

²²Ipfu ozo, l'etsota phe nu buru ndu Ifuremu. Ipfu ozo, l'etsota l'atugbu ono be bu ndu ipfu ke Rubenu. Epe dzebekwapho l'okpa l'okpa; gude ekwa-ohubama ipfu phe wuru tugbu. O buru Elishama nwa Amihudu bu onye-ishi ndu ipfu Ifuremu ono. ²³Gamalelu nwa Pedazo buru onye-ishi ndu ipfu Manase; ²⁴Abidanu nwa Gidiyoni buru onye-ishi ndu ipfu Benjaminu.

²⁵Ipfu ozo, l'etsota nu; bya aburu ipfu ophu ekpejeru azu l'ije ono buru ndu Danu. Ipfu ozo, l'etsota l'atugbu ono be bu ndu ipfu ke Rubenu. Epebedua dzebekwapho l'okpa l'okpa; gude ekwa-ohubama ipfu phe wuru tugbu. O buru Ahiyeza nwa Amishadayi bu onye-ishi ipfu Danu ono. ²⁶Page lu nwa Okuranu buru onye-ishi ipfu Asha. ²⁷Ahira nwa Enanu buru onye-ishi ipfu Nafutali. ²⁸Noo ge ndu Ízurelu edzebeje l'okpa l'okpa wufu m'ephe gbeshi ije phe bu ono.

²⁹Mosisu bya epfuaru Hobabu nwa Ruwelu, bu onye Midiyanu; bya aburu ogo iya su iya: "Nta-a be anyi atugbuwa ala ali eka ono, Chipfu pfuru anyi l'oo-nu anyi ono. Tsonuru anyi g'anyi je. Anyi e-mekwaru ngu ree; kele Chipfu kweshikwaru ndu Ízurelu ukwe-iphe, dugbaa ree."

³⁰Hobabu sù iya waawaa; lẹ ya te etsoduru phẹ; lẹ ya alaphuwa azu l'alì iya; lapfu ndu ephe l'iya bu.

³¹Obenu lẹ Mósìsù sùru iya: “Jiko ta ahashìnu anyi. Eshinu oḅu ngu maru ẹka anyi a-kpọbeje ọ̀lo-ẹkwa anyi l'echiegu-a; nọdunu g'ì bọru ẹnya, anyi gude aphu ọ̀zo. ³²I -tsoru anyi bẹ anyi lẹ ngu a-gbaru mgba l'iphe, bụkpoo iphe-oma, Chipfu e-mekotaru anyi.”

Okpoko Chileke waa urwukpu

³³Noo ya; ephe shi l'úbvú Chipfu ono tųgbua; jee ije abalì ẹto. Okpoko oḅbandzu Chipfu vuta ọ̀zo l'ime abalì ẹto ono; g'ọ chotaru phẹ ẹka ephe a-nọdu tuta unme. ³⁴O nọdu abujeru; o -beepho l'eswe; urwukpu, shi l'ẹka Chipfu nọ abya atukoru phẹ l'ishi; mbu teke ono, ephe shi l'ẹka ephe kpọberu ọ̀lo-ẹkwa phẹ tųgbua ono.

³⁵Teke e vutaerupho okpoko ono tųgbua; Mósìsù asu: “Zilìhunú gube Chipfu. Gẹ ndu oḅogu ngu gbakashihukwa nanu nanu. Gẹ ndu ono, i du ashì shikwa ngu l'iphu gbalachaa.” ³⁶Teke a pazetaru okpoko ono; Mósìsù asu: “Lwaphuta azu gube Chipfu; lwapfuta unu-kuru-unu ndu Ízurelu-a.”

Oku, shi l'ẹka Chipfu

11 ¹Tọbodu iya bu; ndu Ízurelu wata akọ photophoto epfu l'ephe eje iphe-ehuka. Photophoto ono, ephe akọ ono bya erwua Chipfu lẹ nchi; ehu ghuaaha ya egu. Oku shinu l'ẹka Chipfu bya ekegbushikota ndu Ízurelu ndu oḅu kpọberu ọ̀lo-ẹkwa phẹ l'ọzo ishi ishi. ²Ndu Ízurelu bya araku Mósìsù; o pfuru nu Chipfu; oku ono nyishihu. ³Oo ya bu; e kuahaa epha ẹka ono Tabera, bu iya bu “oku-ekeke”; kele oku, shi l'ẹka Chipfu bya ekegbushia phẹ.

Nri, bu Mana

⁴Ikpoto ndu ono, ephe lẹ ndu Ízurelu gwaru ogwaramogwa, bu ndu tsoru phẹ nu g'ephe gbeshiru ije ono; wata eze nzeri nri. Ndu Ízurelu watanu ara ẹkwa ozo su: “?Bu onye a-nukpo anyi anu g'anyi taa? ⁵Anyi nyataru teke anyi shi anọduje ata anu ema l'alì Ijiputu; anyi ta apfudu ugwo; teke ono bẹ anyi shi anọduje eri ata kukumba; bya eri ashì; eri liku; me alibasa; waa galiku. ⁶Ole nta-a bẹ o to duedu iphe, agukwadu anyi egu; oḅu o dudu iphe, anyi ahumaje ria; gbahaa mana-a!”

⁷Nri ono, bu mana bẹ ugbugba iya du g'akpuru koriyanda. I -lee ya ẹnya; lo nyaku anyaku; eshi mkpo getse bedelomu. ⁸Ndu Ízurelu nọdu ejeje ekpokoo ya; gwee ya egwegwe; ozo tsua ya etsutsu likwe. Ephe ahajeru shia ya eshishi; haru ghee ya egheghe. Onoduje atso g'iphe, e gude manu olivu ghee. ⁹Teke mana ono adajeru phẹ bu teke iji daahaerupho l'ẹka ephe kpọberu ọ̀lo-ẹkwa phẹ lenyashi.

Mósìsù edoru Chipfu edo

¹⁰Mósìsù bya anuma gẹ ndu Ízurelu wushigbaaru l'onu ọ̀lo-ẹkwa phẹ aragbaa ẹkwa; onyenonu tukọ nọdugbaa l'onulo l'onulo akwa ntumatu;

ẹhu ọdu egbu Chipfu egbu eghushikpoo ya ya ike. Ọ tsuaha Mosisu l'ẹhu. ¹¹Noo ya; Mosisu jiahaa Chipfu sù iya: “?Denu g'o gude ọ buru mube onye-ozu ngu be i meru g'egube iphe-ehuka owa-a dapfuta? ?Bu le mu ta adudu ngu l'obu meru g'o gude i paru ivu ẹhu ndu-a l'ophu bo mu? ¹²?Bu mbɛdua be yeru ime ndu-a g'ephe ha; ọo mu nwushiru phe; meru g'o gude i sù ge mu heru phe l'utapfu ge nna he nwa iya, angukwadu era. Ge mu heru phe nno jasù l'alì ono, i riburu nna phe oche nte l'ìi-nu phe ono. ¹³?Bu awe be mu a-huma anu, mu a-nugbabe ndu-a; g'ephe echiru mu mkpu owa-a, ephe echi-a; sù g'a nu phe anu g'ephe taa! ¹⁴Mu taa dukwa ike ehekota ndu-a nwekini mu; ivu ẹhu phe anyi-gbukwa mu anyi-gbu. ¹⁵Ọ -buru l'oo egube-a be ii-mee mu iya; gbuchikwa mu egbu-gbu nta; m'ọ -buru le mu du ngu-a l'obu; ge mu ta anodukwanu ndzu gude enya huma ejo onodu mu.”

¹⁶Chipfu bya eyeeru Mosisu onu sù iya: “Chita ndu bu ogerenya Ízuru ọmadzu ukporo eto l'iri g'ephe byapfuta mu; mbu ndu i huberu ama l'ephe bupho ndu bu ogerenya; buru ndu-ishi phe. Chita phe ge gu l'ephe tuko bya apfuru l'ulo-ekwa-ndzuko. ¹⁷Mu e-nyizeta byapfuta ngu l'eka ono; mu le ngu epfugba opfu; mu aharu unme, du ngu l'ehu habota woru ye ndu ono l'ehu nkephe; k'ophu ephe e-yeta eka vubude ngu ivu ono; g'i ti vuhẹ iya nwekini ngu. ¹⁸Pfuaru ndu Ízuru g'ephe dobe onwophe iche kwaberu echele; l'o -rwua echele be ephe a-ta anu; kele mube Chipfu numawaru ekwa ono, ephe ara sù: ‘?Bu onye a-nu anyi anu g'anyi taa? Teke anyi shi ọdu le Ijiputu be shikwa karu anyi le ree.’ Nta-a be Chipfu a-nu unu anu g'unu taa. ¹⁹Anu ono be unu ta atagbudu l'ujiku lanu; ophu unu atagbudu iya l'ujiku labo; ozoo l'ime ujiku ise; ozoo l'ime ujiku iri; ozoo l'ime ujiku ukporo. ²⁰Unu a-ta anu ono onwa ophu; taa ya jasù l'o bushihu unu l'imi; mbu jasù ọo-tushihu unu ayi; noo kele unu jikaru Chipfu, bu onye swiru unu; mbu raru ekwa kpua ya sù: ‘?Bu gunu meru g'o gude anyi shi l'alì Ijiputu futa?’ ”

²¹Tobudu iya bu; Mosisu sù Chipfu: “I humanuaru-a l'oo ukporo unu nemadzu mgbo ukporo eto; l'ukporo unu nemadzu iri l'ise be mu l'ephe gude okpa eje egube-a. Ọ buru phe be i suru l'ìi-nu anu, ephe a-ta onwa ophu. ²²E -gbushigbua aturu me eswi; ?bu g'o dzuru phe? Mbù-a; ?bu g'o dzuru phe obetakpoo e gbushikotaru phe ema, nokota l'eze-enyimu?”

²³Chipfu sù Mosisu: “?Bu l'eka mu ta asudu iya ememe ọo? Nta-a be i-huma; iphe, mu suru l'oo-meru ngu; ?oo-me ọo too medu?”

Ndu bu ogerenya Ízuru epfuchiru Chileke

²⁴Noo ya; Mosisu bya alufu je akaru ndu Ízuru iphe, Chipfu pfuru. Ọ chita ndu bu ogerenya ukporo eto l'iri ono; ephe bya apfu-pee ulo-ekwa Chileke mgburugburu. ²⁵Ọo ya bu; Chipfu gude urwukpu nyizeta bya epfuru yeru Mosisu; haru unme, du Mosisu l'ehu habota woru ye ndu bu

ogerenya ụkporo ẹto l'iri ono l'ehu. Unme ono byaẹ phe phọ l'ehu; ephe wata epfuchiru Chileke teke ono; obenu l'ephe te epfuchibaeduru iya ozobaa.

²⁶Ọle o nweru ụmadzu labọ ozo, nọpyaberu l'ulo-ekwa phe. Epha onye lanu bu Eludadu; epha onye ophuu buru Medadu. Ephe yi le ndu bu ogerenya ono, e deru epha phe ono; ọle ephe te ejeduru l'ulo-ekwa Chileke ono. Obenu le Unme Chileke byaleru-a bya eji ephedua ehu; ephe nodu l'ulo-ekwa phe ono; pfuchiahaaru Chileke. ²⁷Nwata nwokoro lanu gbagbua je asu Mosisu: “Eludadu yele Medadu nokwa l'eka a kporu ulo-ekwa epfuchiru Chileke.”

²⁸Jioshuwa nwa Nunu, bu onye shi teke o bu nwata jetaru Mosisu ozi tufuekwapho onu su: “Nnajiuphu mu, bu Mosisu; pfunuru phe g'ephe do-be onu doo.”

²⁹Mosisu su iya: “?Bu odzori be igbaru mu egube ono too? O gege adu mu ree; o -bu l'oo ge ndu ke Chipfu g'ephe ha gbẹ bukotar ndu mpfuchiru; mbu ge Chipfu gbẹ yekota phe Unme nkiya l'ehu.” ³⁰E mecha; Mosisu me ndu bu ogerenya Izurelu ono laphu azu l'eka ephe kporu ulo-ekwa phe.

Chipfu woru okwa mee anu atata

³¹Noo ya; pherephere bya eshi l'eka Chipfu no ziahaa; o shi leze-enyimu chikashia okwa; ephe bya adabyigbaaru le mgboru eka ephe kporu ulo-ekwa phe ono. Ephe tuko eka ono g'o ha dzuru rwua iphe, ha g'eka nemadzu a-du ike jee l'okpa ujiku ophu. G'ephe epheberu l'eli be bu iphe, rwuru ntụ-okpa ẹto me a -gbẹ l'omali. ³²Mboku ono l'ophu; me enyashi ono l'ophu; mekwapho nchitabohu iya be ephe tsoru je anwuko okwa ono. Onye nwutanukaru nwanshi be nwu-jiru gbamugbamu-nkweka ukporo ise. Ephe woru iya kpsaaruru onwophe; o tuko eka ono, ephe kporu ulo-ekwa phe ono dzuru mgburugburu. ³³Ephe kpukwaduru-a anu okwa ono l'onu ata; mbu l'ephe teke atagbudu iya; Chipfu watawaa phe atu-koshi oke ehu-eghu iya. O loru ejo mgbu-onwu tu phe. ³⁴Oo ya bu; e kuahaa eka ono Kiburotu-Hatava, bu iya bu “ochieja ndu ekpiri”; kele oo l'eka ono be e liru iphe, bu ndu ono, meru ekpiri ono.

³⁵Ephe shi le Kiburotu-Hatava l'eka ono wufu; je adoru le Hazerotu.

Miriyamu yele Eronu etso Mosisu opfu

12 ¹Tobudu iya bu; Miriyamu yele Eronu wata epfubyishi Mosisu le ke nwanyi Kushi, o luru. Noo kele Mosisu lutakwanuru onye Kushi. ²Ephe su: “?Bu Mosisu kpoloko be Chipfu eshije l'onu iya pfua opfu? ?To shijedu l'onu k'anyi bedua pfukwapho opfu?” Chipfu numanu iphe ono, ephe pfuru ono. ³Su-a; nwoke ono, bu Mosisu be bunukaru onye eme odoo. Oo ya kachakpo eme odoo l'iphe, bu ndu mgboko l'ophu.

⁴G'e jia epfu; Chipfu pfuaru Mósísu; waa Erõnu; me Miriyamu sù phe: “Unu n'eto tũko fũta byakõta l'ũlo-ekwa-ndzukõ.” Ephe n'eto ono bya afũta tũgbua jeshia. ⁵Qo ya bũ; Chipfu nõdu l'urwukpu, kpũru oronmono nyizeta bya apfũru l'õnu ùlo-ekwa-ndzukõ ono; bya ekua Erõnu yele Miriyamu oku; ephe kpĩritaru. ⁶Chipfu sù phe: “Unu ngabe nchi nũma iphe, mu epfuru unu: Qobujeru; onye mpfuchiru Chipfu -nõdu l'echilabo unu; mũbe Chipfu egoshi iya onwomu l'ophulenyã; bya epfuru yeru iya lẹ nrwo. ⁷Obenu l'õ tõ dũdu nno l'ẹhu onye-ozí mu, bũ Mósísu. Yẹbedua bẹ mu yekõtãru ndibe mu l'ophu l'ẹka. ⁸Tẹme mu l'iya nõdu abõgbaje ulla l'iphu l'iphu; mbũ l'anyi l'epfufe opfu doru ẹnya yeru onwanyí; ọ tõ bũdu ẹtu-opfu. Qohumaje gẹ mũbe Chipfu gbaru ugbugba. Qo ya bũ; ?bũ gũnu meru g'õ gude ọphu unu atsũdu ebvu; unu nõdu epfutõshi onye-ozí mu ono, bũ Mósísu?”

⁹Chipfu tukoshi phe ẹhu-eghu iya; bya abũru iya atũgbu. ¹⁰Urwukpu ono shiẹpho l'eli ùlo-ekwa ono palia imeli imeli; a bya l'amarũ; ekpenta nmawaa Miriyamu swõkoswoko. Ẹhu चाहृye ya phõ kẹ roboo. Erõnu bya elee Miriyamu ẹnya bya ahũma g'ekpenta tũkoru iya ẹhu sweta. ¹¹Erõnu sù Mósísu: “Oowaa nnajiũphu mu; ba nũshinu anyi aphũ l'õo l'anyi gude eme eswe mee iphe-ẹjí. ¹²Te ekweshinũ gẹ nwanyí-a चाहृ roboo gẹ nwata, byaru l'afũta l'ẹpho ne iya; ọ nwũhuwaa anwũhu; ibe ẹhu iya rekashĩhuwa erekashĩ.”

¹³Tõbudu iya bũ; Mósísu bya araku Chipfu sù: “Jiko gũbe Chileke; me-naa ya g'õ wekõrohu!”

¹⁴Chipfu sù Mósísu: “Ọ -bũ lẹ nna nwanyí-a vũru õnu-mini kpua ya l'iphu; ?iphere iya tege adũdu abalĩ ẹsaa tõ? Nwuru iya ye l'azũ ẹka ono, a kpõru ùlo-ekwa gũ-buru iya ye g'õ nõo ujiku ẹsaa; ọ -nõ-chaẹpho ujiku ẹsaa ono; l'e duphuta iya azũ.” ¹⁵Tõbudu iya bũ; a bya enwufu Miriyamu gũ-buru iya ye l'azũ ẹka ono, ephe kpõberu ùlo-ekwa phe ono; ọ nõo ujiku ẹsaa. Ọphu ndu Ízurelu agbẹshiduru ije jeye teke e duphutaru iya azũ. ¹⁶E mechaa; ephe shi lẹ Hazerotu l'ẹka ono lũfu je akpõbe ùlo-ekwa phe l'echięgu Paranu.

Anwũ ngge l'alĩ Kėnanu

(Dit 1:19-33)

13 ¹Chipfu sù Mósísu: ²“Yefũ ndu e-je alĩ Kėnanu je anwũya ya ngge; mbũ alĩ ono, mu eme gẹ mu nũ ndu Ízurelu ono. Shi l'ipfu l'ipfu, bũ ipfu ndiche phe hõtachaa onye lanũ, e-je nũ. Ndu ỳi-hota bẹ bũ unwoke, bũgbaa ishi l'ipfu, nõnu.” ³Mósísu bya ahõo phe egube ono, Chipfu pfuru ono; bya ezia phe sù g'ẹphe shi l'echięgu Paranu tũgbua jeshia. Ndu ono, o ziru ozi ono bũkotaerupho ndu-ishi ndu Ízurelu.

⁴Qwaa bẹ bũ ẹpha phe:

Onye shi l'ipfu Rúbenu bũ Shamuwa nwa Zaku;

- 5 onye shi l'ipfu Simiyonu buru Shafatu nwa Hõru;
 6 onye shi l'ipfu Jiuda buru Kalẹbu nwa Jiefune;
 7 onye shi l'ipfu Isaka buru Igalu nwa Jiõsefu;
 8 onye shi l'ipfu Ifuremu buru Hosiya nwa Nunu;
 9 onye shi l'ipfu Benjaminu buru Paliti nwa Rafu;
 10 onye shi l'ipfu Zebulun buru Gadiyelu nwa Sodi;
 11 onye shi l'ipfu Manase, bu iya bu ipfu Jiõsefu be bu Gadi nwa Susi;
 12 onye shi l'ipfu Danu buru Amiyelu nwa Gemali;
 13 onye shi l'ipfu Asha buru Seturu nwa Mayikelu;
 14 onye shi l'ipfu Nafutali buru Nahubi nwa Vofusi;
 15 onye shi l'ipfu Gadu buru Geyuwelu nwa Maki.

16 Noo epha unwoke ono, Mõsisu yeru g'ephe je anwua ngge l'alì Kėnanu bu ono. Mõsisu woru Hosiya nwa Nunu gube Jioshuwa.

17 Mõsisu bya ezia phe g'ephe jeshia ngge l'alì Kėnanu su phe: "Unu tso-
 ru echięgu ndõhali bahu l'alì úbvú úbvú ęka ono. 18 Unu je ahuma g'alì
 ono gbaru; me ge ndu bu iya nu du. Unu maru ?okpehu du phe; to ?ephe
 rwuhuru arwuhu? ?Ephe ha lotu; to ?ephe habe ahabe? 19 Unu maru ?bu
 alì, du ree; to alì, du eji? Unu maru mkpukpu, ephe bugbaa: ?bu mkpu-
 kpu, a ta kpu-pheduru igbulu mgburugburu; to mkpukpu, a kpushiru
 ike? 20 Unu amaru g'alì phe du. Unu maru ?bu alì emehuje iphe, e meberu
 iya; to ejo alì? Unu amaru ?oshi du iya; to ?oshi ta adudu iya? G'obu
 shihukwa unu ike. Unu egude akpuru oshi, shi l'alì ono lwa." Teke ono be
 bu teke akpuru vayinu mbu anõduje achashigbaa.

21 Noo ya; ephe tugbaa jeshia je anwukota alì ono ngge; shita l'echięgu
 Zinu je akpaa le Rehobu; me a -nõdu eje Hamatu. 22 Ephe tsoru echi-
 ęgu ndõhali ono jeye ephe rwua mkpukpu Hėburonu, bu ęka Ahimanu;
 me Sheshayi; me Talumayi, bu ndu shi l'eri Anaku bu ebubu. (A kpuru
 mkpukpu Hėburonu; o nõdu apha ęsaa; temanu a kpu mkpukpu Zowanu
 õphu du l'alì Ijiputu.) 23 Ephe jerwuepho le nsuda Eshukolu; ephe gbu-
 kwota ękali vayinu lanu, akpuru wõpfuru awõpfuru. Umadzu labo l'ime
 phe pyokafu iya l'oshi, du ogologo paru; onye lanu paru iya l'ishi lanu;
 onye õphuu paru iya l'ishi lanu. Ephe wõkokwaapho akpuru itorokuma;
 me akpuru oshi figu wolata. 24 A gube ęka ono nsuda Eshukolu, bu iya bu
 "wõpfulaa"; kele o leka ono be ndu İzurelu gbukwotaru ękali vayinu,
 akpuru wõpfuru awõpfuru vulata.

25 Ephe nõru ukporo abalì ugbo labo g'ephe jeru anwu ngge l'alì ono;
 temanu ephe lwa. 26 Ephe bya alwapfuta Mõsisu me Eronu; waa ndu İzu-
 relu l'õphu l'echięgu Paranu, du le mkpukpu Kadeshi. Ephe bya edooru
 Mõsisu; me Eronu; waa ndu İzurelu l'õphu g'ephe jeru; bya egoshi phe
 akpuru oshi, shi l'alì ono. 27 Waa iphe, ephe pfuru Mõsisu baa: "Anyi
 jewaru je ahuma alì ono, i suru g'anyi je ahuma. Alì ono bu alì, mini ęra-
 eswi yee manu-ęnwu aso gborogboro. Waa akpuru oshi, shi l'alì ono baa.

²⁸Ọle ndu bu l'alì ono bẹ ọkphehu dọ; mkpukpu, dọ iya nọ hagbaa shii; bya aburu mkpukpu, e gude igbulọ kpọ-pee mgburugburu. Anyi hụma-charuro ndu shi l'eri Anaku l'ẹka ono. ²⁹Ndu Amaleku bẹ bu l'echiegu ndohali. Ndu Hetu; mẹ ndu Jiebusu; mẹ ndu Amọru buru l'alì úbvú úbvú ẹka ono; ndu kẹ Kénanu bua kùbẹ ẹhu l'eze-ẹnyimu; bukwarupho l'aguga ẹnyimu Jiódanu.”

³⁰Tọbudu iya bụ; Kalẹbu bya emee ndu Ízurelu daa jii l'iphu Mósisu; bya asụ phe: “Unu g'anyi je alwuta alì ono g'ọ buru nkanyi; noo kẹle anyi a-dụ ike lwuta iya.”

³¹Obenu lẹ ndu ono, ẹphe lẹ Kalẹbu swi je ije ono bẹ sụru: “Anyi ta adukwa ike eje adatso ndu ono ọgu; noo kẹle ẹphe kakwa anyibedua ọkphehu.” ³²Ọ buru ẹjọ nzi bẹ ẹphe byaru ezia ndu Ízurelu lẹ k'alì ono, ẹphe jeru anwua ngge ono sụ: “Alì ono, anyi jeru anwua ngge ono bẹ egbukwa ndu bu iya nọ mgbu-ọnwu. Teme ndu anyi hụmakotaru l'ẹka ono bukotaru ndu hagbaa kẹ phengara phengara. ³³Anyi hụmaru ndu gbaru oke mkparawa l'ẹka ono. (Oshilokpa Anaku ono bụ l'ẹhu ndu ono, gbaru oke mkparawa ono bẹ ẹphe shi futa.) Anyi dehucharu onwanyi edehu l'ẹnya dughbaa g'unwu ọgu; ọ buru g'anyi dọ ẹphebedua bụ ono.”

Jioshuwa yele Kalẹbu bẹ epfu l'alì Kénanu dọ ree

14 ¹Tọbudu iya bụ; ndu Ízurelu l'ophu rakota ẹkwa l'enyashi ono rashia ya ike. ²Ẹphe tuko g'ẹphe ha guru aphụ kpua Mósisu yele Eronu. Ẹphe nodu epfugbaa sụ: “O gege akakwaru anyi ree l'anyi nwushihuru l'alì Ijiputu; ọzoo l'echiegu-a! ³?Bụ gunu meru g'ọ gude Chipfu nodu eme g'ọ duru anyi je edobe l'alì ono g'ẹphe gbushia anyi? Unyomu anyi phe; mẹ unwegirima anyi phe bẹ a-bya aburu ndu a kpọtacharu lẹ ndzụ. ?To gege akaduru anyi ree g'anyi laphu azụ l'alì Ijiputu?” ⁴Ẹphe pfuaharu nwibe phe asuje: “G'anyi hota onye lanu; mee ya ishi g'ọ duru anyi laphu azụ l'alì Ijiputu.”

⁵Mósisu yele Eronu daa kpurumu l'atatiphu igwe-oha ndu Ízurelu ono l'ophu. ⁶Jioshuwa nwa Nunu; yee Kalẹbu nwa Jiefune, bụ ndu yi lẹ ndu jeru ngge l'alì Kénanu ono gude ẹhu-ẹghu lajashia uwe, ẹphe yeru l'ẹhu; ⁷akụ opfu ekpu edzudzu-oha Ízurelu ono sụ phe: “Alì ono, anyi jeru aghaphee bya anwua ya ngge ono bẹ bukwa alì, dushikpoo ree ike. ⁸Ọ -buru l'anyi dọ Chipfu ree bẹ oo-duru anyi bahụ l'alì ono; nọ iya anyi; kẹle alì ono bụ alì, mini ẹra-eswi waa manụ-ẹnwu asọ gborogboro. ⁹Iphe, dọ iya nọ kpoloko buẹpho g'unu te kwefuru Chipfu ike. Iphe ọzo buru g'unu ba tsushi ndu alì ono ebvu. Noo kẹle anyi e-ri phe gẹ nri. Ẹphe te nwedu onye egbobuta phe nọ; obenu l'anyibedua bẹ Chipfu swiru eswiru. G'anyi ba tsushinu phe ebvu.” ¹⁰Obenu l'iphe, bụ ndu Ízurelu ono g'ẹphe ha bẹ sụru g'a tų-gbushia phe lẹ mkpuma. Tọbudu iya bụ; ọdu-biribiri kẹ Chipfu bya enwuaru ndu Ízurelu g'ẹphe ha kẹ phoo l'ulo-ekwa-ndzuko ono.

Mósisu arwọ Chipfu l'iswi ẹhu ndu Ízurelu

¹¹ Chipfu bya asu Mósisu: “?Bụ teke ole bẹ ndu-a a-kpo-beru mu ẹbo l'afu-a? ?Bụkpoo teke ole bẹ ẹphe a-jika-beru ekweta nkemu; yekwaru iphe-ohumalenya ono, mu meshigbaberu l'eka ẹphe no ono? ¹² Mu e-gude ejo iphe-ememe gbushia phe; mee phe; ẹphe aburu mkpurupyata. Mu eworu gubedua mee l'i buru oha l'ophu; oha, paru eka apaa; bya aka okpehu eme l'ephebedua.”

¹³ Mósisu su Chipfu: “Oowaa! Ndu Ijiputu bẹ a-numakwa iya me i -mee ya nno. Nyatakwa l'i gude okpehu ngu dufuta ndu-a l'eka ndu Ijiputu ono. ¹⁴ Ẹphe e-pfukwaru iya ndu bu l'alì-a; kele ẹphe numakotawaru lẹ gube Chipfu swiru phe eswiru; numawa l'ẹphe egudeje ẹnya phe huma gube Chipfu; teme l'urwukpu nkengu bẹ anoduje phe l'eli; teme l'oobujeru; o -rwua l'eswe; l'i gude urwukpu, kpuru oronmono edu phe; o -rwua l'enyashi l'i gude oku, kpuru oronmono edukwa phe pho. ¹⁵ O -buru l'i gbushiru ndu-a l'ugbo lanu nta-a bẹ oha ono, numajewaru udu ngu ono bẹ a-sukwa: ¹⁶ ‘Lẹ gube Chipfu ta aduedu ike durwua phe l'alì ono, i kweru phe ukwe iya; ribua lẹ nte l'ii-nu phe ono; i woru phe gbushia l'echiegu.’ ¹⁷ Oo ya bu; gube Nnajiuphu; mu arwo ngu g'i goshinu l'i bu onye ike paru eka apaa; mbu egube ono, i pfujehawaru su: ¹⁸ ‘Chipfu bu onye ẹhu te eghujedu eghu egwegwa; bya aburu onye n-yemobu iya nyiberu anyibe; bya aburu onye aguje nvu l'iphe-eji; me l'emeswe, e mesweru iya. Obenu lo bukwapo onye ta ahajedu onye-ikpe nmaru ke mmanu. Oogwaje unwegirima ochi iphe-eji, ndu nwuru phe nu meru jasu l'ogbo k'eto rwua lẹ k'eno.’ ¹⁹ Iphe, mu arwo ngu bu g'i gudenu obu-imemini ngu ono, nyiberu anyibe ono garu ndu-a nvu l'ejo-iphe, ẹphe meru ngu; mbu egube ono, i shiro l'alì Ijiputu gutaru phe nvu byasu nta-a ono.”

²⁰ Chipfu bya asu Mósisu: “Mu gwaru phe nvu egube ono, i rworu. ²¹ Ole; eshinu mu no ndzu ge mu no iya-a; odu-biribiri nkemu sweta mgboko go swetaru iya-a; ²² bẹ ndu-a, gudewaa ẹnya phe huma odu-biribiri mu-a; me iphe-ohumalenya ono, mu meshiru l'alì Ijiputu ono; me ophu mu meshiru l'echiegu; mbu ndu ono, mecharu dale mu adale mgbo iri ono; ophu ẹphe angaduru mu nchi ono; ²³ bẹ o to dudu onye ophu byaru egude ẹnya huma ali ono, mu riburu lẹ nte kwe nna phe ukwe iya ono. Ophu o to dudu iphe, bu ndu ono, kpuru mu ẹbo ẹbo l'afu ono, byaru ahuma iya nu. ²⁴ Ole a -bya l'ehu k'onnye-ozu mu ono, bu Kalebu; eshi ophu o bu onye obu iya gbaru iche; teme o buru onye gude obu iya go ha etso uzu nkemu bẹ mu e-duru iya bahu l'alì ono, o bahu je anwu ngge ono; o buru oshilokpa iya bẹ e-nweru ali ono. ²⁵ Oo ya bu; eshinu ndu Amaleku; me ndu Kėnanu bu lẹ nsuda nsuda; o -rwuepho echele; unu dakobe shia uzu echiegu ono, du l'uzu, e shi eje Eze-enyimu Uswe-uswe.”

Chipfu anu ndu Ízurelu aphu

(Dit 1:34-40)

²⁶ Chipfu bya asu Mósisu ye Eronu: ²⁷ “?Bụ teke ole bẹ ndu ejo-eme-me-a a-gunyaaru mu aphu gu-buhu? Mu numakotawaru aphu, ndu Ízurelu

nọ gushia kpua mu. ²⁸Unu karụ phẹ lẹ mụbe Chipfu sụru-a: ‘Eshinu mu nọ-a ndzụ gẹ mu nọ iya-a; bẹ mu a-tụkokpoo iphemiphe ono, mu nūmaru, unu pfushiru ono; mee unu. ²⁹Ọo l’echiẹgu-a bẹ odzu unu a-wūshiru; mbụ iphe, bụ ndu ono, nọwaru a -gbe l’ụkporo apha kwaseru ono; mbụ ndu a gūru ọgu teke aagu ọgu, bụ ndu ono, yị lẹ ndu ono, gūru ejo aphụ kpua mu ono. ³⁰Ọ tọ dudu m’onye lanụ l’ime unu bya a-bahụ l’alị ono, mu woli-ru ẹka mu imeli kweta lẹ mu a-nụ unu g’unu buru ono; gbahaephọ Kalẹbu nwa Jiefune; waa Jioshuwa nwa Nunu. ³¹Ọ buru unwegirima unu ono, unu sūru l’aa-kpụ lẹ ndzụ ono bẹ mu e-duru bahụ l’alị ono; g’ephẹ je amaru alị ono, unu jikaru ono. ³²A -bya l’unubedua; ọo l’oma echiẹgu-a bẹ odzu unu a-wūshiru. ³³Unwegirima unu bẹ a-nọdu awụ-phe l’oma echi-ẹgu-a gẹ ndu eche aturu; ghapee nno nọo ụkporo apha labọ sūgba ishi; jee iphe-ẹhuka k’ekwegekwe unu ono; gbiriri jasụ odzu unu akwashia l’oma echiẹgu ono. ³⁴Iphe, unu nọru teke unu jeru anwụ ngge l’alị ono bụ ụkporo abalị labọ. Ọ buru ụkporo apha labọ bẹ unu e-je iphe-ẹhuka ejo-ememe, unu meru ye iya. Ujiku lanụ anwūturu unu apha ophu. Ọo ya bụ g’unu a-makwanuru iphe, bụ lẹ mu bụ onye opfu unu. ³⁵Mụbe Chipfu bẹ pfuakwaru nkemu; mu mefutajekwa iphemiphe ono l’ehu ndu ejo-ememe ono; mbụ ndu ono, dokoberu etso mu opfu ono. Ephe a-tụko buru mkpuryata l’echiẹgu-a; mbụ l’o l’eka-a bẹ ephẹ a-tụko nwūshihukota.’ ”

³⁶Noo ya; iphe, bụ ndu ono, Mosisu yeru; ephẹ je anwua ngge l’alị ono, lwaru nụ bya atua ọnu alị ono lẹ njo ono; mbụ shi nno mee ndu Ízurelu gūru aphụ kpua Mosisu ono; ³⁷ndu ono, bụ phẹ turu ọnu alị eji eji ono bẹ ejo iphe-ememe gbushikotaru l’iphu Chipfu. ³⁸Ọ buru Jioshuwa nwa Nunu yele Kalẹbu nwa Jiefune bẹ bụ ndu phoduru nụ l’iphe, bụ ndu ono, jeru anwua ngge l’alị ono.

Aalwụ-gbu ndu Ízurelu lẹ Homa

(Dit 1:41-46)

³⁹Mosisu bya eworu iphe ono pfuaru ndu Ízurelu l’ophu; o rwua phẹ l’ehu; ephẹ kwatakpoo raa ẹkwa onwophe. ⁴⁰O -rwua l’onmewa utsu ophu etsota mbọku ono; ephẹ tūgbua jeshia l’alị úbvú úbvú Kénanu je anọdu asuje: “Anyi mewaru iphe-eji. Unu g’anyi wufukwa jeshia ẹka ono, Chipfu kweru anyi ukwe iya ono.”

⁴¹Mosisu sụ: “?Bụ gūnu meru iphe unu e-me g’unu mebyia iphe, ekemu Chipfu pfuru? Ọ tọ dukwaru unu lẹ ree! ⁴²Unu te ejekwa; kele Chipfu ta nọkwa swiru unu. Unu -jee bẹ ndu ohogu unu e-chigbushikwa unu; ⁴³nno kele ndu Amaleku mẹ ndu Kénanu bẹ nọ unu l’uzo atatiphu l’eka ono. Ephẹ e-gudekwa ogu-echi gbushikota unu. Chipfu te eswikwaru unu; kele unu gbakutawaru iya azu.”

⁴⁴Obenu l’ephẹ ta akpaduruo ishi; ephẹ tūgbua jeshia l’alị úbvú úbvú ono; ọle Mosisu waa okpoko oğbandzu Chipfu te tsodu phẹ lufu l’eka ono,

èphe kpọberu ọlọ-ẹkwa pẹ. ⁴⁵Tọbudu iya bụ; ndu Amalẹku mę ndu Ké-nanu, bu l'alị úbvù úbvù ono datso pẹ ọgu; lwu-kpee; chia pẹ jeye lẹ mkpụkpu Homa.

Ekemu, dụ lẹ ngweja, dụ iche iche

15 ¹Chipfu bya asụ Mósisu: ²“Waa iphe, ii-pfuru ndu Ízurelu baa: Unu -laẹpho alị ono, unu eje eburu ono, bụ alị ono, mu a-nụ unu ono; ³unu -gwejeepho ngweja nụ Chipfu; unu shi l'ikpoto ẹku unu họt a nụ gbua kpọo ọku gude gwee ngweja ọbu g'ọ bụru ngweja, mkpọ iya dụ Chipfu ree. Unu e-meje iya nno lẹ ngweja-akpọ-ọku; mę ngweja, e gude apfụ ukwe-iphe e kweru; mę teke unu anụ iphe, shi unu l'obu; ọzoo teke unu egwe ngweja ọbo-iphe. ⁴Onye wotaru ngweja ono e-yekọbeje iya ngweja-nri bya anụ Chipfu; mbụ wota uzi lanụ l'ime nkweka ukpokutu ereshi, e keru ọzo iri; gwọo lẹ manụ, jiru eze ekpemu.

⁵“Iphe, bụ nwaturu, e gude egwe ngweja-akpọ-ọku; ọzoo ngweja mmanụ bẹ unu e-yekọbeje ngweja-męe; mbụ męe, jiru nkeru-ẹno ọtu-lupfu otumu.

⁶“A bya l'iphe, bụ ebili, e gude egwe ngweja; unu yekọbeje iya ngweja-nri; mbụ ọzo labọ l'ime nkweka ukpokutu ereshi, e keru ọzo iri; gwọo lẹ manụ, jiru eze ekpemu lanụ l'úbvù iya. ⁷Ngweja-męe ono bẹ unu e-gude męe, jiru nkereto ọtu-lupfu otumu gwee. Unu meje iya g'ọ bụru ngweja, mkpọ iya dụ Chipfu ree.

⁸“Teke ọ bụ l'ọo nwa oke-eswi bẹ unu gude abya egweru Chipfu ngweja-akpọ-ọku; ọzoo ngweja, e gude apfụ ukwe-iphe; ọzoo ọphu e gude egwe ngweja-ẹhu-guu; ⁹g'onye egwe ngweja ono yekọbekwa iya ngweja-nri; mbụ ọzo ẹto l'ime nkweka ukpokutu ereshi, e keru ọzo iri; gwọo lẹ manụ, jiru eze ekpemu labọ. ¹⁰Nokwaphọ g'unu e-wota męe, jiru nkeru-ẹbo ọtu-lupfu otumu gude gwee ngweja-męe. Ngweja ono bẹ a-buru ngweja, a kpọru ọku, mkpọ iya dụ Chipfu ree.

¹¹“Ọ bụru ẹgube ono bụ g'unu e-medzujeru iya l'iphe, bụ oke-eswi; ọzoo ebili; ọzoo nwaturu; m'ọ bụ nweghu, unu gude egwe ngweja. ¹²Noo g'unu e-medzujeru iya bụ ono l'iphe, bụ ngweja, unu egwekpọ egwegwe; g'ọ hahabẹ igwerigwe. ¹³Iphe, bụ onye a nwuru anwunwu lẹ Ízurelu bẹ bụ ẹgube ono bẹ oo-meje ngweja, oogwe anụ Chipfu; mbụ ngweja, a kpọru ọku shi nno mee gę mkpọ iya dụ Chipfu ree. ¹⁴Shita l'ogbo k'unu-a je akpaa l'ogbo ọphu abya l'atatiphu; onye bụ onye lwaru alwalwa, bu ebubu l'echilabọ unu -wota ngweja bya gę ya gweru nụ Chipfu; mbụ ngweja, a kpọru ọku; shi nno mee gę mkpọ iya dụ Chipfu ree; g'ọ bukwaru ẹgube unu emeje bẹ oo-me. ¹⁵Ọo omelalị lanụ ono duru unubẹ ndu Ízurelu l'ophu; mę iphe, bụ ndu lwaru alwalwa, bu l'echilabọ unu. Omelalị ono a-nọepho shita l'ogbo unu sweru ọgbo ọphu abya nụ jasuru asuru. Ọo g'unu dụ l'atatiphu Chipfu bụ gę ndu lwaru alwalwa dukwapho. ¹⁶Ọ bụru

ekemu lanu; waa omelali lanu be duru unu le ndu lwaru alwalwa; unu l'ephe buru."

Anu Chipfu iphe-mbu

¹⁷Chipfu bya asu Mosisu: ¹⁸"Waa iphe, ii-pfuru ndu Izurelu baa: Unu -rwuepho ali ono, mu edu unu eje ono; ¹⁹unu -rijeepho nri, shi l'ali ono; unu ketakwa oke iya bya anu Chipfu. ²⁰Unu gude ukpokutu-iphe, shi l'akpuru-iphe-mbu, unu metaru l'ali ono gheba buredi nu Chipfu go buru ngweja, shi l'eka eechije bali. ²¹Ngweja ukpokutu iphe-mbu, unu metaru l'ali ono be unu a-nuje Chipfu jasuru asuru; mbu e -shi l'ogbo sweru ogbo."

Ngweja k'iphe-eji, e lekebeduru enya mee

²²"Su-a; o -buru l'o nweru onye elekebuduru enya darwua ekemu-a, Chipfu tushiru ye Mosisu l'eka-a; ²³mbu ekemu ono, Chipfu shi l'eka Mosisu nukota unu ono; go ha; mbu e -shi le mboku, Chipfu turu iya nu unu jaswaruroya; e -shi l'ogbo sweru ogbo; ²⁴be o -buru le ndu Izurelu te elekebeduru enya darwua ekemu ono; mbu l'oha Izurelu l'ophu ta amadu teke ephe meru iphe-eji ono; ge ndu Izurelu l'ophu kpata nwa oke-eswi gude gwee ngweja-akpo-oku; mbu ngweja, e meru; mkpo iya du Chipfu ree. Le yekobekwa iya pho ngweja-nri; me ngweja-mee, ayikwaru iya pho; waa mkpi, ee-gude gwee ngweja-iphe-eji. ²⁵G'onye uke Chileke gwee ngweja ono gude pfua ugwo iphe-eji ndu Izurelu ono l'ophu; g'aa-guaru phe nu l'iphe-eji ono, ephe meru ono; kele ephe te elekebeduru enya mee ya; teme ephe bya egwewaru ngweja nu Chipfu le k'emeswe ono, ephe mesweru ono; mbu ngweja, a kporu oku; me ngweja-iphe-eji. ²⁶Ndu Izurelu l'ophu; me ndu lwaru alwalwa, bu l'echilabo phe be aa-gukotar nu; noo kele ephe tukoru mee iphe-eji ono; ole ephe te elekebeduru enya mee ya.

²⁷"Ole-a; o -buru l'oo onye lanu be meru iphe-eji ono; ophu o lekebeduru enya mee ya; g'onye obu wota nwada egbu, gbaru apha g'e gude gwee ngweja-iphe-eji ono, o meru ono. ²⁸Onye uke Chileke be a-nodu l'iphu Chipfu pfua ugwo iphe-eji ono, onye ono elekebeduru enya mee ono. A -pfua ugwo iphe-eji ono, onye ono meru ono; be a guwaru iya nu. ²⁹Oo ekemu lanu ono be duru iphe, bu onye meru iphe-eji, o lekebeduru enya mee; m'o bu onye a nwuru anwunwu le Izurelu; m'o bu onye lwaru alwalwa."

Ngweja k'iphe-eji, e lekeberu enya mee

³⁰"O bekwanu l'onye lekeberu enya mee iphe-eji; me a nwuru onye obu anwunwu le Izurelu; ozo l'o bu onye lwaru alwalwa; be onye obu pfu-byiakwaru epha Chipfu. Onye du nno be ee-bufu ebufu l'echilabo ndibe

phẹ. ³¹Eshi ọp̄hu onye ono ta ad̄udu iphe, ọ ḡuberu Op̄fu Chip̄fu; bya emebiwaaw ekemu Chip̄fu; bẹ ee-bufuje onye ọbu ebufu; iphe-ẹji, o meru at̄-koru iya l'ishi.”

Nwoke, darw̄uru ns̄o eswe-at̄ta-unme

³²Lẹ teke ndu Ízurēlu n̄okwadu l'echiẹgu bẹ o nweru nwoke lanu, e gu-deru g'ọokpa nk̄u l'eswe-at̄ta-unme. ³³Ndu h̄umaru iya l'ẹka ọokpa nk̄u ono kp̄ta iya kp̄-pfushiaru M̄osisu yẹle Er̄onu; mẹ ndu Ízurēlu l'ophu. ³⁴Ẹp̄he kp̄ta iya t̄-chia at̄-chi; kēle e teke pfukahadu iphe, ee-me iya. ³⁵Ọo ya b̄u; Chip̄fu s̄u M̄osisu: “Nwoke ono bẹ ee-gbukwa egbugbu. Gẹ ndu Ízurēlu l'ophu kp̄fukwa iya az̄u ẹka ẹp̄he kp̄beru ọlo-ẹkwa phẹ je atugbua ya lẹ mkpuma.” ³⁶T̄obudu iya b̄u; ndu Ízurēlu bya akp̄ta iya kp̄fu az̄u ẹka ono, ẹp̄he kp̄beru ọlo-ẹkwa phẹ ono; je eworu iya tugbua lẹ mkpuma, b̄u gẹ Chip̄fu s̄uru M̄osisu g'ẹ mee ya.

Iphe, a kpar̄u akpakpa gude mengash̄ia ọnu uwe

³⁷Chip̄fu bya as̄u M̄osisu: ³⁸“Waa iphe, ii-pfuru ndu Ízurēlu baa: Unu kp̄jeru ìyanguyangu ye lẹ mgburēku uwe mgbalanu unu ishi ẹno. Iphe, unu e-gudeje kpaaw ìyanguyangu ono ab̄uru oghu, d̄u urwukpu-urwukpu. Noo g'unu e-meje iya b̄u ono; e -shi l'ogbo sweru ogbo. ³⁹Ìyanguyangu ono bẹ unu e-leje ẹnya gude nyatak̄ota ekemu m̄be Chip̄fu; k'ophu unu a-n̄duje eme iya ememe; haa ẹgu ẹjo-iphe ono, an̄duje agugbaa obu unu; mẹ ọp̄hu ẹnya unu ah̄magbabe ono; mb̄u ẹjo-iphe ono, unu shi an̄duje emegbaa ono. ⁴⁰Ọo ya b̄u; k'ophu unu a-nyatajẹ ekemu; bya eme iya ememe; shi nno d̄uru Chileke unu ns̄o. ⁴¹Ọo mb̄edua b̄u Chip̄fu; b̄uru Chileke unu; mb̄u onye ono, dufutaru unu l'al̄i Ijiputu; gẹ mu b̄uru Chileke unu ono. Ọo mu b̄u Chip̄fu, b̄u Chileke unu.”

Kora; Detanu; waa Abiramu

16 ¹O be teke ono; Kora nwa Izuha, b̄u nwanwa Kohatu; onye eri Lí-vayi; waa Detanu; mẹ Abiramu, b̄u un̄wu Eliyabu; mẹ Ọnu nwa P̄leti, b̄u ndu ip̄fu Rúbenu bya ach̄ita nemad̄u yeru onwophe; ²ẹp̄he wu-lihu tsoahaa M̄osisu op̄fu. Ndu ono, tso phẹ n̄u ono bugbaa ndu a h̄otaru g'ẹp̄he b̄uru ndu-ishi ndu Ízurēlu; bya ab̄uru ndu a maru ẹpha phẹ lẹ Ízurēlu l'ophu. Iphe, ẹp̄he d̄u b̄u ọkporo umad̄u iri l'ẹbo l'umad̄u iri. ³Ẹp̄he kp̄k̄o onwophe byapfutash̄ia M̄osisu yẹle Er̄onu bya as̄u phẹ: “Unu meta-waru iphe ọbu; o tsobe paa! Ndu Ízurēlu l'ophu bẹ unu maru l'ẹp̄he d̄u ns̄o l'ẹhu l'ẹhu; tẹme Chip̄fu swiru phẹ eswiru. ?B̄u ḡunu meru g'o gude unu palia onwunu eli eli dobe doghata ndu kẹ Chip̄fu l'ophu?”

⁴M̄osisu n̄umaep̄ho iphe ono, ẹp̄he pfuru ono; ọ daa kp̄upyabẹ ip̄hu l'al̄i.

⁵Ọ s̄u Kora yẹle ndu ẹp̄he l'iya sw̄i: “O -rwua l'utsu echele bẹ Chip̄fu e-goshiwaro onye ọp̄hu b̄u nkiya; waa onye d̄u ns̄o; onye ọ h̄otaru bẹ oo-me

g'ò byakube iya ntse. ⁶Waa iphe, unu l'e-me baa: Gẹ gùbedua, bụ Kora; gu lẹ ndu etso ngu nù; wota iphe, aaguje ọku; 7o -be echele; unu aguru ọku ye iya; bya eye iya ùnwù-isensu l'atatiphu Chipfu. Onye bụ onye Chipfu hotaru bẹ a-buru onye dū nsọ. Unubẹ eri Lívayi metawaru iphe ọbu; o tsobe paa!”

⁸Mósisu bya asukwapho Kora: “Unu ngabẹ nchi; unubẹ eri Lívayi!
⁹Chileke kẹ Ízurelu hotaru unu dobe iche lẹ Ízurelu l'ophu; mee g'unu nõdu iya ntse; eje ozi, dū l'ulo-ekwa kẹ Chipfu; mẹ g'unu pfujeru l'atati-
phu ndu Ízurelu l'ophu jeru phẹ ozi; ọphu ono asudu unu. ¹⁰O meru ge gùbedua; mẹ ndu Lívayi ibe ngu phẹ nõdu iya ntse; nta-a bẹ unu achofua ụzo, unu e-shi buru ndu-uke Chileke. ¹¹Ọ kwa Chipfu bẹ gu lẹ ndu etso ngu nù g'ephẹ ha tukuroru etso opfu. ?Bụ onye bẹ Eronu bụ kẹ g'unu tanyiru iya ntanyi?”

¹²Ọo ya bụ; Mósisu bya ezia g'e je ekua Detanu; mẹ Abiramu, bụ unwu Eliyabu. Ephemẹ sụ l'ephẹ ta abyadu. ¹³Sụ: “?I rwutaru anyi rwufuta l'alị ono, era-eswi waa manụ-ẹnwu asọ gborogboro ono; ọphu ono asudu ngu. I nõdu emefua g'i woru anyi gbushia l'echiegu l'eka-a; bya emefukwapho g'i mee onwongu onye-ishi anyi. ¹⁴Ọphu ka njo bụ l'i ti dubaduru anyi l'alị, era-eswi waa manụ-ẹnwu asọ gborogboro; mbụ alị ẹka anyi a-kọbeje iphe; waa ẹka anyi e-me opfu-vayinu. ?Iime g'i mee ndu-a mkpurukpuru-nya tọ? Waawaa! Anyi ta abyadu!”

¹⁵Ọo ya bụ; ẹhu ghushiahaa Mósisu eghe ike; ọ sụ Chipfu: “G'ò tọ duka ngweja, ndu-a gweru nù ngu, ịi-nata. Mu ta natajekwaru phẹ g'ò ka mma l'ọo nkafu-igara phẹ mẹ nanu; ọphu mu emekajeduru phẹ iphe mẹ onye lanu.”

¹⁶Mósisu sụ Kora: “Gẹ gùbedua yẹ ndu etso ngu nù g'ephẹ ha tuko bya l'iphu Chipfu echele. Gẹ gùbedua; waa ephebedua; waa Eronu tuko byakota. ¹⁷G'onyenonu gudekwa iphe, aaguje ọku; ye iya ùnwù-isensu gude bya l'atatiphu Chipfu. Iphe, ọo-du; mbụ iphe ono, aaguje ọku ono bụ ụkporo iri l'ẹbo l'iri. Gùbedua, bụ Kora l'onwongu e-gudekwapho nkengu; Eronu egude nkiya bya.” ¹⁸Tobudu iya bụ; onyenonu wota iphe ono, aaguje ọku ono; bya aguru ọku ye iya; ye iya ùnwù-isensu je apfugbaaru l'onu ulo-ekwa-ndzukọ ono. Ephemẹ lẹ Mósisu mẹ Eronu tuko pfuru l'eka ono. ¹⁹Kora bya achikobe ọha Ízurelu ono l'ophu; l'onu ulo-ekwa-ndzukọ ono g'ephẹ tso Mósisu yẹle Eronu opfu. No iya; ọdu-biribiri kẹ Chipfu sopyabe ọha Ízurelu ono l'ophu. ²⁰Chipfu sụ Mósisu yẹle Eronu: ²¹“Unu shi l'echilabo igwe ọha ono futa gẹ mu bya atuko phẹ mebyishikota lẹ ntabu ẹnya lanu.”

²²Mósisu yẹle Eronu daa; kpube iphu l'alị chishia sụ: “Oowaa! Gụbe Chileke; mbụ Chileke bụ ishi ndzụ iphe, bụ nemadzụ l'ophu; ?ii-gude k'iphẹ-ẹji, onye lanu metaru tų-koshi ọha l'ophu oke ẹhu-eghe ngu tọ?”

²³Chipfu bya asụ Mósisu: ²⁴“Pfuaru ọha Ízurelu ono l'ophu g'ephẹ kpuriberu l'ibiya ọphu ulo-ekwa Kora; mẹ Detanu; waa Abiramu nõ.”

²⁵Mósisu gbalihu; yẹle ndu bu ọgerenya Ízurelu swiru jepfushia Detanu waa Abiramu. ²⁶Ọ sù igwe ọha ono: “Unu lufutakwa l'ulo-ekwa ndu ejo-ememe ono! Unu te edenyikwa ẹka l'iphe, bu nkephe; ọdumeka be Chipfu e-gudekwa k'iphe-eji, ephe meru woru unu megbushia.” ²⁷Ọo ya bu; onyemonye buru ubara yeru ulo-ekwa Kora; me ke Detanu; waa ke Abiramu.

Detanu yele Abiramu bya afuta pfuru l'onu ulo-ekwa phe; ephe l'unyomu phe; me unwu phe unwoke; waa unwegirima phe. ²⁸Mósisu su: “Ọo iphe-a be unu e-gude maru l'oo Chipfu ziru mu ge mu mee iphemiphe ono; l'o to budu iphe, gbataru mu l'uche be mu emeje. ²⁹Ọ -buru le ndu-a be nwuhuru ge nemadzu mmanu anwuhuje; mbu-a; o -buru l'oo goonwujeru nemadzu l'ophu be o nwuru phe; oo ya bu l'o to budu Chipfu ziru mu iphe ono, mu eme ono. ³⁰Ole o -buru le Chipfu meru g'iphe te emejeduru nu mee; mbu; ali -saa onu lwegbushia phe; me iphemiphe, ephe nweru enweru; mbu; ephe buru ndu wubaru l'ali-maa le ndzu; oo ya bu; unu amaru l'o to dudu iphe, ephe guberu Chipfu.”

³¹Epfughe, Mósisu epfughe opfu ono; ali ono, Detanu phe pfuru ono kejaha ebo; ³²ali ono saa onu lwekota phe; me ndibe phe; me ndu ke Kora; me ivu phe. ³³Ephe wubakota l'ali-maa le ndzu; me iphemiphe, ephe nweru enweru; ali kpuyabe phe; ephe tuko g'ephe ha lakota l'iyi l'echilabo ndu Ízurelu. ³⁴Ọ buru mkpu, ephe chishiru be meru; ndu Ízurelu, no-pheru eka ono mgburugburu ye okpa l'oso; araje su: “Ali abyakwa anyi elwelwe-o!”

³⁵Noo ya; oku, shi l'eka Chipfu bya ekegbushikota umadzu ukporo iri l'ebo l'umadzu iri pho, shi akpo unwu-isensu oku pho.

Gbamugbamu, du nsọ, aagujeru oku ye

³⁶Chipfu su Mósisu: ³⁷“Pfuru Eleyaza, bu nwa Eronu; bya aburu onye uke Chileke g'o loshia iphe ono, aaguje oku l'ime oku ono; voshia icheku oku, du iya nu tukaa nanu nanu; noo kele iphe ono du nsọ; ³⁸mbu iphe ono, aaguje oku ono, bu ke ndu ono, meru iphe-eji shi nno tuphaa ndzu phe ono. O -loshichaa ya; g'a kusaa ya akusa g'o chisaa echisa g'e kpu-beje iya l'eli oru-ngweja Chipfu. Noo kele a nuwaru iya Chipfu; o buru iya bu l'o duwaa nsọ. Iphe ono be a-buru iphe-ohubama l'eka ndu Ízurelu no.” ³⁹Ọo ya bu; Eleyaza, bu onye uke Chileke bya achikoo iphe ono, aaguje oku ono, bu onyirubvu be e gude mee ya ono; mbu iphe ono, ndu ono, oku kegbushiru gude bya akpo unwu-isensu oku ono. A kusaa ya osa k'ophu ee-kpubeje iya l'eli oru-ngweja Chipfu; ⁴⁰g'o buru iphe, ndu Ízurelu e-gudeje nyata l'o to dudu onye ozo, bu onye ta abudu oshilokpa Eronu, a-kpuritajeru bya g'o kpo unwu-isensu oku l'atatiphu Chipfu; ọdumeka be ọo-dukwaru onye ono egube ono, o duru Kora yele ndu tsoru iya nu; mbu egube ono, Chipfu shi l'eka Mósisu pfua ya ono.

Ọnwu egbushi ndu Ízurelu

⁴¹O -rwuẹpho nchitabọhu iya; ndu Ízurelu l'ophu wata aguru Mósí-su yẹle Eronu aphụ asuje: “Ọ kwa unwu Chipfu bẹ unu gbushiru egube ono.” ⁴²Tọbudu iya bụ; ọha Ízurelu ono l'ophu bya akpakọbe onwophe g'ẹphe wata etso Mósí-su yẹle Eronu opfu. Ephe jeshia ele ẹnya l'ulo-ẹkwa-ndzuko; urwukpu so-kputewa iya; ọdu-biribiri ke Chipfu bya enwua ke phoo. ⁴³Mósí-su yẹle Eronu bya ejeshia l'atatiphu ulo-ẹkwa-ndzuko ono; ⁴⁴Chipfu sụ Mósí-su: ⁴⁵“Unu shi l'echilabọ igwe ọha ono lufuta ge mu bya atuko phe mebyishikota le ntabu ẹnya lanu.” Ephe daephe kpurumu l'iphu Chipfu.

⁴⁶Tọbudu iya bụ; Mósí-su sụ Eronu: “Wota iphe, iguje oku; shi l'oru-ngweja Chipfu guta oku ye iya. Li woru unwu-isensu ye iya mee egwegwa gude jepfu igwe ọha ono g'i pfa ugwo iphe-eji phe. Noo kele oke ehu-eghu, shi l'eka Chipfu bẹ talihuru nu; ejo iphe-ememe dapfutawa phe.” ⁴⁷Oo ya bụ; Eronu wota iphe ono egube Mósí-su pfuru iya ono; bya agbagbua bahu l'echilabọ igwe ọha ono. O jerwushia; ejo iphe-ememe ono nodu egbushiwaa ndu ono. O bya akporu Chipfu unwu-isensu ono oku; bya apfa ugwo iphe-eji ndu ono. ⁴⁸O pfuru l'echilabọ ndu ophu nwuhuwuru anwuhu; waa ndu ophu no ndu; ejo iphe-ememe ono buru bugemu. ⁴⁹Ndu ejo iphe-ememe ono gbushiru bẹ du ukporo unu umadzu; l'unu umadzu iri l'ishii; l'ukporo umadzu iri l'ise; a -gufukwa ndu ophu nwuhuru l'opfu ehu Kora. ⁵⁰Eronu mecha bya ejepfushia Mósí-su lonu ulo-ẹkwa-ndzuko; noo kele ejo iphe-ememe ono mebuhuwuru.

Mgboro Eronu bẹ rwutaru irwu

17 ¹Chipfu sụ Mósí-su: ²“Pfuaru ndu Ízurelu g'ẹphe chie ngu mgboro iri lebo. Ge ndu-ishi l'ipfu, nonu nuchaa ngu mgboro nanu nanu. Li deshia epha onyemonye le mgboro nkiya. ³Onye ii-de epha iya le mgboro k'ipfu Lívayi bụ Eronu. Kele onyenonu le ndu-ishi l'ipfu l'ipfu e-nweru mgboro lanu. ⁴L'i chita mgboro ono je awushi l'ulo-ẹkwa-ndzuko l'iphu okpoko-ekemu, bụ eka ono, mu abyapfutaje unu ono. ⁵Mgboro k'onye ophu mu hotaru bẹ a-kpofuta ome. Oo ya bụ ge mu e-shi nno mee ge ndu Ízurelu wofu mube Chipfu onu l'ehu l'aphu ono, ephe anoduje agushi ekpu unu tekenteke ono.” ⁶Tọbudu iya bụ; Mósí-su bya epfuaru iya ndu Ízurelu. Ndu-ishi l'ipfu nonu bya anugbaa ya mgboro nanu nanu; o tuko du mgboro iri lebo. Mgboro ke Eronu yikwaru iya pho. ⁷Mósí-su chita iya je edobe l'atatiphu Chipfu l'ulo-ẹkwa l'eka ono, okpoko-ekemu Chileke no ono. ⁸O -rwua nchitabọhu iya; Mósí-su bahu l'ulo-ẹkwa eka ono, okpoko-ekemu Chileke no ono; bya ahuma ge mgboro ke Eronu, bukwanu onye no-chiru ẹnya ipfu ke Lívayi kpofushiru ome; rwushia irwu; tushikwapho ige; bya amishia akpuru alumundu. ⁹Oo ya bụ; Mósí-su bya

achífuta mgboro ono g'ò ha l'atatiphu Chipfu chijeru ndu Ízurelu. Èphe lee ya enya; onyenonu wotachaa mgboro ophu bu nkiya.

¹⁰ Chipfu su Mosisu: “Woru mgboro ke Eronu dobephu azu l'iphu okpo-ko-ekemu ono; g'ò du l'eka ono buru iphe-ohubama noduru ndu ono, ekwefuje ike ono; g'ò buru iphe, a-noduje alo phe eka le nchi g'ephe haa agu-phe aphu ekpu mube Chipfu; a -nonyaa ephe nwushihu.” ¹¹ O buerupho ge Chipfu suru ge Mosisu mee ya bu g'ò meru iya.

¹² Ndu Ízurelu su Mosisu: “Anyi a-nwushihuchaakwa! Anyi laakwaru maa! Anyi lakotaakwaru maa g'anyi ha! ¹³ Onyemonye, jekubekporu ulo-ekwa Chipfu ntse be a-nwuhukwa nu. ?Anwuhu a-tuko anyi gbuèbe to?”

Ozi, duru ndu-uke Chileke waa ndu Lívayi

18 ¹ Chipfu su Eronu: “Gubedua l'onwongu; waa unwu ngu; me iphe, bu onu-ulo nna ngu l'ophu be o tu-koru l'ishi; mbu ejo-iphe, e meru l'ulo mu; o buru gubedua l'onwongu kwapho; me unwu ngu be o tu-kokwarupho l'ishi; mbu ejo-iphe, e meru meswee k'abu uke. ² Duta unwunna ngu phe, bu iya bu eri Lívayi, bu ipfu nna ngu g'ephe yejeru ngu eka; gubedua waa unwu ngu phe be a-nodu l'atatiphu ulo-ekwa eka okpoko-ekemu Chileke no eje ozi. ³ Èphe a-nodu eje ozi, i ziru phe; me ozi, dukota l'ulo-ekwa. Oe oo epho g'ephe te jekubekwa mgboru ulo Chipfu; waa mgboru oru-ngweja Chileke; o -dudu be gu l'ephe a-tukokwa nwushihu. ⁴ Gu l'ephe a-tugba nanu; ephe eje ozi, du l'ulo-ekwa-ndzuko; mbu iphe, bukota ozi, du l'ulo-ekwa ono. G'onye abudu onye Lívayi ta abyakubejekwa unu ntse. ⁵ Oo unubedua a-nodu eje ozi, du l'ulo Chipfu; me ozi k'oru-ngweja Chileke; k'ophu Chileke ata atu-koshiedu ndu Ízurelu oke ehu-eghu iya ozo. ⁶ Su-a; mu hotawaru ndu Lívayi, bu unwunna unu l'echilabo ndu Ízurelu. Èphe bu ndu e woru nu unu; buru ndu e doberu mube Chipfu iche g'ephe jeje ozi, du l'ulo-ekwa-ndzuko. ⁷ Gubedua waa unwu ngu be a-nodu eje ozi k'egweru Chileke eja; mbu l'unu a-nodu ejekota ozi k'oru-ngweja Chileke; waa ozi, du lime eka ekwa-mgbochi no. Noo ozi, unu a-nodu eje bu ono. Mu yeru unu k'egwe ngweja ono l'eka g'ò buru iphe-oma, mu meru unu. Onye ozo, abudu oshilokpa Lívayi -byaru le mgboru ulo Chipfu be a-nwuhukwanu.”

Oke, rwuberu ndu-uke Chileke

⁸ No iya; Chipfu su Eronu: “Nta-a be mu woakwaru iphemiphe, bu iphe, aanuje mu anunu ye ngu l'eka. Iphemiphe, bu iphe, ndu Ízurelu doberu mu nsò; buwaa ngu be mu nukotaru iya g'ò buru okiphe ngu; buru okiphe unwu ngu jasuru asuru. ⁹ Owaa be a-bufuaru okiphe unu l'iphe, kakota adu nsò ono, bu ophu a ta kpoduru oku: Iphe, ephe gudekota bya egwe ngweja nu mu; mbu iphe, shi le ngweja-nri; me iphe, shi le

ngweja-iphe-ẹji; mẹ ọp̄hu shi lẹ ngweja-apf̄u-ugwo; mb̄u iphemiphe ono, ẹp̄he n̄uru mu g'ọ b̄uru ngweja, kakọta ad̄u nsọ ono. Ndu k'ono bẹ b̄ukota okiphe, rwuberu ḡube Er̄onu; waa ẗnwu ngu phẹ. ¹⁰Unu n̄oduje l'ẹka kakọta ad̄u nsọ ria ya. Ọ b̄uru unwoke kpoloko bẹ e-rije iya n̄u. G'ọ b̄ukwaru unu iphe, d̄u nsọ.

¹¹“Iphe, b̄u iphe, ndu Ízurelu doberu mu iche; mb̄u iphe, shikọta lẹ ngweja-amama bẹ b̄u nkengu. Mu wowaru iya n̄u ḡu l'ẗnwu ngu unwoke; mẹ ẗnwada ngu jas̄uru as̄uru. Iphe, b̄u ndibe ngu, nt̄urwu ad̄udu l'ẹhu bẹ e-tsojeru ria ya. ¹²Iphe, ndu Ízurelu n̄uru Chipfu l'ọo iphe-mb̄u, shi l'iphe, ẹp̄he metaru l'al̄i bẹ b̄u ngu nwe iya; mb̄u iphe, b̄u man̄u olivu, kakọta ree; mẹ iphe, b̄u m̄ẹ ọphúú, kakọta ree; waa iphe, b̄u ereshi, kakọta ree. ¹³Iphe, b̄ukota iphe, ẹp̄he wotaru Chipfu l'ọo akp̄uru-iphe-mb̄u, ẹp̄he metaru l'al̄i phẹ b̄u nkengu. Iphe, b̄u ndibe ngu, nt̄urwu ad̄udu l'ẹhu bẹ l'e-tsojeru ria ya.

¹⁴“Iphe, b̄u iphe, e yeru Chipfu l'ẹka l'al̄i Ízurelu bẹ b̄ukota nkengu.

¹⁵“Iphe, b̄u iphe, vuchakp̄oo ẗzo waa ẹkpa-nwa ne iya; an̄u m̄ẹ nemadz̄u; mb̄u ọp̄hu e woru n̄u m̄ube Chipfu a-b̄ukotajeru nkengu. Obenu l'aa-pf̄uje ẗgwo gude gbata iphe, b̄u ọkpara, shi l'ẹhu nemadz̄u; nokwaph̄o g'aa-pf̄uje ẗgwo gude gbata iphe, b̄u an̄u mb̄u, shi l'ẹhu an̄u, aas̄o ns̄o f̄uta. ¹⁶Ẹp̄he -n̄owaa ọnwa ọp̄hu bẹ aa-pf̄uje mkp̄ola-ọchaa, ẹrwa iya d̄u sh̄ekelu ise gude gbata phẹ; mb̄u mkp̄ola-ọchaa, b̄u iphe, eegudeje at̄u ẹrwa iphe l'eze-ẗlo Chileke bẹ e gude t̄ya ya. ¹⁷Obenu lẹ nweswi, ne iya vuru ẗzo nw̄ua; m̄ẹ nwat̄uru, ne iya vuru ẗzo nw̄ua; m̄ẹ nweghu, ne iya vuru ẗzo nw̄ua bẹ aa-hajẹ agbata. Ndu k'ono bẹ d̄u ns̄o. Unu gb̄uje iya; p̄hee mee ya l'eli ọru-ngweja ono; unu akpoje ẹba iya ọku gude gwee ngweja-akp̄o-ọku; mb̄u ngweja, mkp̄o iya d̄u Chipfu ree. ¹⁸An̄u iya a-b̄uru nkengu; ẹgube ono, ñd̄u-iphe, e gude gwee ngweja-amama; m̄ẹ ẗtapfu ọkpa ẹkutara an̄u b̄u nkengu ono.

¹⁹“Iphemiphe, Ízurelu doberu ns̄o g'ẹp̄he n̄u Chipfu bẹ mu n̄uwaru ḡu l'ẗnwu ngu unwoke; m̄ẹ ẗnwada ngu phẹ g'ọ b̄uru nkunu jeye lẹ gb̄ururu. Ono b̄u nrak̄unraku ọgbandzu mu lẹ ngu; m̄ẹ awa ngu l'ọp̄hu. Ọgbandzu ono a-n̄o jas̄uru as̄uru. O to nwed̄u echihu.”

²⁰Chipfu bya as̄u Er̄onu: “Gẹ ndu Ízurelu te emejekwa al̄i gbaa unu; ọp̄hu ẹp̄he ahejekwa unu okiphe. Ọ kwa mb̄edua b̄u okiphe, unu hatar̄u. Ọo mu b̄u okiphe, unu ketar̄u l'ẹka ndu Ízurelu.”

Oke-lan̄u-l'ẗzo-iri b̄u oke, d̄uru ndu Lívayi

²¹“A bya abya l'ẹhu ndu Lívayi; eshinu ẹp̄he eje ozi, d̄u l'ẗlo-ẹkwa-ndzuk̄o bẹ mu n̄ukotawaru phẹ iphe, shi l'oke-lan̄u-l'ẗzo-iri, ndu Ízurelu an̄uje mu. Ono b̄uwaa okiphe phẹ. ²²Shita nta-a kwas̄eru bẹ ọ t̄o d̄udu onye Ízurelu ọzo, e-jekube mgboru ẗlo-ẹkwa-ndzuk̄o; ọdumeka bẹ iphe-ẹji onye ọbu a-tukokwaru iya l'ishi; onye ono a-nw̄uhukwa. ²³Ọo ndu

Lívayi bẹ eje ozi, dọ l'ulo-ẹkwa-ndzuko dọ l'ẹka; ọ buru phẹ bẹ ejo-iphe, e meru l'ẹka ono tukoru l'ishi. Iphe ono, a-buru nsọ, a-dọ jasuru asuru; mbu jasú l'ogbo sweru ogbo. Ọ tọ dudu iphe, ẹphe eketa l'ẹka ndu Ízurelu. ²⁴Oke-lanụ-l'uzo-iri, ndu Ízurelu anuje mu; bẹ mu nwaru ndu Lívayi g'ọ buru okiphe phẹ. Ọo ya meru g'ọ gude mu pfua opfu ẹhu phẹ sù: 'Ephẹ ta ahatadu okiphe l'ẹka ndu Ízurelu.'

Oke-lanụ-l'uzo-iri kẹ ndu Lívayi

²⁵Chipfu sù Mósísi: ²⁶"Pfuaru ndu Lívayi sù phẹ lẹ-a: Ọ -buru l'unu nararẹ ndu Ízurelu oke-lanụ-l'uzo-iri ono, mu nuru unu g'ọ buru okiphe unu ono; unu shije l'ime iya woru oke-lanụ-l'uzo-iri nukwapho Chipfu. ²⁷Iphe, unu nuru bẹ aa-nọduje aguru unu g'ọ bẹ ereshi, shi l'ẹka l'eechije ereshi; a gukwaa ya phọ gẹ mẹe, shi l'ẹka aakuje mẹe. ²⁸Ọo ya bẹ l'unu e-shije l'oke-lanụ-l'uzo-iri ono, unu anatajẹ l'ẹka ndu Ízurelu ono woru oke-lanụ-l'uzo-iri iya nukwapho Chipfu. Ọ buru l'oke-lanụ-l'uzo-iri ono bẹ unu e-shi woru kẹ Chipfu nọ Eronu, bẹ onye uke Chileke. ²⁹Unu wojeru iphe, gbaru Chipfu nọ iya l'iphemiphe, a nuru unu; unu shije l'ophu bẹ iya kakota ree nọ iya ya; mẹ l'ophu kakota adu nsọ. ³⁰Ọo ya bẹ; pfuaru ndu Lívayi sù phẹ lẹ teke ẹphe woru iphe, kakota ree nọ Chipfu ono bẹ aa-guru phẹ iya g'iphe, shi l'ẹka eechije balí; a gukwaa ya phọ gẹ mẹe, shi l'ẹka aakuje mẹe. ³¹Unu lẹ ndibe unu a-nọduje l'ẹka dọ unu ree ria ndu ophuu; kẹle ọo obunggo ozi, unu eje l'ulo-ẹkwa-ndzuko. ³²Ọ tọ dudu iphe-ẹji, bya atukoru unu l'ishi m'ọ buru l'unu wotaru iphe ono ophu kachaa ree nọ mu. Tẹme ophu unu e-merwudu iphe, ndu Ízurelu doberu nsọ g'ẹphe nọ mu; k'ophu unu ta anwushihudu."

Mini, e gude asafu nturuwu

19 ¹Chipfu bya asu Mósísi yẹle Eronu: ²"Waa ekemu, Chipfu turu sù: Pfuaru ndu Ízurelu g'ẹphe kpataru ngu nwada eswi, eke uswe-uswe; ophu ọ dudu ẹka iphe mebyiru iya; ophu ọ dudu ntuji, dọ iya nọ; tẹme ophu e gudejeada ya jee ozi. ³Unu kpata nwada eswi ono kpe Ele-yaza, bẹ onye uke Chileke; g'a kpufu iya l'azu ẹka a kpoberu ulo-ẹkwa je egbua l'ẹka Eleyaza nọ. ⁴Gẹ Eleyaza, bẹ onye uke Chileke tsee mkpushi-ẹka lẹ mee ya phee l'uzo atatiphu ulo-ẹkwa-ndzuko ugbo ẹsaa. ⁵Nwada eswi ono bẹ aa-kpo oku l'iphu Eleyaza; kpo akpo iya oku; mẹ anu iya; waa mee ya; mẹ nshí iya. ⁶Onye uke Chileke ono bẹ e-wota oshi sida; mẹ ẹswa isopu; mẹ oghu uswe-uswe chiru ye l'echilabo oku ono, e gude akpo nwada eswi ono oku ono. ⁷Teke ono bẹ onye uke Chileke ono e-gude mini saa uwe iya; gude mini wua ẹhu. O -megheẹ ya phọ nno; l'ọ batawarọ l'ime ẹka ono, a kpoberu ulo-ẹkwa ono. Ọle ọo-buru onye aasọ nsọ nọ jasú l'uzenyashi mboku ono. ⁸Onye bẹ iya kporu nwada eswi ono oku bẹ e-gudekwapho mini saa uwe iya; gude mini wua ẹhu; l'ọ bukwarupho

onye aasọ nsọ nọo jasú l'ụzenyashi mbọku ono. ⁹Onye a ta sọdu nsọ bẹ e-kpota ntụ, shi l'ọku ono, e gude kpọo nwada eswi ono ọku. Oo-kpota iya je awushi l'ẹka nturwu ta adudu; l'azụ ẹka a kpọberu ụlo-ẹkwa. O buru l'ẹka ono bẹ aa-wushiru iya ndu Ízurelu g'ẹphe gude meje kẹ mini, eegudeje asafu nemadzu nturwu; gude iya eme k'asafu iphe-ẹji. ¹⁰Onye bu iya kpotaru ntụ ono bẹ a-sa uwe iya asasa. Lọ buru onye aasọ nsọ nọo jasú l'ụzenyashi mbọku ono. Omelali ono bẹ a-du gbururu jeye lẹ gbururu. Oo-duru ndu Ízurelu; duru ndu lwaru alwalwa; ẹphe l'ẹphe buru.”

Edenyi odzu ẹka

¹¹“Onye denyiru odzu onye nwuhuru anwuhu ẹka bẹ a-buru onye aasọ nsọ nọo ujiku ẹsaa. ¹²Onye obu bẹ e-gude mini ono, eegudeje asafu nturwu saa onwiya lẹ mbọku k'eto iya; waa lẹ mbọku k'ẹsaa ya; teme l'oo-du ree. Olee ọ -buru l'ọ tọ sachaduru onwiya lẹ mbọku k'eto iya ono; me lẹ mbọku k'ẹsaa ya ono bẹ ọ tọo dudu ree. ¹³Iphe, bu onye meru odzu onye nwuhuru anwuhu ẹka; ophu onye obu ta sachaduru onwiya bẹ bukwa ụlo-ẹkwa Chipfu bẹ ooturwu. Onye obu bẹ ee-bufu l'ẹka ndu Ízurelu nọ. Oo-buru onye aasọ nsọ; noo kele e te pheduru iya mini, eegudeje asafu nturwu; emeswe ono bẹ dukwadu iya l'ehu g'ọ du iya.

¹⁴“Owaa bu ekemu, du lẹ k'onye nọ l'ime ụlo nwuhu. Iphe, bu onye bahuru l'ime ụlo ono teke ono; me iphe, bu onye nọ iya l'ime teke ono bẹ a-buru onye aasọ nsọ abali ẹsaa. ¹⁵Iphe, bu ivu, du l'ulo ono, e gheberu onu; ophu e kpureduru iya iphe bẹ aa-soakwapho nsọ. ¹⁶Iphe, bu onye nọ l'oma ẹgu denyi ẹka l'odzu onye e gburu lẹ mma; ozoo odzu onye nwuhuru anwuhu mmanu; ozoo l'ọ denyiru ẹka l'okpu onye nwuhuru anwuhu; m'ọ bu l'ilu; bẹ a-buru onye aasọ nsọ nọo abali ẹsaa.

¹⁷“A -bya lẹ kẹ ndu aasọ nsọ; g'ẹphe kpota ntụ ono, shi l'ọku, e gude kpọo ngweja-iphe-ẹji ọku ono ye l'iphe; ẹphe eje l'ẹka mini, doru risaa du; kuta mini ye iya. ¹⁸Oo ya bu; onye a ta sọdu nsọ ewota ẹsua isopu tsee l'ime mini ono; phee ya l'eli ụlo-ẹkwa ono; me l'eli ivu, du l'ulo-ẹkwa ono; me l'ehu ndu nọ l'ime ụlo-ẹkwa ono. Nokwapho g'oo-phe iya iphe, bukpo onye denyiru ẹka l'okpu onye nwuhuru anwuhu; me onye denyiru ẹka l'odzu onye e gburu lẹ mma; ozoo onye denyiru onye nwuhuru anwuhu mmanu ẹka; me onye denyiru ẹka l'ilu. ¹⁹Onye obu, a ta sọdu nsọ obu bẹ e-phe onye ono, aasọ nsọ ono mini ono lẹ mbọku k'eto; waa lẹ mbọku k'ẹsaa. O -rwua lẹ mbọku k'ẹsaa ono; l'ọ safu iya nturwu ono. Onye ono, a saru ono asaa uwe iya asasa; gude mini wua ẹhu; l'ọ bya adu ree l'uzenyashi mbọku ono.

²⁰“Obenu l'onye aasọ nsọ; ophu ọ sachaduru onwiya asacha bẹ ee-bufu l'echilabo ndu Ízurelu; kele o merwuwaru ụlo Chipfu. Eshinu e te pheduru iya mini, eegudeje asafu nemadzu nturwu bẹ ọ bu onye aasọ nsọ. ²¹Ono bu ekemu, a-duru phe nu jasuru asuru. Onye ono, bu iya epheje mini ono, eegudeje

asafu nemadzú nturwu ono be a-sakwapho uwe iya asasa. Onye meru eka le mini ono, eegudeje asafu nturwu ono be a-buru onye aaso nso jeye l'uzenya-shi mboku ono. ²²Iphe, onye aaso nso denyiru eka be a turwuwaru aturwu; onye denyiru eka l'iphe obu be aa-nodu aso nso jasú l'uzenyashi mboku ono.”

Anwuhu Miriyamu

20 ¹Tobudu iya bu; o rwua l'onwa mbu l'apha; ndu Izurelu l'ophu je-rwua echiegu Zinu. Epehe noshia le Kadeshi. Miriyamu nodu l'eka ono nwuhu; e lia ya l'eka onokwapho.

Mini, shi le mkpuma

²Teke ono be mini ta adudu k'ophu ndu Izurelu a-ngu; epehe kpako onwo- phe tsoahaa Mosisu ye le Eronu opfu. ³Epehe wata abaru Mosisu mba su: “O gege akaru anyi ree; o bu l'anyi nwushihuru teke pho ndibe anyi phe nwushihuru l'iphu Chipfu pho. ⁴?Bu gunu meru g'o gude i chita anyibe ndu ke Chipfu bya awushi l'echiegu l'eka-a g'anyi l'iphe-edobe anyi nwushihu? ⁵?Bu gunu meru g'o gude i dufuta anyi l'alí l'jiputu bya eduru dobe le mkpokoro eka-a, ta adudu ereshi, du iya nu; ophu oshi figu adudu iya; ophu vayinu adudu iya; ophu oshi itorokuma adudu iya; ophu o dudu mini, anyi a-ngu, du iya nu?” ⁶Tobudu iya bu; Mosisu ye le Eronu lufu l'eka ono, ndu Izurelu doru ono tugbua jeshia l'onu ulo-ekwa-ndzuko je adaa; kpupyabechaa iphu l'alí. O-gbu-nwijnwii ke Chipfu nwaru phe ke phoo.

⁷Chipfu su Mosisu: ⁸“Wota mgboro pho ge gu le nwune ngu Eronu chikobe ndu Izurelu. Pfuru yeru mkpuma ono l'eka epehe ele ngu enya ge mini shi iya sofuta. Noo uzo, ii-shi mee ge mkpuma ono sofutaru phe mini bu ono; k'ophu ndu Izurelu me iphe-edobe phe a-ngu mini.” ⁹Tobudu iya bu; Mosisu bya ewota mgboro ono l'atatiphu Chipfu l'eka ono gude tugbua; ge Chipfu suru iya g'o mee ya.

¹⁰Mosisu ye le Eronu bya achikobe ndu Izurelu l'iphu mkpuma ono. Mosisu su phe: “Unu ngabe nchi nta-a unube ndu okwefurike ono. ?Bu g'anyi kuta mini le mkpuma-a nu unu to?” ¹¹Oo ya bu; Mosisu halia eka iya imeli bya mgboro ono ugbo labo l'eli mkpuma ono. Mini shi le mkpuma ono nwushihu; ndu Izurelu; me iphe-edobe phe ngua ya.

¹²Tobudu iya bu; Chipfu su Mosisu ye le Eronu: “Eshi ophu unu te kwetaduru nkemu; ophu unu emeduru mu ge mu du nso l'enya ndu Izurelu be unu te edurwuakwa ndu-a ali ono, mu nuru phe ono.”

¹³Qwana bu mini Meriba, bu iya bu “uswo”; kele oo l'eka ono be ndu Izurelu no tsoo Chipfu uswo; Chipfu goshi phe le ya du nso.

Ndu Edomu ajika ge ndu Izurelu ta aghatashi l'alí phe

¹⁴Mosisu bya eshi le Kadeshi zia ozi g'e je zia eze ndu Edomu su: “Qwaa bu iphe, Izurelu, bu nwune ngu pfuru: Unu mawaru egube

iphe-ẹhuka, byapfutaru anyi g'ò ha. ¹⁵Unu mawaru ẹ ńna anyi oche pẹ gude chiru anyi laa alì Ijiputu; je ebua ẹka ono ńọo ọdu. Ndu Ijiputu kpaan na anyi pẹ ono ẹhu shii; bya akpakwaaphọ anyịbedua. ¹⁶Obenu lẹ teke anyi rakuru Chipfu bẹ ọ ńumaru olu anyi; bya ezia ojozi; ọ bya edufuta anyi lẹ Ijiputu. Nta-a bẹ anyi ńọwa lẹ Kadeshi, bụ mkpukpu, unu l'ẹphe maru oke alì. ¹⁷Jiko unu hanaa g'anyi shia alì unu ghata. Anyi te eshidu ẹgu unu aghata; ọzoo ẹka unu gbaru opfu-vayinu; ophu ọ dudu wẹlu unu, anyi bya l'e-kuta mini ngua. Anyi e-tsoerupho ọma oji unu ogologo ghata. Anyi ta abyadu a-swiba aswiba l'uzo ẹkutara; ọzoo l'uzo ẹkicha jasụ anyi aghatakọta l'alì unu."

¹⁸Ole eze ndu Edomu yeru iya ọnu sụ: "Unu ta aghatakwa l'alì anyi; ọ dudu bẹ mu e-gudekwa ogu-echi byapfuta unu ọgu."

¹⁹Ndu Ízurelu sụ iya: "Anyi e-tsoerupho ọma oji ghata. Ọ -buru l'anyi nguru mini unu; ọzoo l'ọo iphe-edobe anyi nguru mini unu; anyi apfua unu ugwo iya. Unu haarọ g'anyi gude ọkpa ghata; ọ tọ dukwa iphe ọzo."

²⁰Ole eze ndu Edomu bẹ sụru g'ẹphe ta aghatashì. Ọo ya bụ; ndu Edomu chita ikpoto unwoke pẹ, bụ ndu ọkpehu dọ jefpushia ndu Ízurelu ọgu. ²¹Ọ buru iya bụ lẹ ndu Edomu ajika ẹ ńdu Ízurelu ta aghatashì. Ẹphe dakọbe shia ibiya ọzo.

Anwuhu Eronu

²²Ndu Ízurelu l'ophu wu-lihu lẹ Kadeshi dzebe; jasụ ẹphe jerwua l'úbvú Họru. ²³Ọ buru l'úbvú Họru ono, ńọ-kube oke alì Edomu ono bẹ Chipfu ńọ sụ Mosisu yele Eronu: ²⁴"Eronu bẹ abya anwuhu lapfu ndiche ya pẹ. O too jerwudu alì ono, mu ńuru ndu Ízurelu ono; kele unu kwefuru ike lekemu, mu turu lẹ ke mini Meriba. ²⁵Duta Eronu yele Eleyaza, bụ nwa iya g'unu nyihu eli úbvú Họru; ²⁶l'i yeshia Eronu uwe iya woru yee Eleyaza, bụ nwa iya; noo kele Eronu a-ńodu l'ẹka ono nwuhu lapfu ndiche ya pẹ." ²⁷Mosisu mee iphe, Chipfu sụru g'o mee. Ndu Ízurelu ńodu ele pẹ ẹnya; ẹphe nyihu eli úbvú Họru ono. ²⁸Mosisu yeshia Eronu uwe iya woru yee Eleyaza, bụ nwa iya. Eronu nwuhu l'eli úbvú l'ẹka ono. Mosisu yele Eleyaza shi l'eli úbvú ono nyizeta. ²⁹Ndu Ízurelu l'ophu humaeapho lẹ Eronu bẹ nwuhuwaru ńu; iphe, bụ ndu Ízurelu l'ophu rakọta ẹkwa iya ọkporo abalì l'abalì iri.

Ndu Ízurelu alwu-kpe ndu Aradu

21 ¹O be teke onye Kėnanu, bụ eze ndu Aradu; mbụ onye ono, bu l'echiẹgu ndọhali ono ńumaru lẹ ndu Ízurelu bẹ shi l'uzo Atari-mu abya; o je etsoo ndu Ízurelu ọgu; kputa ndu ophu ọ kputaru lẹ ndzu. ²Ndu Ízurelu ribuaru Chipfu nte sụ: "Ọ -buru l'ii-woru ndu-a yee anyi l'ẹka bẹ anyi e-woru mkpukpu pẹ g'ò ha mebyishikọta." ³Chipfu ngaberu ndu Ízurelu nchì l'olu; bya eworu ndu Kėnanu ye pẹ l'ẹka. Ẹphe mee ndu

ono; mę mkpukpu phę omeliwe; mbụ ęphe bụkotaru mkpurupyata. Ọo ya bụ; e kuahaa ęka ono Homa, bụ iya bụ “mkpurupyata”.

Agwọ, e meru l'ope

⁴Ndu Ízurelu bya eshi l'úbvú Horu tugbu; ęphe tsoru ụzo, larụ Eze-nyimu Uswe-uswe; k'ophu ęphe e-shi nno jee alị Edomu mgburugburu. Ęphe jenyaa l'uzo ono; ophu ęphe aduhedu ike takota nshi. ⁵Ęphe wata epfutoşhi Chileke yele Mosisu su: “?Bụ gunu kparụ iphe, unu dufutaru anyi le Ijiputu bya awushi l'echięgu-a g'anyi nwushihu? Ęka nri ta adudu! Ophu mini adudu iya! Njọ nri-a, anyi tsoru eriphe-a be tųhuakwaru anyi ayi!” ⁶Tobudu iya bụ; Chipfu bya achiru ejo agwọ yeru ndu Ízurelu ono. Agwọ ono wata phę atagbushi. O tagbua ndu dukpoo igwerigwe. ⁷Ndu Ízurelu byapfuta Mosisu bya asu iya: “Anyi mewaru iphe-ęji; kele anyi pfutoşhiwaru Chipfu; waa gubedua. Pfunuru nu Chipfu; k'ophu oo-wofuru anyi agwọ ono.” Ọo ya bụ; Mosisu bya eworu opfu ęhu ndu Ízurelu ono pfuru nu Chipfu. ⁸Chipfu su Mosisu: “Meta ejo agwọ dobe l'eli itso lanu; k'ophu bu onye agwọ pho -taru eru; l'o lee ya ęnya; dzuru ndzu.” ⁹Ọo ya bụ; Mosisu gude onyirubvu meta agwọ bya atukobe iya l'eli itso lanu. O nodu abujeru; onye agwọ taru; o -lewa ęnya l'agwọ ono, e meru l'ope ono; l'oo-dzuru ndzu.

Ndu Ízurelu eje ala Mówabu

¹⁰Ndu Ízurelu bya atugbu; rwua Obotu; ęphe kpobe ụlo-ękwa phę. ¹¹Ęphe gbę le Obotu tugbu; je akpobe ụlo-ękwa phę le Iye-Abarimu l'echięgu ono, no chebe iphu le Mówabu l'uzo ęnyanwu-awawa ono. ¹²Ęphe shi l'ęka ono tugbu bya erwua nsuda Zeredu; bya akpobe ụlo-ękwa phę l'ęka ono. ¹³Ęphe shikwapho l'ęka ono tugbu je akpobe ụlo-ękwa phę l'azu ęnyimu Anonu azu iya ophuu; ęka ono, no l'echięgu, no kpaa l'oke alị ndu Amoru; noo kele ọo ęnyimu Anonu bu oke alị ndu Mówabu; mbụ nokaharu ndu Mówabu ęphe le ndu Amoru. ¹⁴Ọo ya meru g'o gude e pfua l'ękwo, e deru k'ogụ, Chipfu lwuru su: “Mkpukpu Wahebu ono, du le Sufa; yele nsuda nsuda ęnyimu Anonu; ¹⁵mę le mkpo-ze mkpo-ze ono, du le nsuda nsuda, no je akpaa le mkpukpu Aru; bya anodu nno jasụ l'oke alị ndu Mówabu.”

¹⁶Ęphe gbalihu l'ęka ono kwaseru jerwua Biye, bu iya bu welu ono, Chipfu suru Mosisu: “Chikobe ndu Ízurelu l'ęka lanu ge mu nu phę mini g'ęphe ngua.” ¹⁷Tobudu iya bụ; ndu Ízurelu gua ebvu-a su:

“Nwufuta mini; gube welu!

G'a guru ebvu nu iya.

¹⁸Ọo ndu-ishi bvuru welu ono;

mbụ l'oo ndu a maru ępha phę le Ízurelu be turu iya nu.

O buru mgboro ndu eze; mę mgboro ndu a maru ępha phę

bẹ ẹphe gude bvua ya.”

Tòbudu iya bụ; ẹphe shi l'echiẹgu jeshia Matana; ¹⁹shi lẹ Matana lufu lẹ Nahalẹlu; shi lẹ Nahalẹlu lufu lẹ Bamọtu; ²⁰shi lẹ Bamọtu lufu lẹ nsuda, nọ l'alị Mówabu lẹ mgboru úbvú Pisiga, bụ ẹka aagbeje ele alị, dabyiru mgbegere.

**Ízurelu alwu-kpe Sihonu,
bụ eze ndu Amọru
(Dit 2:26-37)**

²¹Tòbudu iya bụ; ndu Ízurelu zia ozi g'e je zia Sihonu, bụ eze ndu Amọru su: ²²“G'anyi ghatanu l'alị unu. Anyi ta aswibakwa l'egu unu; ophu anyi ta aswibadu l'opfu-vayinu unu. Ophu o dudu welu unu, anyi bya l'e-kuta mini ngua; oo ẹpho oma oji bẹ anyi e-tsuru jasụ anyi aghatagbua l'alị unu.” ²³Obenu lẹ Sihonu te ekwedu gẹ ndu Ízurelu ghata l'alị iya. O chikobe ndu nkiya g'ẹphe ha; ẹphe jẹpfushia ndu Ízurelu ogu l'echiẹgu. Ẹphe rwuepho mkpukpu Jihazuzi; ẹphe datso ndu Ízurelu ogu l'eka ono. ²⁴Ndu Ízurelu gude ogu-echi sụa pẹ pyaapya; nata pẹ alị pẹ ono; shita l'enyimu Anonu je akpaa l'enyimu Jiaboku; jeyewaruro l'alị ndu Amọru; oke alị ndu Amọru bẹ a kpuru igbulọ mgburugburu; o shihu ike. ²⁵Ndu Ízurelu lwutakota mkpukpu ndu Amọru g'o ha; buchikota iya; lwutachaa mkpukpu Heshibonu; mẹ mkpukpu, nọ-pheru iya mgburugburu. ²⁶Heshibonu bẹ bụ mkpukpu Sihonu, eze ndu Amọru. Yele onye shi buru eze ndu Mówabu lwujeru ogu; Sihonu lwutakota alị iya je akpaa l'enyimu Anonu. ²⁷Oo ya meru g'o gude ndu àkàkà ebvu nọdu aguje sụ:

“Bya mkpukpu Heshibonu; g'a kpụ-phu iya azụ;
mbụ g'a kpụ-phu mkpukpu Sihonu azụ;
kpua ya g'o shihu ike.

²⁸Noo kele oku shi lẹ Heshibonu kpufu;
mbụ l'ire-oku shi lẹ mkpukpu Sihonu kpufu.
O tsuwaru mkpukpu Aru kẹ ndu Mówabu;
mbụ ndu nwe úbvú, dugbaa lẹ mgboru enyimu Anonu.

²⁹Nshio unubẹ ndu Mówabu!
E mebyishiwari unu; unubẹ ndu anọduje agwa agwa Kemoshi!
Unwegirima unu unwoke bẹ o mewaru;
ẹphe gbalakota lashia alị ozo.
Unwegirima unu unwanyi bẹ o mewaru;
ẹphe buwaru ndu a kpuru lẹ ndzụ
nụ Sihonu, bụ eze ndu Amọru.

³⁰Anyi kwatsuwari pẹ.
Mkpukpu Heshibonu buwaa mkpurupyata je akpaa lẹ mkpukpu Dibonu.
Anyi gwewaru pẹ arakabya jasụ lẹ mkpukpu Nofa;
mbụ je akpaa lẹ mkpukpu Medeba.”

**Ízurelu alwụ-kpe Ogu,
bụ eze Beshanu
(Dit 3:1-11)**

³¹Tọbodu iya bụ; ndu Ízurelu buru l'alì ndu Amọru. ³²Mósisu bya ezia ndu e-je anwụa ngge lẹ mkpụkpu Jiaza; ẹphe jechaephe; ndu Ízurelu je alwụa mkpụkpu, dū iya nū; chikashia ndu Amọru, shi buru l'ẹka ono.

³³Oo ya bụ; ndu Ízurelu ghakọbe shia ụzo ophu shiru jeshia alì Beshanu. Ogu, bụ eze ndu Beshanu chita ndu nkiya g'ẹphe ha jepfushia pẹ ọgu lẹ mkpụkpu Edereyi.

³⁴Chipfu sū Mósisu: “Ta tsukwa iya ebvu; noo kele mu wowaru iya ye ngu l'ẹka; mę ndu nkiya; waa alì iya. Mekwaa ya iphe, i meru Sihonu, bu eze, bu lẹ Heshibonu buru onye-ishi ndu Amọru.” ³⁵No iya; ndu Ízurelu gbua Ogu; gbushia unwegirima iya; mę ndu nkiya g'ẹphe ha; k'ophu bụ l'ọ tọ dudu onye phoduru nū l'ime pẹ. Ndu Ízurelu nata alì iya nworu.

Belaku ezi g'e je ekua Belamu

22 ¹Ndu Ízurelu bya atugbua jerwua phorokoto alì ndu Mówabu; ẹphe kọbe ụlo-ẹkwa pẹ l'aguga ẹnymu Jiọdanu, nọ chebe iphu lẹ mkpụkpu Jieriko.

²Belaku nwa Zipo hụma iphemiphe, ndu Ízurelu meru ndu Amọru. ³Ndzu-agugu rwuta ndu Mówabu kele ndu Ízurelu dū igwerigwe. Ndzu ndu Ízurelu gushiahaa ndu Mówabu ike. ⁴Ndu Mówabu jepfu ndu bụ ọgerenya ndu Midiyanu je asụ pẹ: “Nta bę ikpoto ndu Ízurelu-a a-tuko iphe, bụ ndu gbaru anyi mgburugburu lwukota g'eswi, atukoje ẹswa, nọ l'egu lwukota-a.” Teke ono bę bụ Belaku nwa Zipo bę bụ eze ndu Mówabu. ⁵O bya ezia g'e je ekua Belamu nwa Beyo, bụ onye nọ lẹ mkpụkpu Petọ l'alì Amawu, dū lẹ mgboru ẹnymu Yufurétisu. Iphe, Belaku ziru iya bụ: “O nweru ndu shi l'alì Ijiputu futa; bya atuko mgboko l'ophu dzuru. Nta-a bę ẹphe nọakwa mu lẹ mgboru. ⁶Iphe, mu arwo ngu nta-a bukwa g'i bya atuaru mu ndu ono onu; noo kele ẹphe ka mu okpehu. ?A maru; mu alwụ-kpe pẹ; chia pẹ l'alì-a? Noo kele mu maru l'onye i goru onu-oma nū bę bụwaa onye a goru onu-oma nū; onye i turu onu bụwaru onye a turu onu.”

⁷Oo ya bụ; ndu bụ ọgerenya ndu Mówabu; mę ndu bụ ọgerenya ndu Midiyanu gude ugwo, aapfuję g'a gbaa ẹja tugbua jepfushia Belamu; je ezia ya ozi, Belaku ziru iya ono. ⁸Belamu sū pẹ: “Unu kwaa l'ẹka-a l'enyashia k'ophu mu a-karụ unu iphe, Chipfu e-pfuru yeru mu.” Oo ya bụ; Belamu yele ndu-ishi Mówabu ono tuko nọdu.

⁹Chileke bya abyapfuta Belamu bya ajia ya sū: “?Bụ ndu ole bę gu l'ẹphe nọ ono?”

¹⁰Belamu sū Chileke: “ọ kwa Belaku nwa Zipo, bụ eze ndu Mówabu bę ziru pẹ ozi g'ẹphe bya asụ mu ¹¹l'o nweru ndu shi l'alì Ijiputu futa bya

atúko mgboko l'opflu dzuru. L'oo gę mu bya atúaru iya ndu ono onu; g'a maru ?Ya a-lwụ-kpee pẹ? chishia pẹ l'alị pẹ.”

¹²Chileke sụ Belamu: “Te etsokwa pẹ je; ta tųkwa ndu ono onu; kele epe bukwa ndu a goru onu-oma nu.”

¹³O -rwua l'utsu iya; Belamu futa bya epfuaru ndu-ishi ono, ejeru Belaku ozi; sụ pẹ: “Unu lashia alị unu lẹ Chipfu te ekwedu gę mu tsoru unu je.” ¹⁴Oo ya bụ; ndu-ishi Mówabu ono tųgbua lashia je asụ Belaku lẹ Belamu jikakwaru lẹ ya te etsoduru pẹ.

¹⁵Belaku bya ezikwaa ndu-ishi ozo, kaba igwerigwe; mbụ ndu a ka akwabẹ ùbvù eme lẹ ndu kẹ mbụ pho. ¹⁶Epe byapfuta Belamu bya asụ iya: “Waa iphe, Belaku nwa Zipo pfuru baa: ‘Jiko g'ọ tọ dukwa iphe, ii-kwe g'ọ kposhia ngu abya ibe mu. ¹⁷Noo kele mu a-kwabẹ ngu ùbvù, parụ eka; bya emeeru ngu iphe, i sụru gę mu meeru ngu. Jiko byanụ atúaru mu ndu-a onu.’”

¹⁸Belamu sụ ndu-ozi Belaku ono: “O -betakpo Belaku je a-nụ mu ụlo iya ono, mkpọla-ododo waa mkpọla-ochaa jiru ejiji ono; bẹ mu te emeghatadu iphe, Chipfu, bụ Chileke mu pfuru. Mu te ewofudu iya iphe; ophu mu te eyekwadu iya iphe. ¹⁹Jiko unu kwakwaapho akwakwa l'eka-a l'enyashi-a gę mu maru mę o -nweru iphe, Chipfu e-pfubaa yeru mu.”

²⁰Chileke bya abyapfuta Belamu l'enyashi bya asụ iya: “O -bụru l'oo oku bẹ ndu-a byaru ngu ekuku; gbalihu tsoru pẹ; oke oo iphe, mu sụru g'i mee bẹ ii-me kpoloko.”

Nkapfụ-igara Belamu epfu opfu

²¹Belamu bya agbalihu l'utsu dozia nkapfụ-igara iya tsoru ndu-ishi Mówabu ono; epe tųgbua. ²²Ole ehu ghuru Chileke eghe shii g'ọ tųgburu jeshia ono. Ojosi Chipfu je apfuru kwachia ya ụzo. Teke ono bẹ Belamu nọ l'eli nkapfụ-igara iya agba eje; yele ndu-ozi iya ụmadzu labo swiru. ²³Nkapfụ-igara ono humaepho ojosi Chipfu ono g'ọ pfuru l'uzo; mifuta ogu-echi iya gude l'eka; o haa ụzo swiba l'egbudu. Belamu chiahaa nkapfụ-igara ono iphe g'ọ gọ-zia ya g'ọ laphu azụ l'uzo. ²⁴Ojosi Chipfu ono je apfuru lowere ụzo, nọ lẹ mgbaka opfu-vayinu labo, igbulo nochaa ibekęboebo. ²⁵Tobudu iya bụ; nkapfụ-igara ono humaepho ojosi Chipfu ono; o je akwaa onwiya l'igbulo ono; woru Belamu okpa hua l'igbulo ono. Belamu chikwaa ya iphe ozo. ²⁶Ojosi Chipfu ono bya atųgbukwa je apfuru l'eka dų kparagu. Eka ono te nwedu ụzo, ee-shi swia ekutara; ozoo swia ekicha. ²⁷Nkapfụ-igara ono humaepho ojosi Chipfu ono; o nmakpuru lẹ mkpula Belamu; ehu ghuahaa Belamu eghe; o chiahaa ya mgboro iya. ²⁸Chipfu kúhaa nkapfụ-igara ono onu; o pfuru opfu yeru Belamu sụ: “?Bụ gụnu bẹ mu meru ngu; meru g'ọ gude i nọdu echi mu egube ono? Owaa kweakwa ugbo eto, i chiru mu iphe-a?”

²⁹Belamu sụ nkapfụ-igara ono: “Iphe, mu gude echi ngu egube ono bụ l'iime mu sukusuku. O -bụ lẹ mu gude ogu-echi l'eka bẹ mu eworu ngu gbua nta-a.”

³⁰Nkapfù-ìgara ono sù Belamu: “?Mu ta abùdu nkapfù-ìgara, i nwe enwenwe tọ? I shihawaa gbata mu byasù ntanù-a. ?Mu mejewaru ngu egube-a?”

Belamu sù iya: “Waawaa.”

³¹Noo ya; Chipfu bya emee g'ènya saḥù Belamu; ọ hùma ojozi Chipfu ono g'ọ pfuru l'ùzo; mífuta ogu-echi iya parù l'èka. Belamu phozeta ishi ephozeta; bya adaa kpube iphu l'alì. ³²Ojozi Chipfu ono jia ya sù: “?Bù gùnu meru iphe, i chiru nkapfù-ìgara ngu iphe ugbo ẹto-a? Mu byaru gẹ mu kwachia ngu ọzo; noo kẹle ọzo, i phoberu bẹ dù gbajogbajogbajo l'ènya nkemu. ³³Ugbo ẹto bẹ nkapfù-ìgara-a hùmaru mu; bya agbangochaa mu. Ọ -bù l'ọ tọ gbango mu; mẹ mu asùwaa ngu pyaapyyaa; haa yẹbedua g'ọ nọdu ndzu.”

³⁴Belamu sù ojozi Chipfu ono: “Mu mewaru iphe-ẹji; kẹle mu ta amadù l'i pfuru kwachia mu ọzo. Ọo ya bụ; ọ -bùru l'ọ tọ dudu ngu ree gẹ mu je; mu a-laphu azu.”

³⁵Ojozi Chipfu ono sù Belamu: “Tsururo ndu ono jeshia; ọle ọo g'ọ bükwaru iphe, mu sùru g'i pfua bẹ ii-pfu kpurumu.” Ọo ya bụ; Belamu yẹle ndu-ishi ono, ejeru Belaku ozi ono tųgbua; ọ buri phẹ ejeje.

Belamu nọ l'ibe Belaku

³⁶Belaku nùmaepho lẹ Belamu abyawaa; ọ lufu jeshia ya ndzuta lẹ mkpukpu, nọ l'alì Mówabu l'oke ẹnyimu Anọnu; mbù l'ime ime ẹka oke alì ono beru. ³⁷Belaku sù Belamu: “Mu ziru ozi, dù ọku-ọku g'a bya ekua ngu g'i bya. ?Bùhununu gùnu meru iphe, ì tì byakebeduru? ?Bù lẹ mu ta adudu ike akwabẹ ngu ùbvù tọ?”

³⁸Belamu sù Belaku: “Ọ dù ree; mu byawaru. Ọle ọ bụ; ?ọ dūhunuru iphe, mu adù ike epfu; abuedupho opfu, Chileke yeru mu l'ọnu gẹ mu pfua.” ³⁹Ọo ya bụ; Belamu tsoru Belaku; ephe jeshia Kiriya-tu-Huzotu.

⁴⁰Belaku gbushia eswi mẹ aturu gude gwee ngweja; bya aharu nù Belamu yẹle ndu-ishi ono, yẹe ya tųko swiru ono.

Opfu mbù, Belamu natarù l'èka Chipfu

⁴¹O bẹ l'utsu echele iya; Belaku duta Belamu; ephe tųgbua jeshia Bamotu-Belu; Belamu gbẹ l'èka ono harù hùma ndu Ízurelu.

23 ¹Belamu sù Belaku: “Kpuru mu ọru-ngweja ọzo ẹsaa. Lì kputura mu oke-eswi ẹsaa; waa ebili ẹsaa.”

²Belaku bya emee gẹ Belamu pfuru. Belaku yẹle Belamu gbua oke-eswi; mẹ ebili ono nanù nanù l'ọru-ngweja ono. ³Belamu sù Belaku: “Pfurù lẹ mgboru ngweja-akpo-ọku ono gẹ mu kpìribeeshikwaru. G'a maru; ?Chipfu abyapfuta mu? Iphe, bukpo iphe, o goshiru mu bẹ mu a-koru ngu-a.” Ọ tųgbua jeshia l'eli nwubvu, adudu iphe, dù iya nù. ⁴Chileke byapfuta Belamu. Belamu sù Chileke: “Mu doziwaru ọru-ngweja ọzo ẹsaa; mu gbuwa oke-eswi yẹle ebili nanù nanù l'ọru-ngweja ono ephe n'ẹsaa.”

⁵Tɔ̀budu iya bụ; Chipfu ye Belamu opfu l'onu sụ iya: “Laphu azụ jepfu Belaku je ezia ya ozi-a.” ⁶O jepfushia Belaku; bya ahuma iya g'ọ pfuru lẹ mgboru ngweja-akpo-oku ono; yele ndu-ishi Mówabu g'ephē ha.

⁷Belamu pfuahaa sụ:

“Belaku bẹ byaru eduta mu l'alì Arámu.

Eze ndu Mówabu bya eduta mu l'úbvú úbvú ụzo ẹnyanwu-awawa.

Ọ sụru gẹ mu bya atụaru iya ụnwu Jiékoṗu onu;

gẹ mu bya epfubya ụnwu Ízurelu.

⁸?Dẹnu gẹ mu e-shi bya eworu onu tụa ndu Chileke atụduru onu?

?Dẹnu gẹ mu e-shi pfubya ndu Chipfu te epfubiduru?

⁹Ọo l'eli eze mkpuma bẹ mu anọduje huma phe.

Ọ bụru l'eli úbvú bẹ mu anọduje ele phe ẹnya;

mbụ ndu ono, bu iche ono, adudu ndu ẹphe l'ephē buru ẹghirigha ono.

Ẹphe ta agụjeduru onwophe yeru ọhozo.

¹⁰?Bụ onye bẹ a-dụ ike guta ụnwu Jiékoṗu l'ogu;

mbụ ndu ha g'urwuku, nọ l'alì.

Mbụ-a; ?bụ onye a-dụ ike guta nkeru-eno ụnwu Ízurelu l'ogu?

Gẹ mu nwuhukwa anwuhu onye pfuberekoto!

Gẹ mu lakwaa gẹ ndu pfuberekoto larù!”

¹¹Belaku sụ Belamu: “?Bụ gụnu bẹ i meru mu ẹgube ono? Mu sụru ngu g'ì bya atụa ndu ọhogu mu onu; ọ gbẹ bụru onu-oma bẹ ì ọru nù phe!”

¹²Belamu sụ: “?Bụ gẹ mu te epfushi iphe, Chipfu yeru mu l'onu gẹ mu pfua?”

Opfu k'ẹbo, Belamu nataru l'eka Chipfu

¹³Belaku sụ Belamu: “Tsoru mu g'anyi je l'eka ozo, ịi-nodu huma phe. Ọo aharu bẹ ịi-haru phe huma; ì tịi huma-gbudu phe g'ephē ha. Gbẹ l'eka ono tūaru mu phe onu.” ¹⁴Belaku duta Belamu; ẹphe jeshia l'egu mkpukpu Zofimu, nọ l'eli úbvú Pisiga; ọ kpua ọru-ngweja ụzo ẹsaa. Ẹphe gbushia oke-eswi yele ebili nanu nanu l'oru-ngweja ono.

¹⁵Belamu sụ Belaku: “Pfukwaru lẹ mgboru ngweja-akpo-oku ono gẹ mu jepfu Chipfu l'eka pho.”

¹⁶Chipfu byapfuta Belamu; bya eye iya opfu l'onu sụ iya: “Jepfu Belaku ozo je ezia ya ozi-a.” ¹⁷Belamu bya ejepfu Belaku; huma iya g'ọ pfuru lẹ mgboru ngweja-akpo-oku ono; yele ndu-ishi Mówabu, yee ya tuko nodu. Belaku sụ Belamu: “?Bụ gụnu bẹ Chipfu pfuru?” ¹⁸Belamu pfushiahaa sụ:

“Gube Belaku; gbalihu agbalihu ngabẹ nchì!

Numa iphe, mu epfu; gube nwa Zipo.

¹⁹Chileke ta abukwa nemadzu; k'ophu ọo-bya adzuaaha ụka.

Ọphu ọ bụdu nwa ndiphe; kẹ g'ọ gbanwee uche iya.

?O pfujewaru opfu; ọphu o meduru g'o pfuru?

- ?O kwejeru ukwe-iphe; g'o to medzu ukwe-iphe ọbu?
- 20 Sụ-a; ekemu, mu nataru bukwa ge mu ọoru ndu ono ọnu-oma.
Chileke ọwaru ọnu-oma nu phe.
Ophe mu ta a-dukwa ike agbanwe iya.
- 21 O to dudu ejo-iphe, e levuru l'ehu unwu Jiékoju.
Ophe o dudu iphe, ta adudu ree, o humaru l'ehu unwu Ízurelu.
Chipfu, bu Chileke phe swiru phe okpobe eswiru.
Ephe anọduje atụ ụzu l'ọ bu eze phe.
- 22 Chileke be dufutaru phe l'alị Ijiputu;
bya emee phe; ephe nweru okpehu g'atsụ.
- 23 A ta abyadu egude oswe keta unwu Jiékoju.
Ophe a byadu e-shi l'omamanshi mekata unwu Ízurelu.
Nta-a be ee-pfu opfu ehu unwu Jiékoju;
pfua opfu ehu unwu Ízurelu sụ:
'Lewarọ iphe, Chileke megbaberu!'
- 24 Sụ-a; ndu Ízurelu angu-lihuje ge ne oduma.
Ephe anọduje ebu nggada g'oduma;
mbụ oduma, ta azejedu aze jasu l'ọ labushia anu eriri iya;
mbụ jasu l'ọ ngua mee-iphe, o guderu."
- 25 Oo ya bu; Belaku sụ Belamu: "Ta atukwa phe ọnu ilile; ophe i goe-kwaru phe ọnu-oma ililekpoo!"
- 26 Belamu sụ Belaku: "?Mu te epfuduru ngu l'oo iphe, Chipfu pfuru be mu e-me?"

Opfu k'eto, Belamu nataru l'eka Chipfu

27 Tọbudu iya bu; Belaku sụ Belamu: "Bya ge mu duru ngu je eka ozo. ?G'a maru o-du Chileke ree g'i gbẹ l'eka ono tọaru mu phe ọnu?" 28 Belaku duta Belamu; ephe nyihu ononu ubvú Peyo; mbụ ubvú ono, nọ chebe iphu l'alị, dabyiru mgbegere. 29 Belamu sụ Belaku: "Kpọaru mu ọrun-
ngweja ụzo ẹsaa l'eka-a; l'i kpọtaru mu oke-eswi ẹsaa waa ebili ẹsaa."
30 Belaku mee ya ge Belamu sụru g'o mee ya. Ephe gbua oke-eswi ono ye-
le ebili ono nanu nanu l'oru-ngweja ono.

24 1 Belamu bya ahumaephe l'iphe, du Chipfu ree bu g'a ọru ọnu-
oma nu ndu Ízurelu; ophe o to jeeduru l'aji egube oojejehawa.
Iphe, o meru bu l'o woru iphu ghaa l'uzo echiegu. 2 Belamu bya apalia
enya imeli huma ndu Ízurelu g'ephe kpobegbaaru ọlo-ekwa phe l'ipfu
l'ipfu. Unme Chileke bya iya l'ehu; 3 o pfushiahaa sụ:

"Waa iphe, Belamu nwa Beyo epfu.

O kwa opfu, onye ono, e meru; enya sahu ono epfu.

- 4 Opfu, onye anumaje opfu, shi l'onu Chileke epfu;
mbụ onye ono, ahumaje iphe, Okalibe-kangokotaru-nu egoshi; daa
kpurumu kpupyabe iphu;

onye ono, e meru; ẹnya dụ sarĩmu ono.

5 Egube g'ùlo-ẹkwa ngu amabe mma; gùbe Jíékọpu;
mbù ẹka gùbe Ízurelu bukọ ebubu!

6 Oo gẹ nsuda nsuda aduje-a bú g'ọ sùsaru asusa.

Ọ dụ gẹ mgbabu, a gbaru l'aguga ẹnymu.

Ọ dụ g'oshi alowe, Chipfu yeru l'onwiya;

bya adù g'oshi sida, bvuru l'aguga ẹnymu.

7 Mini e-shije l'ite-mini Ízurelu asoshihu asoshihu.

Oshilọkpa phẹ bẹ e-nweru mini nweru k'etsutsu iya.

Eze phẹ bẹ a-ka eze Agagu shii.

Alì-eze phẹ bẹ aa-pali eli.

8 Chileke dufutaru phẹ l'alì Ijiputu;

bya emee phẹ; ẹphe nweru ọkphehu g'atsù.

Ẹphe a-lwucha ọhamoha, ẹphe dụ ashì;

mbù kùpyashia ọkpu phẹ yọgiri yọgiri.

Ẹphe e-gude arwa phẹ nmafushia phẹ ẹpho.

9 Ízurelu bẹ nmakpuru anmakpuru; bya azẹe l'alì g'oduma.

Ẹphe dụ gẹ ne oduma; ?bù onye a-dù ike kpatsu phẹ?

G'iphe, bú ndu gọru ọnwu Ízurelu ọnu-ọma bukwaru ndu a gọru ọnu-ọma nù.

G'iphe, bú ndu tọru unu ọnu bukwaru ndu a tọru ọnu.”

10 Tọbudu iya bú; Belamu mee; ẹhu ghushiaha Belaku eghe ike. Ọ kua ẹka kpa; bya asù Belamu: “Nta-a bẹ mu kuru ngu g'ì bya atọaru mu ndu ọhogu ọnu; ọ bú-chiaru ọnu-ọma bẹ ì gọcharu nù phẹ ugbo ẹto-a.

11 Ngwa; keta ọso tųgbua lashia ibe ngu ẹgwegwa! Mu shi rja kẹ gẹ mu kwabẹ ngu ùbvù, parù ẹka; obenu lẹ Chipfu bẹ nafuwaru ngu ùbvù ọbu.”

12 Belamu sù Belaku: “?Mu te epfuduru iya ndu i ziru g'ẹphe bya ekua mu sù: 13 ‘Obetakpọo Belaku nù mu ọlo iya ono, mkpọla-ododo mẹ mkpọla-ọchaa jiru pyĩmu ono bẹ mu te emeghatakwa iphe, Chipfu sùru gẹ mu mee; ọphu mu egudekwa uche k'onwomu eme iphe, dụ ree; ọzoo iphe, dụ ẹjì. Ọo ẹpho iphe, Chipfu pfuru bẹ mu e-pfu.’ 14 Nta-a bẹ mu alawa; ala-pfu ndibe mu. Ọle-a; byakwa gẹ mu nmaaru ngu ọkwa; gẹ mu pfuaru ngu iphe, ndu-a e-mechaa mee ndibe unu lẹ teke dụ l'iphu.”

Opfu k'ẹno, Belamu natarù l'ẹka Chipfu

15 Oo ya bú; Belamu pfuahaa sù:

“Waa iphe, Belamu nwa Beyọ epfu.

Ọ kwa opfu, onye ono, e meru; ẹnya sahu ono epfu.

16 Opfu, onye anumaje opfu, shi l'ọnu Chileke epfu;

mbù onye ono, maru iphe, shi Ọkalibe-kakọta-shii l'ẹka;

onye ono, ahumaje iphe, Ọkalibe-kangokotaru-nù egoshi; daa

kpurumu kpupyabẹ iphu;

- onye ono, e meru; ɛnya dũ sarĩmu ono.
- 17 Mu hũmaru onye ono; ɔle ɔ tɔ bũdu nta-a.
 Mu ele onye ɔbu ɛnya; ɔle ɔ tɔ nɔdu ntse.
 Kpokpode bɛ e-shi l'ɔnulo Jiékpɔ futa.
 Mgbɔro-eze bɛ a-futa lɛ Ízurelu.
 Mówabu bɛ ɔ-tũko egedege ɔnu-iphu gwee arakabya.
 L'ɔo-tũko unwu Sheti l'ophu mebyishikɔta.
- 18 Ndu Edomu bɛ aa-lwuta l'ogu.
 Nokwapho g'aa-lwuta ndu Siye, bũ ndu ɔhogu Ízurelu.
 Obenu lɛ ndu Ízurelu bɛ a-nɔdu aka ike eje.
- 19 Onye-ishi bɛ e-shi l'ɔnulo Jiékpɔ futa;
 bya emebyishia ndu ɔphu phɔduru nũ lɛ mkpũkpu ono.”
- 20 Belamu bya elee ndu Amaleku ɛnya bya asu:
 “Ndu Amaleku bɛ bũ ivuzo l'echilabo ɔhamoha;
 obenu l'ɛphe a-bũru mkpurupyata l'ikpazu.”
- 21 ɔ bya elee ndu Kenu ɛnya bya asu:
 “Eka unubɛ ndu Kenu bu ebubu bɛ e meru; o shihu kɛ dũngudungu.
 Nwamkpu, unu tũru bɛ unu tũru l'eli mkpuma.
- 22 ɔle unubɛ ndu Kenu bɛ aa-lwũkwa alwũwu.
 Ndu Asiriya bɛ a-kpũko unu lɛ ndzũ.”
- 23 Tɔbudu iya bũ; o pfua sũ:
 “Oowaa! ?Bũ onye a-nɔdu ndzũ lɛ teke Chileke a-nɔdu eme iphe ono?
- 24 Ugbomini e-shi agũga ɛnyimu l'alĩ Kitimu bya;
 bya emekpa ndu Asiriya yele ndu Eba ɛhu;
 obenu l'ɛphebedua bɛ a-bũkwarupho mkpurupyata.”
- 25 Tɔbudu iya bũ; Belamu pfuchaa nno bya agbalihu; ɔ bũru iya ala ibe
 iya; Belaku tũgbukwapho lashia.

Ndu Mówabu eduswe ndu Ízurelu ɔzo

25 ¹A nɔnyaephe lɛ teke ono, ndu Ízurelu bu lɛ nsũda Shitimu ono; ɛphe l'unwada ndu Mówabu wata apharwũshi onwophe. ²Unwanyi Mówabu ono wata eku ndu Ízurelu ono g'ɛphe tsoru phɛ je agwa agwa phɛ. Ndu Ízurelu nɔdu erije iphe, e shiru l'agwa ono; bya abaarũ agwa ndu Mówabu ono eja. ³No iya; ndu Ízurelu woru onwophe tũgbabe l'agwa Balũ-Peyo. Eshi nno; ndu Ízurelu kpatsu Chipfu ɛhu-eghu. ⁴Chipfu bya asu Mosisu: “Chĩtakota ndu-ishi ndu Ízurelu l'ophu megbushia l'atati-phu mu; gbaa phɛ l'anwũ; k'ophu mu e-wofu ɛhu-eghu mu, ata pfũpfũfu l'ɛhu ndu Ízurelu.” ⁵ɔo ya bũ; Mosisu sũ ndu ɔgbo-ikpe ndu Ízurelu: “G'onyenonu lɛ g'unu ha l'ɛhu l'ɛhu gbushia ndu nkiya, bũ ndu woru onwophe tũgbabe l'agwa Balũ-Peyo.”

⁶Ndu Ízurelu dɔkwaduru-a l'onu ɔlo-ɛkwa-ndzuko aragbaa ɛkwa. A bya ele ɛnya; onye lanũ l'unwu Ízurelu duwaru nwanyĩ Midiyanu bahũ ibe iya

l'èka Mósísu phẹ tukurú ele iya ẹńya; mẹ ndu Ízurélu l'ophu. ⁷Finehasu nwa Eleyaza; mbụ nwanwa Erọnu, bụ onye uke Chileke hụmaepho iphe ono; o kwolihu l'èka ono, igwe-ọ́ha ono kuru ono; je aduchata arwa iya. ⁸O tsopyabẹ nwoke Ízurélu ono bahụ l'ime ụ́lo iya; je eworu arwa ono nmaa ya l'eli nwanýi ono; o shi l'èka a nmarụ iya nwoke foo kẹ nwanýi ono l'ephó; nkepẹ́ bvụ. Ọ́o ya bụ; ejo iphe-ememe ono haa ndu Ízurélu. ⁹Ọ́le ndu ejo iphe-ememe ono gburu egbugbu bẹ́ dụ ụ́kporo ụ́nu nemadzu ugbo ẹ́to.

¹⁰Chipfu sụ Mósísu: ¹¹“Finehasu nwa Eleyaza; mbụ nwanwa Erọnu, bụ onye uke Chileke bẹ́ mewaru ọ́phu ẹ́hu-eghu ndu Ízurélu adueduru mu. Noo kẹ́le o wotaru okophoo, mu gege ekoru ndu Ízurélu kooru phẹ́; shi nno mee ọ́phu mu egudeedu okophoo mu ono mee gẹ́ ndu Ízurélu laa l'iyi. ¹²Ọ́o ya bụ lẹ́-a; sụ iya lẹ́ mu l'iya nọ́waa l'ogbandzu ẹ́hu-guu. ¹³Ogbandzu ono a-buru nkiya waa k'awa iya phẹ́, bụ ndu ọ́phu etso iya etsotso. Ogbandzu ono bẹ́ bụ l'ephẹ́ a-buru uke jaswaruroya; kẹ́le o gude iswi ẹ́hu Chileke iya koo okophoo; mbụ shi nno pfa ụ́gwo iphe-ẹ́ji, ndu Ízurélu meru.”

¹⁴Epha nwoke Ízurélu ono, e gburu yẹ́le nwanýi Midiyanu ono bẹ́ bụ Zimiri nwa Salu. Nna iya, bụ Salu bẹ́ bụ onye-ishi l'ẹńya-unuphu, nọ́ l'ipfu Simiyonu. ¹⁵Epha kẹ́ nwanýi Midiyanu ono, e gbukwarupho ono bụ Kozubi nwada Zuru. Nna iya, bụ Zuru bẹ́ bụ onye-ishi l'ẹńya-unuphu ndu Midiyanu.

¹⁶Chipfu bya asụ́ Mósísu: ¹⁷“Buru ọ́hogu ndu Midiyanu; woru phẹ́ gbushia. ¹⁸Noo kẹ́le ẹ́phe gude ẹ́regede buru ọ́hogu unu; deru unu ye l'agwa agwa Balu-Peyo ono; waa lẹ́ kẹ́ Kozubi, bụ nwada onye-ishi ndu Midiyanu; mbụ nwune ndu Midiyanu kẹ́ nwanýi, bụ onye ono, e gburu teke ono, kẹ́ Peyo meru; ejo iphe-ememe bya ono.”

Agụ ndu Ízurélu ọ́gu k'ugbo labo

26 ¹O be g'ẹ́jo iphe-ememe ono lachaaru; Chipfu bya epfuru Mósísu yẹ́le Eleyaza nwa Erọnu, bụ onye uke Chileke sụ: ²“Unu gụa ndu Ízurélu l'ophu ọ́gu l'ẹńya-unuphu l'ẹńya-unuphu; e -shi lẹ́ ndu nọ́waru ụ́kporo apha kwaseru; mbụ ndu sụwaru eje ọ́gu lẹ́ Ízurélu.” ³O buru lẹ́ baswaa alí Mówabu, nọ́ l'aguga ẹńyimu Jíódanu lẹ́ mgboru mkpukpu Jieriko bẹ́ Mósísu yẹ́le Eleyaza, bụ onye uke Chileke nọ́ pfuaru ndu Ízurélu sụ: ⁴“Unu gụa ndu Ízurélu l'ophu ọ́gu; e -shi lẹ́ ndu nọ́waru ụ́kporo apha kwaseru; mbụ ẹ́gube ono, Chipfu turu iya Mósísu l'ekemu.”

Waa ndu Ízurélu, shi l'alí Ijiputu futa baa:

⁵Ndu bụ oshilokpa Rúbenu, bụ ọ́kpara Ízurélu bụ: Hanoku, onye metaru ipfu Hanoku; mẹ́ Palu, onye metaru ipfu Palu; ⁶mẹ́ Hezuronu, onye metaru ipfu Hezuronu; mẹ́ Kami, onye metaru ipfu Kami. ⁷Ipfu ono g'ẹ́phe ha tukurú buru oshilokpa Rúbenu. Ndu ọ́phu a guru ọ́gu bẹ́ dụ ụ́kporo ụ́nu nemadzu ugbo ise l'ụ́nu tete l'ụ́kporo ụ́madzu ishii l'ụ́madzu

iri. ⁸Nwa Palu kẹ nwoke bụ Eliyabu. ⁹Ụnwu kẹ Eliyabu unwoke bụru: Nemelu; mę Detanu; waa Abiramu. Oo Detanu waa Abiramu-a bę a hotajeru g'ęphe bụru ishi lę Ízurelu; ęphe tsoru ndu kẹ Kora kwefuru Mósísu yele Eronu ike; mbụ teke ono, ęphe kwefujeru Chipfu ike pho. ¹⁰Alị saa onu tuko ęphe lę Kora lwekota; ndu shi etso iya nụ bę nwushihuru nụ; mbụ lę teke ono oku kegbushijeru ukporo umadzu iri l'ębo l'umadzu iri pho. Iphe ono bụru iphe alo ęka lę nchi. ¹¹Ole unwu Kora ta anwushihuduru.

¹²Ndu bụ oshilokpa Simiyonu l'ipfu l'ipfu phezụ: Nemelu, onye metaru ipfu Nemelu; mę Jiaminu, onye metaru ipfu Jiaminu; mę Jiakinu, onye metaru ipfu Jiakinu; ¹³mę Zera, onye metaru ipfu Zera; mę Shawulu, onye metaru ipfu Shawulu. ¹⁴Ipfu ono bę tukoru bụru oshilokpa Simiyonu. Ndu ophu a guru ogu bę du ukporo unu nemadzu ugbo labo l'unu iri l'ise l'ukporo umadzu iri.

¹⁵Ndu ophu bụ oshilokpa Gadu l'ipfu l'ipfu phezụ: Zefonu, onye metaru ipfu Zefonu; mę Hagi, onye metaru ipfu Hagi; mę Shuni, onye metaru ipfu Shuni; ¹⁶mę Ozuni, onye metaru ipfu Ozuni; mę Eri, onye metaru ipfu Eri; ¹⁷mę Arodi, onye metaru ipfu Arodi; waa Areli, onye metaru ipfu Areli. ¹⁸Ipfu ono bę tukoru bụru oshilokpa Gadu. Ndu ophu a guru ogu bę du ukporo unu nemadzu ugbo ise l'unu nemadzu; l'umadzu ukporo ise.

¹⁹Jiuda bę nwutaru unwoke labo, ępha phezụ bụ Eru; waa Onanu. Ole ęphenebo nwushihuru l'alị Kėnanu. ²⁰Ndu bụ oshilokpa Jiuda l'ipfu l'ipfu phezụ: Shela, onye metaru ipfu Shela; mę Pėrezu, onye metaru ipfu Pėrezu; mę Zera, onye metaru ipfu Zera. ²¹Ụnwu kẹ Pėrezu bụ: Hęzuronu, onye metaru ipfu Hęzuronu; waa Hamulu, onye metaru ipfu Hamulu. ²²Ipfu ono bę tukoru bụru oshilokpa Jiuda. Ndu ophu a guru ogu bę du ukporo unu nemadzu ugbo tete l'unu iri lę nanu l'ukporo umadzu ise.

²³Ndu bụ oshilokpa Isaka l'ipfu l'ipfu phezụ: Tola, onye metaru ipfu Tola; mę Puwa, onye metaru ipfu Puwa; ²⁴mę Jiashubu, onye metaru ipfu Jiashubu; waa Shimuronu, onye metaru ipfu Shimuronu. ²⁵Ipfu ono bę tukoru bụru oshilokpa Isaka. Ndu ophu a guru ogu bę du ukporo unu nemadzu ugbo ęsato l'ukporo umadzu iri l'ise.

²⁶Ndu bụ oshilokpa Zebulonu l'ipfu l'ipfu phezụ: Sęredu, onye metaru ipfu Sęredu; mę Eloņu, onye metaru ipfu Eloņu; waa Jiahulelu, onye metaru ipfu Jiahulelu. ²⁷Ipfu ono bę tukoru bụru oshilokpa Zebulonu. Ndu ophu a guru ogu bę du ukporo unu nemadzu ugbo ęsaa l'unu iri lę nanu l'ukporo umadzu ise.

²⁸Ndu bụ oshilokpa Jiósefu l'ipfu l'ipfu phezụ: Manáse; waa Ifuremu.

²⁹Ụnwu kẹ Manáse bụ: Makiya, onye metaru ipfu Makiya. Makiya bụ nna Giladu. Giladu meta ipfu Giladu. ³⁰Ụnwu Giladu bụ: Iyeza, onye metaru ipfu Iyeza; mę Heleku, onye metaru ipfu Heleku; ³¹mę Asurelu, onye metaru ipfu Asurelu; mę Shekemu, onye metaru ipfu Shekemu; ³²mę Shemida, onye metaru ipfu Shemida; waa Hefa, onye metaru ipfu Hefa.

³³Zelofehadu, bú nwa Hefa bẹ ta nwúraduru unwoke. Oo unwanyi bẹ o nwúshiru. Epha unwanyi ono, o nwúshiru ono bú Mahula; mẹ Nuwa; mẹ Hógula; mẹ Milika; waa Tíza. ³⁴Ipfu ono tukuru búru oshilokpa Manáse. Ndu ophu a gúru ogu dú ukporo unu nemadzú ugbo ishii l'unu iri lẹ nanú l'ukporo umadzu iri l'ise.

³⁵Unwu kẹ Ifuremu l'ipfu l'ipfu pẹ bú: Shutela, onye metaru ipfu Shutela; mẹ Beka, onye metaru ipfu Beka; waa Tahanu, onye metaru ipfu Tahanu. ³⁶Unwu Shutela bú Eranu, onye metaru ipfu Eranu. ³⁷Ipfu ono bẹ tukuru búru oshilokpa Ifuremu. Ndu ophu a gúru ogu bẹ dú ukporo unu nemadzú ugbo ẹno l'unu nemadzú l'ukporo umadzu ise.

Ndu ono bẹ tukuru búru oshilokpa Jíósefu l'ipfu l'ipfu pẹ.

³⁸Ndu bú oshilokpa Benjiaminu bú: Bela, onye metaru ipfu Bela; mẹ Ashibelu, onye metaru ipfu Ashibelu; mẹ Ahiramu, onye metaru ipfu Ahiramu; ³⁹mẹ Shefufamu, onye metaru ipfu Shefufamu; waa Hufama, onye metaru ipfu Hufamu. ⁴⁰Unwu Bela bú: Arúdu; mẹ Nemanu. Arúdu, bú iya metaru ipfu Arúdu; Nemanu búru iya metaru ipfu Nemanu. ⁴¹Ndu ono bẹ tukuru búru oshilokpa Benjiaminu l'ipfu l'ipfu pẹ. Ndu ophu a gúru ogu bẹ dú ukporo unu nemadzú ugbo ise l'unu umadzu iri l'ẹno.

⁴²Ndu bú oshilokpa Danu l'ipfu l'ipfu pẹ bú: Shuhamu, onye metaru ipfu Shuhamu. Ndu ono bẹ tukuru búru oshilokpa Danu l'ipfu l'ipfu pẹ. ⁴³Ephe tukuru búru ipfu Shuhamu. Ndu ophu a gúru ogu bẹ dú ukporo unu nemadzú ẹsato l'unu nemadzú lanú.

⁴⁴Ndu bú oshilokpa Asha bú: Imuna, onye metaru ipfu Imuna; mẹ Ishivi, onye metaru ipfu Ishivi; waa Beraya, onye metaru ipfu Beraya. ⁴⁵Unwu Beraya bú: Heba, onye metaru ipfu Heba; waa Malukẹlu, onye metaru ipfu Malukẹlu. ⁴⁶O búru nwa nwanyi lanú bẹ Asha nwútaru; epha iya bú Sera. ⁴⁷Ndu ono bẹ tukuru búru oshilokpa Asha. Ndu ophu a gúru ogu bẹ dú unu ukporo ugbo ishii l'unu iri l'ẹto l'ukporo umadzu iri.

⁴⁸Ndu bú oshilokpa Nafutali l'ipfu l'ipfu pẹ bú: Jiahuzẹlu, onye metaru ipfu Jiahuzẹlu; mẹ Guni, onye metaru ipfu Guni; ⁴⁹mẹ Jieza, onye metaru ipfu Jieza; waa Shilemu, onye metaru ipfu Shilemu. ⁵⁰Ndu ono bẹ tukuru búru oshilokpa Nafutali l'ipfu l'ipfu pẹ. Ndu ophu a gúru ogu bẹ dú ukporo unu nemadzú ugbo ise l'unu iri l'ẹto l'ukporo umadzu iri.

⁵¹Noo ya; iphe, ndu Ízurelu tukuru dú búru ukporo unu nemadzú ugbo ukporo ẹto l'ukporo unu ugbo iri l'ise l'unu nemadzú ẹno l'ukporo umadzu ishii l'umadzu iri.

Ndu Ízurelu awa alí ono, epehe eje eburu ono

⁵²Chipfu sù Mósísu: ⁵³“Oo ndu-a bẹ aa-washíru alí ono g'ọ búru oki-phe, epehe ketarú. Ndu nonu e-keta oke lẹ g'ẹphe ha teke a gúru pẹ ogu. ⁵⁴Ndu ha shii bẹ ii-wẹ alí, ha shii; ndu ophu ha nwanshí; wẹe pẹ alí, ha nwanshii. Ndu ophu nonu e-keta oke lẹ g'ẹphe ha teke a gúru pẹ ogu.

⁵⁵Alì ono bẹ bụ ido bẹ aa-tụ gude washĩa ya. Aa-wa iya l'ipfu l'ipfu; ipfu ñonu l'o keta oke iya nkephẹ. ⁵⁶Ọ bụru ido bẹ aa-tụ gude washĩaru ndu ọphu ha shii; mẹ ndu ọphu ha nwanshii alì ono.”

Agụ eri Lívayi ọgu

⁵⁷Waa oshilọkpa Lívayi baa; waa g'e gude gụa pẹ ọgu l'ipfu l'ipfu: Geshonu, onye metaru ipfu Geshonu; mẹ Kohatu, onye metaru ipfu Kohatu; waa Merari, onye metaru ipfu Merari. ⁵⁸Ipfu-a bẹ bụkwapho oshilọkpa Lívayi: Ipfu Libuni; mẹ ipfu Hẹburonu; mẹ ipfu Mahuli; mẹ ipfu Mushi; mẹ ipfu Kora. Kohatu bụ nna Amuramu. ⁵⁹Epha nyee Amaramu bẹ bụ Jiekobedu, bụ nwada Lívayi. Jiokebedu bụ nwa nwanyi, a nwuru Lívayi l'alì Ijiputu. Ndu ọ nwutaru Amuramu bụ Eronu; waa Mosisu; mẹ Miriyamu. Miriyamu bụru nwune pẹ kẹ nwanyi. ⁶⁰Eronu bụ nna Nadabu; mẹ Abihu; mẹ Eleyaza; waa Itama. ⁶¹Nadabu yẹle Abihu bẹ nwuhuru lẹ teke ephẹ gude ọku, adudu nsọ kpọoru Chipfu ngweja ọku. ⁶²Ndu a guru ọgu l'eri Lívayi; mbụ unwoke pẹ, nọwaru shita l'onwa lanu kwaseru bẹ tukoru du ukporo unu nemadzu ugbo labo; l'unu umadzu iri l'esa; l'ukporo umadzu iri. Ophu a guduru pẹ teke a guru ndu Izurelu ophuna; kele ephẹ te ketaduru oke l'echilabo ndu Izurelu.

⁶³Ndu ono bẹ bụ ndu Mosisu yẹle Eleyaza, bụ onye uke Chileke guru ọgu; mbụ ndu ono, guru ndu Izurelu ọgu lẹ baswaa alì Mówabu l'aguga enyimu Jiordanu lẹ mgboru Jieriko. ⁶⁴Ndu ono ta adudu g'ephe ha, yi lẹ ndu ọphu Mosisu yẹle Eronu, bụ onye uke Chileke gujeru ọgu teke pho, ephẹ guru ndu Izurelu ọgu l'echiegu Sayinayi pho. ⁶⁵Noo kele Chipfu sūru ndu Izurelu ono l'ephe nwuhufutaje l'echiegu ono. Ọ tọ dudu g'ọ ka mma l'ọo onye lanu, aphodu nu l'ime ndu ono; a -gufuepho Kalẹbu nwa Jiefune; yẹle Jioshuwa nwa Nunu.

Oke alì unwada Zelofehadu

(Ógú 36:1-12)

27 ¹Tobudu iya bụ; unwada Zelofehadu bya atuko je apfuru l'onu ulo-ekwa-ndzuko. Zelofehadu l'onwiya bụ nwa Hefa; Hefa bụru nwa kẹ Giladu; Giladu bụru nwa kẹ Makiya; Makiya bụru nwa kẹ Manase. G'ephe ha bukota oshilọkpa Manase. Manase bụru nwa kẹ Jiosefu. Epha unwada Zelofehadu ono bụ: Mahula; mẹ Nuwa; mẹ Hogula; mẹ Milika; waa Tiza. ²Unwada Zelofehadu ono bya apfuru l'ataphu Mosisu; waa l'ataphu Eleyaza, bụ onye uke Chileke; mẹ l'ataphu ndu-ishi; mẹ l'ataphu ndu Izurelu l'ophu l'onu ulo-ekwa-ndzuko pfuaha sū: ³“Nna anyi bẹ nwuhuru l'echiegu. Ọle ọ tọ yikwa lẹ ndu ono, chikoberu onwo-phẹ tsoo Chipfu opfu ono; mbụ ndu ono, tsoru Kora ono. Nna anyi bẹ bukpoephe iphe-eji, o metaru l'onwiya gburu iya; ophu ọ nwutaduru nwa nwoke. ⁴?Ee-gude kele nna anyi ta nwutaduru nwa-nwoke; epha iya echihu l'ipfu iya? G'a hekwa anyi oke l'echilabo ndibe nna anyi.”

⁵Oo ya bụ; Mósísu wota opfu ụnwada Zelofehadu ono papfu Chipfu. ⁶Chipfu sụ Mósísu: ⁷“Ụnwada Zelofehadu pfuru iphe, gbaru nụ. Unu shi l'oke alí ndu nna phẹ wẹe phẹ alí; k'opfu ephe e-keta okiphe nna phẹ. ⁸Pfuaru ndu Ízùrẹlu; sụ phẹ-a: Ọ -bụru lẹ nwoke bẹ nwuhuru nụ; ophu ọ nwutaduru nwa-nwoke; g'e wotajẹ okiphe, rwuberu iya nụ woru nụ nwada iya. ⁹Ọ -bụru l'onye ọbu ta nwutafudaru nwa-nwanyí; g'e wotajẹ okiphe, rwuberu iya nụ ọbu woru nụ unwune iya kẹ nwoke g'ọ bụru iphe phẹ. ¹⁰Teke ọbu l'ọ to nwefuda unwune nwoke; g'e woru okiphe ono, rwuberu iya nụ woru nụ nwune nna iya phẹ kẹ nwoke g'ọ bụru iphe phẹ. ¹¹Ọ -bụru lẹ nna, nwuru onye ọbu te nwedu unwune nwoke; g'e woru okiphe, rwuberu iya nụ ọbu nụ ndu ephe l'iya bụ ọkpobe abubu g'ọ bụru iphe phẹ. Iphe ono bụ omelalí, a tọru ọkpa iya doberu ndu Ízùrẹlu; egube Chipfu tọru iya Mósísu l'ekemu.”

Jioshuwa anọ-chi ẹnya Mósísu
(Dit 31:1-8)

¹²Tọbudu iya bụ; Chipfu sụ Mósísu: “Nyihu eli úbvú Abarimu-a je anọdu hụmakota alí ono, mu nuru ndu Ízùrẹlu ono. ¹³Ị -hụmachae ya phọ bẹ ị-nwuhu lapfushia ndibe unu; egube ono nwune ngu nwoke, bụ Eronu nwuhuru. ¹⁴Iphe, kparu iya nụ bụ l'unu kwefuru ike l'opfu mu lẹ teke ono, ndu Ízùrẹlu gujeru aphụ lẹ mgboru mini ono, dụ l'echiegu Zinu ono. Ophu unu adudu ike dobe mu nso l'iphu phẹ.” (Mini ono bụ mini Meriba, dụ lẹ Kadeshi lẹ mgbegu Zinu.)

¹⁵Mósísu sụ Chipfu: ¹⁶“Gẹ Chipfu; mbụ Chileke ophu gude ndzụ onyemonye họtá nụ onye a-nọdu edu ndu Ízùrẹlu. ¹⁷Onye e-vutajeru phẹ ụzo l'ejeje mẹ l'alwalwa; mbụ onye a-nọdu edu phẹ eje ejeje alwa alwalwa; gẹ ndibe gube Chipfu ta adushi g'aturu, te enwedu onye eche iya nụ.”

¹⁸Oo ya bụ; Chipfu sụ Mósísu: “Duta Jioshuwa nwa Nunu, bụ onye Unme kẹ mube Chipfu bu l'ehu; byabẹ iya ẹka l'ishi. ¹⁹Duru iya g'ọ je apfuru l'ataphu Eleyaza, bụ onye uke Chileke; mẹ l'ataphu ndu Ízùrẹlu l'opfu; g'ị nọdu l'ataphu ndu ono woru ozi ono ye iya l'ẹka. ²⁰Haru ike nkengu ye iya l'ẹka; k'opfu iphe, bụ Ízùrẹlu l'opfu a-nọduje eme iphe, ọ sụru g'ephe mee. ²¹Gẹ Jioshuwa pfuru l'ataphu Eleyaza, bụ onye uke Chileke. Eleyaza egude ido, urimu jee l'iphu Chipfu je ajia Chipfu g'ọ maru g'ọ pfuru opfu ẹhu iya. Ọ bụru iphe, Jioshuwa sụru gẹ ndu Ízùrẹlu mee bẹ ephe a-tukoje mee. Ọ -sụ gẹ ndu Ízùrẹlu tugbua; ephe atugbua; ọ -sụ g'ephe bata; yele ephe a-tuko bata.”

²²Mósísu mee gẹ Chipfu pfuru iya. O duta Jioshuwa pfube l'ataphu Eleyaza, bụ onye uke Chileke; mẹ l'ataphu edzudzu-ọha Ízùrẹlu. ²³Oo ya bụ; o byibe Jioshuwa ẹka l'ishi woru ozi ono ye iya l'ẹka bụ iphe, Chipfu shi l'onu Mósísu pfua.

Ngweja, eegweje mbokumboku
(Awu 29:38-46)

28 ¹Chipfu sụ Mósísu: ²“Turu ekemu nụ ndu Ízùrẹlu; sụ phẹ: Unu leta ẹnya nuje mu ngweja, rwuberu mu nụ; mbụ nri, e gude

egweru mu ngweja; mbụ ngweja ono, a kpọru ọku, mkpọ iya dū mu ree. Unu nūje mu iya lẹ teke bụ orwuberu iya. ³Su phẹ lẹ-a: ‘Waa ngweja, a kpọru ọku, unu e-gweje nū Chipfu baa: unwu ebili labọ, gbachaaru apha; ọphu 'adudu ẹka iphe mebyiru iya. Unu gweje iya mbokumboku; g'ọ bụru ngweja-akpọ-ọku, unu e-gweje tekenteke. ⁴Unu gbuje ebili lanu l'utsu; unu egbua ebili lanu l'uzenyashi. ⁵Unu yeje iya ngweja-nri gwee; mbu uto lanu l'ime nkweka ukpokutu ereshi, e keru uto iri; gwọo lẹ manu, a tsuru l'ikwe; manu e-ji eze ekpemu. ⁶Ọo ya bụ ngweja-akpọ-ọku, eegweje mbokumboku, bụ iya bụ g'e meru iya dobe l'ubvu Sayinayi; mbu ngweja ono, a kpọru ọku, mkpọ iya dū Chipfu ree. ⁷Unu -gbua ebili lanu; unu yekobe iya ngweja-mee gwee; mbu mee, jiru nkeru-eno ọtu-lupfu otumu. Ọ buri l'eka-du-nso be unu a-gbashijeru Chipfu ngweja-mee ono; mbu mee, shihuru ike. ⁸Unu egbufua ebili lanu l'uzenyashi; yekobekwa iya pho ngweja-nri; waa ngweja-mee egube ono, o du lẹ k'utsu pho. Unu gwee ngweja ono; g'ọ buri ngweja, a kpọru ọku, mkpọ iya dū Chipfu ree.’ ”

Ngweja, eegweje l'eswe-atuta-unme

⁹“A -bya l'eswe-atuta-unme; unu gbuje ebili labọ, gbachaaru apha, 'adudu ẹka iphe mebyiru iya; gude gwee ngweja. Unu egude uto labọ l'ime nkweka ukpokutu ereshi, e keru uto iri; gwọo lẹ manu; gude gwee ngweja-nri. Unu yekobe iya ngweja-mee, ayijeru iya nu. ¹⁰Ono buri ngweja-akpọ-ọku, unu e-gweje l'eswe-atuta-unme; yekwaru ngweja-akpọ-ọku, eegweje mbokumboku pho; yele ngweja-mee, ayijeru iya nu.”

Ngweja, eegweje l'onwa ọphuu

¹¹“Mboku mbu, onwa furu gededede be unu e-gwejeru Chipfu ngweja-akpọ-ọku. Unu gudeje unwu oke-eswi labọ; waa ebili lanu; me unwu ebili esaa, gbachaaru apha, adudu ẹka iphe mebyiru iya; gude gwee ngweja ono. ¹²Unu -gbua oke-eswi ono nanu be unu e-yekobeje iya ngweja-nri gwee; mbu uto eto l'ime nkweka ukpokutu ereshi, e keru uto iri; gwọo lẹ manu. Unu -gbua ebili ono; unu yekobe iya ngweja-nri gwee; mbu uto labọ l'ime nkweka ukpokutu ereshi, e keru uto iri; gwọo lẹ manu. ¹³Unu -gbua nwa ebili lanu; unu yekobe iya ngweja-nri gwee; mbu uto lanu l'ime nkweka ukpokutu ereshi, e keru uto iri; gwọo lẹ manu. Ono buri ngweja-akpọ-ọku, mkpọ iya dū Chipfu ree; mbu ngweja, a kpọru ọku gweeru Chipfu. ¹⁴Ngweja-mee, a-yijeru iya nu bu: unu -gbua oke-eswi; unu yekobe iya mee, jiru nkeru-eno ọtu-lupfu otumu. Ọ -buri l'oo ebili; unu yekobe iya mee, jiru nkeru-eno ọtu-lupfu otumu gwee. Unu -gbua nwa ebili; unu yekobe iya mee, jiru nkeru-eno ọtu-lupfu otumu gwee. Noo ke ngweja-akpọ-ọku, unu e-gweje l'onwa l'onwa; mbu l'onwa, dukota l'ime apha. ¹⁵Unu gbuje mkpi lanu gude gwee ngweja-iphe-eji nu Chipfu; a -gufukwa ngweja-akpọ-ọku, eegweje mbokumboku; yele ngweja-mee, ayijeru iya nu.”

Obo Ojeghata

(Uke 23:5-14)

¹⁶Mbọku k'iri l'eno l'onwa mbụ bẹ bụ obo Ojeghata kẹ Chipfu. ¹⁷Mbọku k'iri l'ise l'onwa mbụ ono bẹ bụ obo-iphe. Ujiku ẹsaa l'ophu bẹ unu a-ta-kọtaje buredi, te koduru ekoko. ¹⁸Mbọku mbụ, unu wataru obo-iphe ono bẹ unu a-noje ndzuko, du nsọ. G'ọ tọ dukwa ozi, unu e-jeje mbọku ono l'ophu. ¹⁹Su-a; unu gweje ngweja-akpo-oku nu Chipfu. Unu gbua unwu oke-eswi labo; waa ebili lanu; me unwu ebili ẹsaa, gbachaaru apha, adu-du ẹka iphe mebyiru iya; gude gwee ya. ²⁰Ngweja-nri bẹ unu e-gudeje ukpokutu ereshi, a gworu le manu gwee. Oke-eswi lanu bu nkweka ukpokutu ereshi, e keru uzi iri bẹ unu e-yeje iya uzi lanu gude gwee ya. Teke o bu ebili ono; unu eworu uto labo l'ime nkweka ukpokutu ereshi, e keru uto iri; gwoo le manu. ²¹O buru uto lanu l'ime uto iri bẹ unu e-gweje l'ishi nwa ebili ono nanu nanu ephe n'ẹsaa. ²²Unu e-gbukwapho mkpi lanu gude gwee ngweja-iphe-eji; shi nno pfua ugwo iphe-eji, unu meru.

²³Unu a-tukoje ngweja ono gwekota; yekobe le ngweja-akpo-oku ono, eegweje l'utsu, bu iya bu ngweja ono, eegweje mbokumboku. ²⁴O buru egube ono bẹ unu a-noduje egwe ngweja ono mbokumboku abali ẹsaa ono; g'ọ buru ngweja-nri, a kporu oku; mkpo iya du Chipfu ree. Unu gweje ngweja ono; yekobefua le ngweja-akpo-oku ono, unu egweje mbokumboku; me ngweja-mee, ayijeru iya nu. ²⁵O -rwua mbọku k'ẹsaa; unu anoo ndzuko, du nsọ. G'ọ tọ dukwa ozi, unu e-jeje le mbọku ono l'ophu.

Obo-Idzu

²⁶Ozo bu; o -be mbọku, unu abo obo-iphe k'akporu-iphe-mbu unu; unu nojee ndzuko, du nsọ. G'ọ tọ dukwa ozi, unu e-jeje mbọku ono l'ophu. Mbọku ono bẹ unu a-gbaje l'upfu-oha k'obo Idzu. O buru mbọku ono bẹ unu a-nuje Chipfu akporu-iphe ophuu, unu metaru. ²⁷Unu gwee ngweja-akpo-oku; mbu ngweja, mkpo iya du Chipfu ree. Unu gbuje unwu oke-eswi labo; waa ebili lanu; me unwu-ebili ẹsaa, gbachaaru apha; gude gwee ngweja ono. ²⁸Ngweja-nri, ee-yekobeje l'oke-eswi lanu bẹ bu uto eto l'ime nkweka ukpokutu ereshi, e keru uto iri; gwoo le manu. Teke o bu ebili; unu yekobe iya uto labo l'ime nkweka ukpokutu ereshi, e keru uto iri; gwoo le manu. ²⁹O buru uto lanu l'ime nkweka ukpokutu ereshi, e keru uto iri; gwoo le manu bẹ unu e-yekobeje le nwa ebili nanu nanu gwee ephe n'ẹsaa. ³⁰Unu egbuje mkpi lanu gude pfua ugwo iphe-eji, unu meru. ³¹Unu tukoje ngweja ono g'ọ ha gwekotaje; yekoberu ngweja-akpo-oku, unu egweje; me ngweja-nri, ayijeru iya nu; me ngweja-mee, ayijekwaru iya pho nu. Ole oo g'unu nwube enya g'ọ tọ dukwa anu ono, a-duru ophu nweru ẹka iphe mebyiru iya.

Obo Apha-òphúú
(Uke 23:23-25)

29 ¹“Lẹ mbọku mbụ l'ọnwa ẹsaa bẹ unu a-noje ndzuko, dụ nsọ. G'ọ tọ dukwa ozi, unu e-jeje lẹ mbọku ono. Mbọku ono bụ mbọku, unu e-gbuje opu. ²Unu egwee ngweja-akpo-ọku; mbụ ngweja, mkpo iya dụ Chipfu ree. Unu egbua nwa oke-eswi lanu; waa ebili lanu; me unwu-ebili ẹsaa, gbachaaru apha, adudu ẹka iphe mebyiru iya; gude gwee ngweja ono. ³Ngweja-nri, ayijeru iya nọ bẹ bụ ukpokutu ereshi, a gwọru lẹ manụ. Oke-eswi ono bẹ unu e-yekọbeje ọzo ẹto l'ime nkweka ukpokutu ereshi, e keru ọzo iri gwọo lẹ manụ. Ebili ono bẹ unu e-yekọbeje ọzo labọ l'ime nkweka ukpokutu ereshi, e keru ọzo iri gwọo lẹ manụ. ⁴A -bya l'unwu-ebili ẹsaa phọ; nanu bẹ unu e-yekọbeje uzi lanu l'ime nkweka ukpokutu ereshi, e keru ọzo iri gwọo lẹ manụ. ⁵Unu egbua mkpi lanu gude gwee ngweja-iphe-eji; shi nno pfa ọgwo iphe-eji, unu meshiru. ⁶Unu a-tukoje ngweja ono g'ọ ha gwekota; yekoberu ngweja-akpo-ọku phọ, eegweje l'ọnwa l'ọnwa; me mbokumboku; yele ngweja-nri, ayijeru iya nọ; me ngweja-me, ayijekwaru iya phọ ya; mbụ g'a suru g'e meje iya; mbụ ngweja ono, mkpo iya dụ ree, bụ iya bụ ngweja, a kporu ọku nọ Chipfu.”

Eswe apfu ọgwo iphe-eji
(Uke 16:1-34; 23:26-32)

⁷“Su-a; lẹ mbọku k'iri l'ọnwa ẹsaa ono bẹ unu a-noje ndzuko, dụ nsọ. Mbọku ono bẹ unu a-swi ẹgu; g'ọ tọ dukwa ozi, unu e-je mbọku ono. ⁸Unu egwee ngweja-akpo-ọku nọ Chipfu; mbụ ngweja, mkpo iya dụ ree. Unu gbua nwa oke-eswi lanu; waa ebili lanu; me unwu-ebili ẹsaa, gbachaaru apha, adudu ẹka iphe mebyiru iya; gude gwee ngweja ono. ⁹Ngweja-nri, a-yiru iya nọ bụ ukpokutu ereshi, a gwọru lẹ manụ bẹ unu e-gudeje gwee ya. Oke-eswi ono bẹ unu e-yekọbeje ọzo ẹto l'ime nkweka ukpokutu ereshi, e keru uzi iri. Ebili ono bẹ unu e-yekọbeje ọzo labọ l'ime nkweka utu-ereshi, e keru ọzo iri. ¹⁰A -bya l'unwu-ebili ẹsaa phọ; nanu bẹ unu e-keje nkweka okpokutu ereshi ọzo iri; wota ọzo lanu gude gwee ya. ¹¹Unu egbua mkpi lanu gude gwee ngweja-iphe-eji; a -gufukwa ngweja-iphe-eji, eegweje gude pfa ọgwo iphe-eji; me ngweja-akpo-ọku ono, eegweje mbokumboku ono; yele ngweja-nri, ayijeru iya nọ; me ngweja-me, ayijekwaru iya phọ nọ.”

Obo-Mkpù
(Uke 23:33-43; Dit 16:13-17)

¹²“Lẹ mbọku k'iri l'ise l'ọnwa ẹsaa bẹ unu a-noje ndzuko, dụ nsọ. G'ọ tọ dukwa ozi, unu e-jeje mbọku ono. Unu bọoru Chipfu obo-iphe abali ẹsaa. ¹³Unu e-gwe ngweja-akpo-ọku; mbụ ngweja, a kporu ọku, mkpo iya dụ

Chipfu ree. Unu egbua unwu oke-eswi iri l'eto; me ebili labo; waa unwu ebili iri l'eno, gbachaaru apha, adudu eka iphe mebyiru iya; gude gwee ngweja ono. ¹⁴Ngweja-nri, a-yijeru iya nu bu ukpokutu ereshi, a gworu le manu be unu e-gudeje gwee ya. Unwu oke-eswi ono nanu nanu ephe n'iri l'eto be unu e-yekobeje uzo eto l'ime nkweka ukpokutu ereshi, e keru uzo iri; gwoo le manu. Ebili labo pho; nanu iya be unu e-yekobeje uzo labo l'ime nkweka ukpokutu ereshi, e keru uzo iri; gwoo le manu. ¹⁵Unwu ebili iri l'eno pho; nanu nanu be unu e-yekobeje uzo lanu l'ime nkweka ukpokutu ereshi, e keru uzo iri; gwoo le manu. ¹⁶Unu egbua mkpi lanu gude gwee ngweja-iphe-eji; a -gufukwa ngweja-akpo-oku ono, unu egweje mbokumboku; yele ngweja-nri, ayijeru iya nu; me ngweja-mee, ayijekwaru iya pho nu.

¹⁷“Su-a; le mboku k'ebo be unu e-gbu unwu oke-eswi iri l'ebo; me ebili labo; waa unwu ebili iri l'eno, gbachaaru apha, adudu eka iphe mebyiru iya; gude gwee ngweja ono. ¹⁸A bya l'unwu oke-eswi ono; yele ebili ono; me unwu ebili ono g'o ha; unu yekobeje iya ngweja-nri, ayijeru iya nu; me ngweja-mee, ayijekwaru iya pho nu; bu g'a suru g'e meje iya. ¹⁹Unu egbua mkpi lanu gude gwee ngweja-iphe-eji; a -gufukwa ngweja-akpo-oku ono, unu egweje mbokumboku; yele ngweja-nri, ayijeru iya nu; me ngweja-mee, ayijekwaru iya pho nu.

²⁰“Su-a; le mboku k'eto be unu e-gbu unwu oke-eswi iri le nanu; me ebili labo; me unwu ebili iri l'eno, gbachaaru apha, adudu eka iphe mebyiru iya; gude gwee ngweja ono. ²¹A bya l'unwu oke-eswi ono; yele ebili ono; me unwu ebili ono g'o ha; unu e-yekobeje iya ngweja-nri, ayijegbaaru iya nu; me ngweja-mee, ayijegbakwaaru iya pho nu; bu g'a suru g'e meje iya. ²²Unu egbua mkpi lanu gude gwee ngweja-iphe-eji; a -gufukwa ngweja-akpo-oku ono, unu egweje mbokumboku; yele ngweja-nri, ayijeru iya nu; me ngweja-mee, ayijekwaru iya pho nu.

²³“Su-a; le mboku k'eno be unu e-gbu unwu oke-eswi iri; me ebili labo; me unwu ebili iri l'eno, gbachaaru apha, adudu eka iphe mebyiru iya; gude gwee ngweja ono. ²⁴A bya l'unwu oke-eswi ono; yele ebili ono; me unwu ebili ono g'o ha; unu yekobeje iya ngweja-nri, ayijegbaaru iya nu; me ngweja-mee, ayijegbakwaaru iya pho ya; bu g'a suru g'e meje iya. ²⁵Unu egbua mkpi lanu gude gwee ngweja-iphe-eji; a -gufukwa ngweja-akpo-oku ono, unu egweje mbokumboku; yele ngweja-nri, ayijeru iya nu; me ngweja-mee, ayijekwaru iya pho nu.

²⁶“Su-a; le mboku k'ise be unu e-gbu unwu oke-eswi tete; me ebili labo; me unwu ebili iri l'eno, gbachaaru apha, adudu eka iphe mebyiru iya; gude gwee ngweja ono. ²⁷A bya l'unwu oke-eswi ono; yele ebili ono; me unwu ebili ono g'o ha; unu yekobeje iya ngweja-nri, ayijegbaaru iya nu; me ngweja-mee, ayijegbakwaaru iya pho ya, bu g'a suru g'e meje iya. ²⁸Unu egbua mkpi lanu gude gwee ngweja-iphe-eji; a -gufukwa

ngweja-akpo-oku ono, unu egweje mbokumboku; yele ngweja-nri, ayijeru iya nu; me ngweja-mee, ayijekwaru iya pho ya.

²⁹“Su-a; le mboku k'ishii be unu e-gbu unwu oke-eswi esato; me ebili labo; me unwu ebili iri leno, gbachaaaru apha, adudu eka iphe mebyiru iya; gude gwee ngweja ono. ³⁰A bya l'unwu oke-eswi ono; yele ebili ono; me unwu ebili ono g'o ha; unu yekobeje iya ngweja-nri, ayijegbaaru iya nu; me ngweja-mee, ayijegbakwaaru iya pho ya; bu g'a suru g'e meje iya. ³¹Unu egbua mkpi lanu gude gwee ngweja-iphe-eji; a -gufukwa ngweja-akpo-oku ono, unu egweje mbokumboku; yele ngweja-nri, ayijeru iya nu; me ngweja-mee, ayijekwaru iya pho nu.

³²“Su-a; le mboku k'esaa be unu e-gbu unwu oke-eswi esaa; me ebili labo; me unwu ebili iri leno, gbachaaaru apha, adudu eka iphe mebyiru iya; gude gwee ngweja ono. ³³A bya l'unwu oke-eswi ono; yele ebili ono; me unwu ebili ono g'o ha; unu yekobeje iya ngweja-nri, ayijegbaaru iya nu; me ngweja-mee, ayijegbakwaaru iya pho ya, bu g'a suru g'e meje iya. ³⁴Unu egbua mkpi lanu gude gwee ngweja-iphe-eji; a -gufukwa ngweja-akpo-oku ono, unu egweje mbokumboku; yele ngweja-nri, ayijeru iya nu; me ngweja-mee, ayijekwaru iya pho ya.

³⁵“Le mboku k'esato be unu a-noje ndzuko, du nso. G'o to dukwa ozi, unu e-jeje le mboku ono. ³⁶Unu egwee ngweja-akpo-oku; mbu ngweja, a kpuru oku, mkpo iya du Chipfu ree. Unu egbua oke-eswi lanu; me ebili lanu; me unwu ebili esaa, gbachaaaru apha, adudu eka iphe mebyiru iya; gude gwee ngweja ono. ³⁷A bya l'unwu oke-eswi ono; yele ebili ono; me unwu ebili ono g'o ha; unu eyekobeje iya ngweja-nri, ayijegbaaru iya nu; me ngweja-mee, ayijegbakwaaru iya pho nu; bu g'a suru g'e meje iya. ³⁸Unu egbua mkpi lanu gude gwee ngweja-iphe-eji; a -gufukwa ngweja-akpo-oku ono, unu egweje mbokumboku; yele ngweja-nri, ayijeru iya nu; me ngweja-mee, ayijekwaru iya pho nu.

³⁹“Ngweja ono g'o ha be unu e-gweje nu Chipfu le teke unu abo obo- iphe unu, gechaaru egeru; a -gufukwa iphe, unu kweru Chipfu ukwe iya; me iphe, unu turu obu unu onyo l'unu l'a-nu Chipfu; me ngweja-akpo-oku; me ngweja-nri; me ngweja-mee; mefua ngweja-ehu-guu.” ⁴⁰Mosisu bya atuko ekemu ono, Chipfu tushiru ye iya leka ono pfukotaru ndu Izurelu.

Ekwe Chipfu ukwe-iphe

30 ¹Mosisu bya epfuaru ndu-ishi l'ipfu l'ipfu ndu Izurelu; su phe: “Waa iphe, Chipfu turu l'ekemu baa: ²Nwoke -kweta Chipfu ukwe-iphe; ozoo l'o nweru iphe, o riburu nte iya le ya te emedu; ge nwoke obu te emebyikwa opfu, o pfuru. G'o mekotakwa iphemiphe, shi iya lonu futa.

³“Teke nwamgboko, bukwadu l'ibe nna iya kweru Chipfu ukwe-iphe; ozoo l'o nweru iphe, o riburu nte iya le ya te emedu; ⁴nna iya -numa k'ukwe-iphe

ono, o kweru ono; mę k'iphe ono, o riburu nte iya lę ya te emedu ono; ophu o dudu iphe, nna iya ono pfuru yeru iya; oo ya bu l'ukwe-iphe ono, o kweru ono e-keru; iphe ono, o riburu nte iya lę ya te emedu ono ekekwarupho. ⁵Teke o bu lę nna iya numacharu l'o kweru ukwe-iphe; bya anodu lę mboku ono, o numaru iya ono jika lę ya te ekwetaduru; oo ya bu l'o to dudu ukwe-iphe ono, o kweru ono; mę iphe ono, o riburu nte lę ya te emedu ono, duru ophu e-keru nu. Su-a; Chipfu bę a-guru nwamgboko ono nvu; noo kele oo nna iya bę te kwetaduru g'o mee ya.

⁶“Teke o bu lę nwamgboko ono bę kweadaru ukwe-iphe ono; teme o lua ji; mbu l'o nweru iphe, o gudewaa onu iya ribua nte lę ya te emedu; ⁷ji iya ono -numa iya; ophu o dudu iphe, o pfuru yeru iya lę mboku ono, o numaru iya ono; oo ya bu l'ukwe-iphe ono, o kweru ono e-keru; iphe ono, o riburu nte lę ya te emedu ekekwarupho. ⁸Ole o -buru lę ji iya ono bę numacharu l'o kweru ukwe-iphe; bya anodu lę mboku ono, o numaru iya ono jika lę ya te kwetaduru; oo ya bu l'ukwe-iphe ono, o kweru ono; mę iphe ono, o gudewa onu iya ribua nte lę ya te emedu ono te eveeduru ire; Chipfu aguru nwamgboko ono nvu.

⁹“Nwanyi, ji iya anodedu ndzu; ozoo nwanyi, ji iya chifuru achifu -kwee Chipfu ukwe-iphe; bę o mefutajekwa iphe ono, o kweru ukwe iya ono.

¹⁰“O -buru l'oo nwanyi, no l'ibe ji iya bę kweru Chipfu ukwe-iphe; ozoo l'o nweru iphe, o riburu nte lę ya te emedu; ¹¹ji iya bya anuma iya; ophu o dudu iphe, o pfuru yeru iya; mbu ophu o jikaduru; oo ya bu l'ukwe-iphe ono, nwanyi ono kweru ono e-keru; iphemiphe, o riru nte lę ya te emedu ekekwarupho. ¹²Ole o -bukwanuru lę ji iya ono bę numaru iya nu; bya anodu lę mboku ono, o numaru iya ono jika; su g'o to vushiru ire; bę iphemiphe, shi nwanyi ono l'onu futa l'ukwe-iphe ono, o kweru ono; mekpoo iphe ono, o riru nte lę ya te emedu ono te ekeeduru. Chipfu aguaru nwanyi ono nvu; kele oo ji iya bę suru g'o to vushiru ire. ¹³Iphe, bukpoo ukwe-iphe, nwanyi ono kweru; mę iphemiphe, o riburu nte lę ya te emedu bu ji iya bę o du l'eka. Ji iya -su g'o keru; l'o keru; o -su g'o to vushiru ire; o too vuduru ire. ¹⁴O -buru lę ji iya bę numacharu iya; ophu o dudu iphe, oopfujeru yeru iya mbokumboku; bę ukwe, o kweru g'o ha e-keru; iphemiphe, o riru nte lę ya te emedu e-kekwarupho. Ji nwanyi ono bę suru g'o keru; noo kele o to dudu iphe, o pfuru mboku, o numaru iya. ¹⁵Ole o -numachaa ya; bya emecha mee g'o to vushiru ire; bę oo-vuru ejo-iphe, nwanyi ono gege evuru.”

¹⁶Noo iphe, Chipfu toru Mosisu okpa iya su g'e tsoje g'o duru nwoke yee nyee ya; duru nna yee nwa iya nwanyi; mbu nwamgboko, bukwadu l'ibe nna iya.

Aagwata ndu Midiyanu ugwo iphe, ephe mejeru ndu Izurelu

31 ¹Chipfu bya epfuaru Mosisu su: ²“Gwata ndu Midiyanu ugwo iphe ono, ephe mejeru ndu Izurelu-a. I -gwatachae phe iya pho bę ii-nwuhu lapfu ndibe unu phe.”

³Ọo ya bụ; Mósísu sụ ndu Ízùrèlù: “Unu harụ kwaa onwunu ngwọgu jepfu ndu Midiyanu ọgu je agwataru Chipfu ụgwọ iphe ono, ẹphe mejeru ndu Ízùrèlù ono. ⁴Ipfu, nọnu lẹ Ízùrèlù bẹ unu a-họtà unu ụmadzu labọ l'ụmadzu ụkporo iri g'ẹphe je ọgu ono.”

⁵Noo ya; e shi l'ipfu, nọnu lẹ Ízùrèlù họtachaa unu nemadzu ugbo labọ l'ụmadzu ụkporo iri. Ọ buru ụkporo unu nemadzu l'unu nemadzu iri bẹ bụ ndu a họtakotaru; kwaa pẹ ngwọgu. ⁶Mósísu zia pẹ g'ẹphe jeshia ọgu ono. Ipfu, nọnu bẹ họtaru unu nemadzu ugbo labọ l'ụmadzu ụkporo iri k'ọgu ono. Ẹphe lẹ Finehasu nwa Eleyaza, bụ onye uke Chileke swiru. Finehasu gude ivu, shi l'ulo Chipfu; mẹ opu-ọgu, eegudeje echi mkpu ọgu. ⁷Ẹphe jepfushia ndu Midiyanu ọgu ẹgube Chipfu turu iya Mósísu l'ekemu; tuko iphe, bụ unwoke ndu Midiyanu gbushikọta. ⁸Ẹphe gbu-kwaapho ndu eze ise, bụ ndu-ishi ndu Midiyanu; mbụ Evi; mẹ Rẹkemu; mẹ Zuru; mẹ Huru; mẹ Reba; yekwaru ndu ọzo, e gbukwarupho egbugbu. Ẹphe gudekwapho ọgu-echi gbua Belamu nwa Beyo.

⁹Ndu Ízùrèlù kpukota unwanyi ndu Midiyanu lẹ ndzu; mẹ unwegirima pẹ. Ẹphe rwuta eswi pẹ; mẹ ẹku pẹ; bya atuko iphe, ẹphe nweru enwuru kwaa l'okwata; ¹⁰bya atushia oku lẹ mkpukpu ẹka ndu Midiyanu bukọta; mẹ ẹka ẹphe kpọberu ulo-ekwa pẹ g'ọ ha. ¹¹Ẹphe rwutakọta iphe, ẹphe kwataru l'okwata; mẹ iphe, ẹphe lwutaru l'ogu; mbụ nemadzu; mękpoo iphe-edobe. ¹²Ẹphe chita ndu ono, ẹphe lwutaru l'ogu ono; mẹ ivu ono, ẹphe vutaru; mẹ iphe, ẹphe kwataru l'okwata wolataru Mósísu yele Eleyaza, bụ onye uke Chileke; męwaro ndu Ízùrèlù l'ophu l'ẹka ẹphe kpọberu ulo-ekwa pẹ lẹ baswaa alị Mówabu l'aguga ẹnйimu Jiódanu lẹ mgboru mkpukpu Jieriko.

Ekemu, Mósísu turu teke ndu Ízùrèlù shi ọgu Midiyanu lwa

¹³Tọbudu iya bụ; Mósísu; mẹ Eleyaza, bụ onye uke Chileke; mẹ ndu-ishi ndu Ízùrèlù l'ophu wuru jeshia pẹ ndzuta l'azu ẹka ono, ẹphe kpọberu ulo-ekwa pẹ ono. ¹⁴Ndu-ishi ndu ojogu ono, shi l'ogu lwa ono; mbụ ndu-ishi unu ndu ojogu labọ l'ukporo iri; yee ndu-ishi ndu ojogu ukporo ise ise; mee; ẹhu ghuahaa Mósísu eghu. ¹⁵Mósísu sụ pẹ: “?Ọ kwa l'unu hakotaru unwanyi-a g'ẹphe nọdu ndzu? ¹⁶?Tọbudu unwanyi-a bẹ Belamu ziru; ẹphe mee gẹ ndu Ízùrèlù meswee Chipfu l'opfu ẹhu agwa, dọ lẹ Peyo; eshi nno; ejo iphe-ememe bya adaa l'echilabọ ndu kẹ Chipfu ono. ¹⁷Ngwa; unu tuko unwegirima pẹ unwoke gbushikọta g'ẹphe ha; unu egbushikọta iphe, bụ nwanyi, yele nwoke kwajewaru l'ime pẹ. ¹⁸Ndu ophu unu a-harụ onwunu buepho unwumgboko, ẹphe lẹ nwoke ta akwajeduru. ¹⁹A -bya lẹ g'unu ha buru ndu gburu nemadzu ono; mẹ ndu denyiru onye e gburu egbugbu ẹka; gẹ ndu ono jekwa l'azu ẹka ono, a kpọberu ulo-ekwa je anọ abalị ẹsaa. O -rwuepho lẹ mbọku k'eto iya waa mbọku k'ẹsaa ya; g'ẹphe safu onwophe nturwu; safukwapho ndu ono, unu kpataru lẹ ndzu ono nturwu. ²⁰Unu mechaa uwe unu emecha; unu

emechaa iphe, e meru l'akpo; me iphe, e meru l'èji eghu; me iphe, a pyiru l'oshi."

²¹Eleyaza, bu onye uke Chileke su ndu ojogu ono, jeru ogu ono: "Waa omelali, du lekemu ono, Chipfu turu nu Mosisu baa: ²²Oo mkpola-ododo kpoloko; me mkpola-ochaa; me onyirubvu; me igwe; me gbamugbamu; me ota-njele; ²³mbu l'iphe, oku te ekepyashiduru be unu a-hu l'oku go du ree. Oe e gudefutaje mini ono, eegudeje asafu nturuw mechaa ya emecha. Obenu l'iphe, oku e-ke me a -hua ya l'oku be unu e-ye le mini ono gude mee ya go du ree. ²⁴Le mboku kesaa be unu safutaje uwe unu asasa; unu abya adu ree. Unu -mechaa nno; unu abatawaro l'eka ono, a kpoberu ulo-ekwa ono teke ono."

Eekeshi iphe, a lwutaru l'ogu Midiyanu

²⁵Chipfu su Mosisu: ²⁶"Ge gubedua; me Eleyaza, bu onye uke Chileke; me ndu-ishi le ndu-unuphu ndu-unuphu ndu Izurelu tuko iphemiphe ono, ephe lwutaru l'ogu ono gukota ogu; mbu nemadzū; mekpoo iphe-edobe ono. ²⁷Unu ekekaha iphe ono, a lwutaru l'ogu ono uzi labo. Unu kekaha ru iya ndu ono, jeru ogu ono waa igwe-oha Izurelu. ²⁸Unu shi l'ime ndu k'ono, unu keru nu ndu ono, jeru ogu ono taru Chipfu utu. Onye lanu be unu e-wofuta l'ime unu nemadzū l'ukporo ise; unu ewofuta iphe-edobe lanu l'ime unu iphe-edobe l'ukporo ise; mbu eswi; me nkafu-igara; me aturu; me eghu. ²⁹Unu shi l'oke iya nkephe ono wota iya nu Eleyaza, bu onye uke Chileke go buru iphe, aa-nu Chipfu. ³⁰Unu eshikwapho l'iphe ono, unu keru nu ndu Izurelu wofutachaa nanu nanu l'ime ukporo labo l'iri; mbu le nemadzū; me leswi; me le nkafu-igara; me l'aturu; me l'eghu; me l'anu ozo. Unu eworu iya nu eri Livayi, bu ndu eleta ulo-ekwa Chipfu enya." ³¹Oo ya bu; Mosisu yele Eleyaza, bu onye uke Chileke mee ge Chipfu turu iya Mosisu lekemu.

³²Waa iphe, phoduru nu l'iphe ono, ndu ono, jeru ogu lwutaru l'ogu baa: Aturu, phoduru nu bu ukporo unu aturu ugbo ukporo eno l'ukporo unu eno l'unu esaa l'ukporo iri. ³³Eswi, phoduru nu buru ukporo unu eswi ugbo tete. ³⁴Nkafu-igara, phoduru nu buru ukporo unu nkafu-igara ugbo esaa l'unu iri l'ebho l'ukporo iri. ³⁵A -bya le nemadzū; unwanyi, ephe le nwoke ta akwajeduru be du ukporo unu unwanyi ugbo eno. ³⁶Waa g'iphe, e keru nu ndu ono, jeru ogu ono ha baa: Aturu du ukporo unu aturu ugbo ukporo labo l'ukporo unu ugbo labo l'unu eto l'ukporo iri l'ise. ³⁷Lime aturu ono; ophu bu iya utu, aatu anu Chipfu bu unu aturu l'ukporo iri leto l'aturu iri l'ise. ³⁸Eswi du ukporo unu eswi ugbo eno l'unu iri. Lime eswi ono; ophu bu iya utu, aatu anu Chipfu bu ukporo eswi eto leswi iri l'ebho. ³⁹Nkafu-igara du ukporo unu nkafu-igara ugbo eto l'unu iri l'ishii l'ukporo ise. Lime nkafu-igara ono; ophu bu iya utu, aatu anu Chipfu du ukporo nkafu-igara eto le nkafu-igara lanu. ⁴⁰A

bya lẹ nemadzu; iphe, ephe dū bụ ụkporo ụnu nemadzu ugbo labo. Iphe, bụ ndu e gude atụ utu anụ Chipfu l'ime p̄hẹ bụ ụkporo ụmadzu l'ụmadzu iri l'ẹbo. ⁴¹Tobudu iya bụ; Mósisu bya eworu utu ono, a t̄uru n̄ Chipfu ono n̄ Eleyaza, bụ onye uke Chileke g'ọ b̄uru iphe, aan̄ Chipfu. Ono b̄u-ru ḡe Chipfu t̄uru iya Mósisu l'ekemu.

⁴²Waa g'iphe ono, e keru n̄ ndu Ízurelu ono ha baa; mb̄u iphe ono, Mósisu wofuru l'ophu e keru n̄ ndu ono, jeru ōgu Midiyanu ono. ⁴³Iphe, e keru n̄ igwe-oha Ízurelu ono b̄e at̄uru d̄u ụkporo ụnu at̄uru ụkporo ugbo labo l'ụkporo ụnu ugbo labo l'unu ẹto l'ụkporo iri l'ise. ⁴⁴Eswi d̄u iya ụkporo ụnu eswi ugbo ẹno l'unu iri. ⁴⁵Nkapf̄u-igara d̄u iya ụkporo ụnu nkapf̄u-igara ugbo ẹto l'unu iri l'ishii l'ụkporo ise. ⁴⁶Ndu nemadzu, e ketar̄u n̄ p̄hẹ d̄u ụkporo ụnu nemadzu ugbo labo. ⁴⁷Mósisu bya eshi l'iphe ono, e keru n̄ ndu Ízurelu ono wotachaa iphe nan̄ nan̄ l'ime ụkporo labo l'iri iri; mb̄u lẹ nemadzu; m̄e l'iphe-edobe; o woru iya n̄ eri Lívayi, b̄u ndu eleta ụlo-ẹkwa Chipfu ẹnya; b̄u ḡe Chipfu t̄uru iya Mósisu l'ekemu.

⁴⁸Noo ya; ndu-ishi, ach̄i ndu ojogu ono; mb̄u ndu-ishi, ụnu ndu ojogu ugbo labo l'ụkporo iri; m̄e ndu-ishi ndu ojogu ụkporo ise ise w̄uru bya-pfutash̄ia Mósisu. ⁴⁹Ephe s̄u Mósisu: “Anȳibe ndu-oz̄i ngu b̄e guakwaru ndu ojogu ono, anyi ch̄i jee ōgu ono ōgu; ōphu ō d̄udu m'onye lan̄, aacho ach̄ocho l'ime p̄hẹ. ⁵⁰Owaa b̄u iphe, anyi ewota g'a n̄ Chipfu. Onyen̄onu gude iphe, ō lw̄utaru l'ogu ono; mb̄u iphe, e meru lẹ mkp̄ola-ododo, b̄u iya b̄u iyagba-upfu; m̄e echi mgbal̄eka; m̄e echi mkpushi-eka; m̄e iphe-nch̄i; m̄e iyagba-olu. Anyi wotaru iya g'e gude p̄fua ụgwo iphe-ẹji l'iphu Chipfu.”

⁵¹Mósisu ȳele Eleyaza, b̄u onye uke Chileke nata p̄hẹ iphe ono, e mesh̄iru lẹ mkp̄ola-ododo ono; mb̄u iphemiphe, e mekot̄aru ọna. ⁵²Iphe ono, e meru lẹ mkp̄ola-ododo ono, ndu-ishi ụnu ndu ojogu ugbo labo l'ụkporo iri; m̄e ndu-ishi ndu ojogu ụkporo ise ise n̄uru Chipfu ono b̄e b̄u mkp̄ola-ododo, ẹrwa iya d̄u ụkporo ụnu sh̄ekelu labo l'unu lan̄ l'ụkporo sh̄ekelu iri l'ẹsaa lẹ sh̄ekelu iri. ⁵³Ndu ojogu ono l'ẹhu l'ẹhu gudechaa iphe, ephe kwatar̄u l'okwata lwa. ⁵⁴Mósisu ȳele Eleyaza, b̄u onye uke Chileke nata iphe ono, e meru lẹ mkp̄ola-ododo ono l'eka ndu-ishi ụnu ndu ojogu labo l'ụkporo iri; m̄e l'eka ndu-ishi ndu ojogu ụkporo ise ise. Ephe nata p̄hẹ iya je edobe l'ulo-ẹkwa-ndzuk̄o l'eka ọo-n̄odu l'atatip̄hu Chipfu; ḡe ndu Ízurelu e-gudeje iya nyata ōgu ono.

Al̄i, a n̄uru okpa-ipfu Rúbenu;

waa okpa-ipfu Gadu

(Dit 3:12-22)

32 ¹Unwu Rúbenu waa unwu Gadu b̄e nweru iphe-edobe shingu-shingu. Ephe bya ah̄uma l'al̄i Jiaza; m̄e al̄i Giladu b̄e d̄u ree g'e

dobe iya iphe-edobe. ²Oo ya bú; unwu Gadu; me unwu Rúbenu ono bya ejepfu Mósísu; waa Eleyaza, bú onye uke Chileke; me ndu-ishi ndu Ízurelu je asu: ³“Mkpukpu Atarotu; me mkpukpu Dibonu; me mkpukpu Jiaza; me mkpukpu Nimura; me mkpukpu Heshibonu; me mkpukpu Eleyale; me mkpukpu Sebamu; me mkpukpu Nebo; me mkpukpu Beyonu; ⁴mbu ali ono, Chipfu meru ge ndu Ízurelu lwuta be bukwa ali, du ree k'edobe iphe-edobe; tmanu anyibe ndu-ozí ngu buru ndu nweru iphe-edobe. ⁵Su-a; o -buru l'anyi du ngu l'obu; nunu anyibe ndu-ozí nkengu ali ono g'o buwaruro oke ali nkanyi. Unu te edutashinu anyi dafu azu enyimu Jiódanu azu iya ophuu.”

⁶Mósísu su unwu Gadu; me unwu Rúbenu: “Unwunna unu a-nodu eje ogu; unubedua ano-kirishia l'eka-a to? ⁷?Bu gunu meru iphe, unu eme g'obu te shihushi ndu Ízurelu ike g'ephe la l'ali ono, Chipfu nuru phe ono? ⁸Oo egube ono bu ge nna unu phe meru teke mu ziru phe g'ephe gbé le Kadeshi-Baneya je ahuma ali ono; ⁹kele ephe jerwuru nsuda Eshukolu; je ahumabebe ali ono; bya eteyia ndu Ízurelu obu; mee g'ephe ta abahu l'ali ono, Chipfu nuru phe ono. ¹⁰Ephe shi nno kpatsu Chipfu ehu-eghu le mboku ono. O ribua angu su: ¹¹‘O to dudu onye nwoke Ízurelu, shi le Ijiputu futa; shita l'onye nowaru ukporo apha kwaseru, bya l'e-gude enya iya huma ali ono; mbu ali ono, mu riburu le nte le mu l'a-nu Ébirihamu; me Áyizaku; me Jiékopu; noo kele ephe te egudedu obu phe g'o ha etso mu; ¹²Gbahaepho Kalebu nwa Jiefune k'eri Kenazu; me Jioshuwa nwa Nunu; kele ephe gude obu phe g'o ha tsoru Chipfu.’ ¹³Chipfu swibenuru ndu Ízurelu ehu-eghu iya; o mee phe; ephe tsoru echiegu ghapee ukporo apha labo; jeye teke ogbo ono, meru ejo-iphe l'enya Chipfu ono bukotaru. ¹⁴O rwukwaa nta; unube unwu-a, ndu eme iphe-eji nwushiru-a byakwa apfuru l'ozori nna unu phe; g'unu mee g'ehu-eghu Chipfu kaba atangirihu l'ehu ndu Ízurelu. ¹⁵Kele-a; unu -gbakuta iya azu su l'unu te etsohedu iya nta; be oo-pakwaru phe haa l'echiegu; oo-buru l'oo unu be kpataru ge ndu Ízurelu laa l'iyi.”

¹⁶Tobudu iya bu; unwu Gadu ono; me unwu Rúbenu ono byapfuta Mósísu bya asu iya: “Oo-du anyi ree g'anyi meta eka iphe-edobe anyi a-nodu; me g'anyi kpushia mkpukpu eka unwegirima anyi phe a-nodu. ¹⁷Ole anyi jikobewaru k'achita ngwogu vutaru ndu Ízurelu uzo jeshia; jeye teke anyi e-durwu phe eka ono, ephe e-buru ono. Unwu anyi phe be e-buru le mkpukpu-a, a kpuchaaruu; o shihu ike-a; ge ndu ali-a te sweta iya. ¹⁸Anyi ta abyadu alwa ibe anyi jeye teke ndu Ízurelu e-ketadzuru oke, rwuberu phe nu g'ephe ha. ¹⁹Ole anyibedua te etsoduru phe eketa oke l'azu enyimu Jiódanu azu iya ophuu; iphe, kparu iya nu bu l'oke k'anyi be no l'azu iya owa l'uzo enyanwu-awawa enyimu Jiódanu.”

²⁰Oo ya bu; Mósísu su phe: “O -buru l'unu e-me iya egube ono; o -buru l'unu a-kwa onwunu ngwogu unu l'atatiphu Chipfu vuta uzo k'ogu ono; ²¹o -buru le

g'unu ha be a-chiru ngwoğu unu daa ɛnyimu Jiđdanu l'ataphu Chipfu; lwua oğu ono jasu teke Chipfu chifuru ndu ohogu iya ono l'ataphu iya. ²²A -lwua ali ono lwutaru Chipfu; unu alwatashiwaro teke ono; ikpe ta anmaedu unu l'iphu Chipfu; me l'iphu ndu Izurelu l'ophu. Ali owa abuwaruro k'unu l'ataphu Chipfu. ²³Ole o -buru l'unu te emeduru iphe, unu pfuru; oo ya bu l'unu meru Chipfu iphe-eji; g'o dokwaa unu ɛnya l'iphe-eji, unu meru be unu e-je iphe-ehuka iya. ²⁴Unu kpushia mkpukpu, unwegirima unu phe a-nodu; unu emeta eka iphe-edobe unu a-nodu; unu emeekpoe ya pho g'unu pfuru iya."

²⁵Unwu Gadu ono; me unwu ke Rubenu su Mosisu: "Anyibe ndu-ozu ngu phe l'e-me ge gube nnajuphu pfuru anyi. ²⁶Unwegirima anyi phe; me unyomu anyi phe; me iphe-edobe anyi be a-nodu le mkpukpu le mkpukpu, du l'ali Giladu. ²⁷Ole anyibedua, bu ndu-ozu ngu phe be a-da ɛnyimu; anyi a-chigbaaru ngwoğu l'ehu l'ehu k'ogu ono l'ataphu Chipfu egube ono, gube nnajuphu anyi pfuru anyi."

²⁸Noo ya; Mosisu bya atua ekemu nu Eleyaza, bu onye uke Chileke; me Jioshuwa nwa Nunu; me ndu-ishi, achigba ɛnya-unuphu nonu l'ipfu Izurelu le k'opfu ehunwu Gadu ono; me k'opfu ehunwu Rubenu. ²⁹O su phe: "O -buru l'unwu Gadu; me unwu Rubenu be chitaru ngwoğu phe; tsoru unu daa ɛnyimu Jiđdanu; bya etsoru unu nodu l'iphu Chipfu lwua oğu ono lwuta; unu l'ephe -lwutachaephe ali ono; unu nukwaa phe ali Giladu g'o buru oke ali phe. ³⁰Ole o -buru l'ephe ta achitaduru ngwoğu tsoru unu daa ɛnyimu; ephe etsoru unu keta oke l'ali Kenanu."

³¹Unwu Gadu; me unwu Rubenu ono su: "Oo ge Chipfu pfuru anyibe ndu-ozu ngu phe bu g'anyi e-me iya. ³²Anyi a-chiru ngwoğu daa ɛnyimu Jiđdanu bahu l'ali Kenanu l'ataphu Chipfu; ole oke ali anyi be a-dukota lazụ ɛnyimu Jiđdanu azu iya owa."

³³Toḅudu iya bu; Mosisu bya eworu ali-eze Sihonu, bu eze ndu Amoru; me ali-eze Ogu, bu eze ndu Beshanu woru nu unwu Gadu; me unwu ke Rubenu; me nkeru-ebopfu Manase, bu nwa Jiosesu. O nuru phe ali ono l'ophu; me mkpukpu, dukota iya nu g'o ha; mbukpoo mkpukpu le mkpukpu, no-pheru ali ono mgburugburu. ³⁴Unwu Gadu kpa mkpukpu Dibonu; me Atarotu; me Arowa; ³⁵me Atarotu-Shofanu; me Jiaza; me Jiogbeha; ³⁶me Betu-Nimura; me Betu-Haranu. Ephe kpukotaru mkpukpu ono; o shihuchaa ike; bya emetabaa eka iphe-edobe phe a-noduje. ³⁷Unwu ke Rubenu kpa mkpukpu Heshibonu; me Eleyale; me Kiriyatayimu; ³⁸mekwapho Nebo; me Belu-Meyonu. Ephe kpukwapho mkpukpu Sibuma. Ephe gbanweshikota epha mkpukpu ono g'o ha; bya eworu epha ozo gushia mkpukpu le mkpukpu ono, ephe kpushiru ono.

³⁹Unwu Makiya, bu nwa Manase jee ogu l'ali Giladu; je alwuta iya; chishia ndu Amoru, bu l'eka ono. ⁴⁰Oo ya bu; Mosisu woru ali Giladu nu Makiya, bu nwa Manase; o buru l'eka ono. ⁴¹Jiayi, bukwaphe oshilo-kpa Manase lwuta unwu mkpukpu le mkpukpu, du iya nu; o gua epha

mkpukpu ono Havotu-Jiayi. ⁴²Noba lwuta mkpukpu Kenatu; me nwa mkpukpu, no-pheru iya mgburugburu. O gube mkpukpu ono Noba, bu epha, yebedua aza.

Ije ndu Izurelu e shi le Ijiputu jasu le Mowabu

33 ¹Owaa bu ge ndu Izurelu gude jee ije phe teke epe futaru l'ali Ijiputu. Epe dzeberu le mkpa le mkpa; o buru Mosisu yele Ero-nu be edu phe nu. ²O buru Mosisu be deru g'ephe gude jee ije ono l'ekwo ge Chipfu pfuru iya ya. Waa g'ephe gude jee ije phe ono baa e shi le Ijiputu:

³Ndu Izurelu gbalihuru ije l'onwa mbu; l'abali iri l'ise l'onwa mbu ono. Le mboku, tsotaru mboku obo Ojeghata ke Chipfu be epe wataru ije phe. Epe shi le mkpukpu Ramesesu wuru goronii wufuta k'ehuka tugbua. Ndu Ijiputu doru chikafuchaepho enya ele phe; epe nodu awu atugbu. ⁴Le teke ono be ndu Ijiputu eligbaa odzu ndu bu okpara phe ono, Chipfu chigbushiru l'echilabo phe ono. Chipfu bya ekpekwa pho agwa phe ikpe.

⁵Noo ya; ndu Izurelu shi le Ramesesu wuru tugbua. Epe rwua Sukotu; bya akpobe ulo-ekwa phe. ⁶Epe gbeshi le Sukotu je akpobe ulo-ekwa phe le Etamu, no l'aguga echiegu. ⁷Epe gbeshi le Etamu; bya adakobe laphu azu le Pi-Hahirotu, no l'uzo enyanwu-awawa Belu-Zefonu; epe kpobe ulo-ekwa phe le mgboru Migudolu. ⁸Epe gbeshi le Pi-Hahirotu; bya adaa eze-enyimu bahu l'echiegu. Epe jee ije abali eto le mgbegu Etamu; bya erwua Mara; epe kpobe ulo-ekwa phe. ⁹Epe gbeshi le Mara; bya ejerwua Elimu. Elimu be nweru enya-obvu mini iri l'ebo, no iya nu; mpfu ukporo eto l'iri nodu iya; epe kpobe ulo-ekwa phe l'eka ono.

¹⁰Epe gbeshi le Elimu bya erwua aguga Eze-enyimu Uswe-uswe; epe kpobe ulo-ekwa phe. ¹¹Epe gbeshi le Eze-enyimu Uswe-uswe bya eje akpobe ulo-ekwa phe l'echiegu Sinu. ¹²Epe gbeshi l'echiegu Sinu je akpobe ulo-ekwa phe le Dofuka. ¹³Epe gbeshi le Dofuka je akpobe ulo-ekwa phe le Alushi. ¹⁴Epe gbeshi le Alushi je akpobe ulo-ekwa phe le Refidimu. Eka ono be mini ta adudu ge ndu Izurelu ngua.

¹⁵Epe gbeshi le Refidimu je akpobe ulo-ekwa phe l'echiegu Sayinayi. ¹⁶Epe gbeshi l'echiegu Sayinayi je akpobe ulo-ekwa phe le Kiburotu-Hatava. ¹⁷Epe gbeshi le Kiburotu-Hatava je akpobe ulo-ekwa phe le Hazerotu. ¹⁸Epe gbeshi le Hazerotu je akpobe ulo-ekwa phe le Ritima. ¹⁹Epe gbeshi le Ritima je akpobe ulo-ekwa phe le Rimonu-Perezu. ²⁰Epe gbeshi le Rimonu-Perezu je akpobe ulo-ekwa phe le Libuna. ²¹Epe gbeshi le Libuna je akpobe ulo-ekwa phe le Risa. ²²Epe gbeshi le Risa je akpobe ulo-ekwa phe le Kehelata. ²³Epe gbeshi le Kehelata je akpobe ulo-ekwa phe l'ubvu Shefa. ²⁴Epe gbeshi l'ubvu Shefa je akpobe ulo-ekwa phe le Harada. ²⁵Epe gbeshi le Harada je akpobe ulo-ekwa phe le Makelotu.

26 Èphe gbèshi lẹ̀ Makelotu je akpòbe ọ̀lọ̀-ẹ̀kwa phẹ̀ lẹ̀ Tahatu. 27 Èphe gbèshi lẹ̀ Tahatu je akpòbe ọ̀lọ̀-ẹ̀kwa phẹ̀ lẹ̀ Tera. 28 Èphe gbèshi lẹ̀ Tera je akpòbe ọ̀lọ̀-ẹ̀kwa phẹ̀ lẹ̀ Mitika. 29 Èphe gbèshi lẹ̀ Mitika je akpòbe ọ̀lọ̀-ẹ̀kwa phẹ̀ lẹ̀ Hashimona. 30 Èphe gbèshi lẹ̀ Hashimona je akpòbe ọ̀lọ̀-ẹ̀kwa phẹ̀ lẹ̀ Moserotu. 31 Èphe gbèshi lẹ̀ Moserotu je akpòbe ọ̀lọ̀-ẹ̀kwa phẹ̀ lẹ̀ Bene-Jiakanu. 32 Èphe gbèshi lẹ̀ Bene-Jiakanu je akpòbe ọ̀lọ̀-ẹ̀kwa phẹ̀ lẹ̀ Hòru-Hagidigadu. 33 Èphe gbèshi lẹ̀ Hòru-Hagidigadu je akpòbe ọ̀lọ̀-ẹ̀kwa phẹ̀ lẹ̀ Jìotubata. 34 Èphe gbèshi lẹ̀ Jìotubata je akpòbe ọ̀lọ̀-ẹ̀kwa phẹ̀ lẹ̀ Aburona. 35 Èphe gbèshi lẹ̀ Aburona je akpòbe ọ̀lọ̀-ẹ̀kwa phẹ̀ lẹ̀ Ezìyọ̀nu-Geba. 36 Èphe gbèshi lẹ̀ Ezìyọ̀nu-Geba je akpòbe ọ̀lọ̀-ẹ̀kwa phẹ̀ lẹ̀ Kadèshì, nọ̀ l'echiẹ̀gu Zinu. 37 Èphe gbèshi lẹ̀ Kadèshì je akpòbe ọ̀lọ̀-ẹ̀kwa phẹ̀ l'ú-bvú Hòru, nọ̀ l'oke alì ndu Edọ̀mu.

38 Ọ̀ buru l'ẹ̀ka ono bẹ̀ ẹ̀phe nọ̀; Chipfu sù Erọ̀nu, bụ̀ onye uke Chileke g'o nyihu eli úbvú Hòru ono. Erọ̀nu nyihu úbvú ono nọ̀du iya nwùhu; lẹ̀ mbọ̀ku mbù l'ọ̀nwa ise l'apha, kwe ndu Ízùrẹ̀lu ọ̀kpọ̀ro apha labọ̀, ẹ̀phe shi l'alì Ijiputu lufuta. 39 Erọ̀nu bẹ̀ nọ̀waru ọ̀kpọ̀ro apha ishii l'apha ẹ̀to lẹ̀ teke ọ̀ nwùhuru l'úbvú Hòru.

40 Onye Kénanu, bụ̀ eze ndu Aradu; bu l'echiẹ̀gu ndọ̀hali l'alì Kénanu ono; nùma lẹ̀ ndu Ízùrẹ̀lu l'awù abya.

41 Ndu Ízùrẹ̀lu gbèshi l'úbvú Hòru je akpòbe ọ̀lọ̀-ẹ̀kwa phẹ̀ lẹ̀ Zalumona. 42 Èphe gbèshi lẹ̀ Zalumona je akpòbe ọ̀lọ̀-ẹ̀kwa phẹ̀ lẹ̀ Punọ̀nu. 43 Èphe gbèshi lẹ̀ Punọ̀nu je akpòbe ọ̀lọ̀-ẹ̀kwa phẹ̀ lẹ̀ Obotu. 44 Èphe gbèshi lẹ̀ Obotu je akpòbe ọ̀lọ̀-ẹ̀kwa phẹ̀ lẹ̀ Iye-Abarimu, nọ̀ l'oke alì Mówabu. 45 Èphe gbèshi lẹ̀ Iye-Abarimu je akpòbe ọ̀lọ̀-ẹ̀kwa phẹ̀ lẹ̀ Dibọ̀nu-Gadu. 46 Èphe gbèshi lẹ̀ Dibọ̀nu-Gadu je akpòbe ọ̀lọ̀-ẹ̀kwa phẹ̀ lẹ̀ Alùmonu-Dibulatayimu. 47 Èphe gbèshi lẹ̀ Alùmonu-Dibulatayimu je akpòbe ọ̀lọ̀-ẹ̀kwa phẹ̀ l'úbvú úbvú Abarimu; l'atatiphu úbvú Nebo. 48 Èphe gbèshi l'úbvú úbvú Abarimu je akpòbe ọ̀lọ̀-ẹ̀kwa phẹ̀ lẹ̀ baswaa alì ndu Mówabu; l'agùga ẹ̀nyimu Jìódanu lẹ̀ mgboru mkpùkpu Jieriko. 49 Èphe kpòbe ọ̀lọ̀-ẹ̀kwa phẹ̀ l'agùgu ẹ̀nyimu Jìódanu; e -shi lẹ̀ Bẹ̀tu-Jieshimọ̀tu je akpaa lẹ̀ Abẹ̀lu-Shitimu lẹ̀ baswaa alì ndu Mówabu ono.

50 Ọ̀ buru lẹ̀ baswaa alì ndu Mówabu ono, nọ̀ l'agùga ẹ̀nyimu Jìódanu lẹ̀ mgboru Jieriko ono bẹ̀ Chipfu pfuru yeru Mósìsù sù: 51 “Pfiaru ndu Ízùrẹ̀lu sù phẹ̀-a: Unu -daẹ̀pho ẹ̀nyimu Jìódanu bahù l'alì Kénanu; 52 unu tũko ndu bu l'alì ono g'ẹ̀phe ha chífukota. Unu emebyishikọ̀ta mkpuma, ẹ̀phe pyìru apyìpyi; mebyishia iphe, bụ̀ ntẹ̀kpe, ẹ̀phe kpùshìru doberu onwo-phẹ̀. Unu atũko iphe, bũkpoo ẹ̀ka ẹ̀phe agwajẹ̀ iphe nwukpọ̀shia. 53 Unu anata phẹ̀ alì ono buru; kele mu nùwaru iya unu g'o buru k'unu. 54 Unu a-tù ido washìja alì ono l'ipfu l'ipfu. Ipfu ọ̀phu ha shii; unu awẹ̀ phẹ̀ alì, ha shii; ipfu ọ̀phu ha nwanshìi; unu awẹ̀ phẹ̀ alì, ha nwanshìi. Ẹ̀ka a tũru ido; ọ̀ dabarù ndu ọ̀phu ọ̀ dabarù; ẹ̀phe enworu ẹ̀ka ọ̀bu. Onyenọ̀nu a-wata oke alì nkiya l'ipfu nna iya. 55 Ọ̀le ọ̀ -bùru l'unu ta achífuduru ndu

bu l'alì ono l'atatiṣu unu bẹ ndu ono, unu haru ono e-mechakwaa buru mkpọ kpọahaa unu l'anya; buru obvu dzụahaa unu lẹ mgburẹku. Eṣhe a-nduepho akpa unu ẹhu l'alì ono, unu e-buru ono. ⁵⁶Teke ono; mu emee unu iphe, mu kwakọberu gẹ mu mee phe.”

Oke alì Kénanu

34 ¹Chipfu sù Mósìsù: ²“Pfuaru ndu Ízuruḗlu sù phe-a: Teke unu ba-huru l'alì Kénanu, bu alì ono, unu eje eketa g'ọ buru oke alì unu ono; bu g'oke alì ono a-dù bu ọwana: ³Ụzo ndọhali unu bẹ e-shi l'echięgu Zinu; nọ-tsoru oke ndu Edọmu ogologo. L'uzo ẹnyanwu-awawa bẹ oke alì ụzo ndọhali unu a-wata l'ishi ẹka Eze-ẹnyimu Ụnú jeberu. ⁴Oke alì unu ono e-shi l'uzo ndọhali gojia futa l'elikoro Akurabimu; shi l'ẹka ono jee je afuta lẹ mgbegu Zinu. L'ọ bya ejee nno futa l'uzo ndọhali Kadeshi-Baneya; shikwaphọ nno lufuta lẹ Hazarada; ghabua ẹka ono rwua Azumonu. ⁵Oke alì ụzo ndọhali unu ono e-shi lẹ Azumonu gojia futa lẹ nggele Ijiputu. Ẹka oo-jeberu; mbu oke alì ono bu l'eze-ẹnyimu.

⁶“A bya l'oke alì ụzo ẹnyanwu-arịba; oke iya a-buru l'oke-ẹnyimu. Noo ẹka a-buru oke alì ụzo ẹnyanwu-arịba unu bu ono.

⁷“A bya l'oke alì ụzo isheli unu; unu shi l'oke-ẹnyimu kpaa oke alì ono jeye l'úbvú Họru. ⁸Unu eshi l'úbvú Họru kpaa oke alì ono jeye l'ẹka eeshi-je abahu Hamatu. Ẹka oke alì ono e-beru bu lẹ Zedadu. ⁹L'ọ shi l'ẹka ono nọo jeye lẹ Zifuronu. Ẹka oke alì ụzo isheli unu ono e-beru aburu lẹ Haza-Enanu. Noo ẹka a-buru oke alì ụzo isheli unu bu ono.

¹⁰“A bya l'oke alì ụzo ẹnyanwu-awawa unu; unu shi lẹ Haza-Enanu kpaa oke alì ono jeye lẹ Shefamu. ¹¹Oke alì ono e-shikwaphọ lẹ ndọhali Shefamu lufuta lẹ Ribula; l'uzo ẹnyanwu-awawa Ayinu. O -rwua ẹka ono l'ọ tsoerupho ụzo ndọhali ono futa l'úbvú úbvú, dù l'uzo ẹnyanwu-awawa eze-ẹnyimu Kineretu. ¹²L'ọ kwaseru; mbu oke alì ọbu jasù l'ẹnyimu Jiódanu. Ẹka oo-beru aburu lẹ Eze-ẹnyimu Ụnú.

“Noo ẹka a-buru alì unu bu ono; mẹ oke iya mgburugburu.”

¹³Mósìsù bya epfuaru ndu Ízuruḗlu sù phe: “Noo alì, unu a-tù ido gude washia g'ọ buru oke alì unu ọbu bu ono. Ọo ya bu alì ono, Chipfu sùru g'a nù ipfu tete lẹ nkeru-ẹbo ipfu. ¹⁴Noo kele ipfu unwu Rúbenu; mẹ ipfu k'unwu Gadu bẹ natawaru oke alì nkephe l'anya-unuphu phe l'anya-unuphu phe; wakwaphọ nkeru-ẹbo ipfu Manáse. ¹⁵Ipfu labọ ono; mẹ nkeru-ẹbo ipfu Manáse ono bẹ nataru oke alì nkephe l'uzo ẹnyanwu-awawa l'azụ ẹnyimu Jiódanu azụ iya ọphuu lẹ mgboru mkpukpu Jieriko l'uzo ẹka ẹnyanwu eshije awata.”

Unwoke, a hotaru g'ẹphe washia alì ono

¹⁶Chipfu sù Mósìsù: ¹⁷“Waa ẹpha unwoke, a-washi alì ono nù unu g'ọ buru oke alì unu baa: Eleyaza, bu onye uke Chileke; waa Jioshuwa nwa Nunu.

18 Unu hotachaa onye-ishi lanu l'ipfu l'ipfu g'ephe yeta eka g'a washia ali ono. 19 Epha unwoke ono bu: Kalebu nwa Jiefune, bu onye shi l'ipfu Jiuda; 20 me Samelu nwa Amihudu, bu onye shi l'ipfu Simiyonu; 21 me Elidadu nwa Kisolonu, bu onye shi l'ipfu Benjiaminu; 22 me Buki nwa Jioguli; onye-ishi ndu ipfu Danu; 23 me Hanelu nwa Efordu; onye-ishi l'ipfu Manase, bu nwa Jiosefu; 24 me Kemelu nwa Shifutanu; onye-ishi l'ipfu Ifuremu, bukwapho nwa Jiosefu; 25 me Elizafanu nwa Panaku; onye-ishi l'ipfu Zebulun; 26 me Palutelu nwa Azanu; onye-ishi l'ipfu Isaka; 27 me Ahihudu nwa Shelomi; onye-ishi l'ipfu Asha; 28 me Pedahelu nwa Amihudu; onye-ishi l'ipfu Nafutali."

29 Noo epha unwoke obu Chipfu suru g'ephe washia ali ono go buru oke ali ndu Izurelu l'ali Kénanu.

Mkpukpu, ipfu Lívayi e-buru

35 1 Tòbudu iya bu; Chipfu pfuru yeru Mòsisu le baswaa ali Mówabu laguga Jiòdanu leka ono, no le mgboru Jieriko su iya: 2 "Pfuaru ndu Izurelu g'ephe shi l'oke ali, ephe ketaru nugbaa eri Lívayi mkpukpu le mkpukpu, ephe e-buru. Unu anukwapho ndu Lívayi ono ali eka iphe-edobe phe a-kpaje nri le mgburugburu mkpukpu le mkpukpu ono, aa-nu phe ono. 3 Mkpukpu ono go ha be a-buru eka ipfu Lívayi e-buru eburu; ali ono aburu eka eswi phe; me eku phe; mekpoo iphe-edobe phe l'ophu a-noduje ata nri. 4 Ali eka ono, unu a-nu ipfu Lívayi g'iphe-edobe phe kpaje nri ono be a-du unu ntu-okpa eto le ntu-okpa ukporo iri l'ise. Oo-shi lazú igbuló mkpukpu ono nodu gbaa mgburugburu.

5 "Uzo enyanwu-awawa azu mkpukpu ono be unu a-tuta unu ntu-okpa esaa le ntu-okpa ukporo iri; unu atuta unu ntu-okpa ise l'uzo ndohali azu mkpukpu ono. Unu atuta unu ntu-okpa ise l'uzo enyanwu-ariba azu mkpukpu ono; tuta unu ntu-okpa ise l'uzo isheli mkpukpu ono. Mkpukpu phe ono anodu l'echilabo. Azu mkpukpu ono aburu eka iphe-edobe phe a-taje nri. 6 Mkpukpu ishii l'ime mkpukpu ono, unu a-nu ipfu Lívayi ono be a-buru mkpukpu eka aa-noduje ezeru ndzu. Onye gburu ochi; lo gbaru laa le mkpukpu ono je anodu zeeru ndzu. Unu anufua phe ukporo mkpukpu labo le mkpukpu labo ozo yekoberu phe le mkpukpu ono. 7 Mkpukpu, unu a-nu ipfu Lívayi be a-kpakota du ukporo mkpukpu labo le mkpukpu esato; ye le ali eka iphe-edobe phe a-noduje akpa nri. 8 A bya le mkpukpu, unu e-shi l'ali unu Izurelu nu ipfu Lívayi ono; unu shikwa l'ipfu ophu ali phe ha shii nu phe mkpukpu, du igwerigwe. Unu eshi l'ipfu ophu ali phe pehuru nu-pete phe mkpukpu. Oo epho goke ali ndu nonu habe bu g'aan-beru ipfu Lívayi ono mkpukpu obu."

Mkpukpu, onye gburu nemadzu

a-noduje ezeru ndzu

(Dit 4:41-43; 19:1-13; Jios 20:1-9)

9 Chipfu su Mòsisu: 10 "Pfuaru ndu Izurelu su phe: Unu -daepho enyimu Jiòdanu bahú l'ali Kénanu; 11 unu hota mkpukpu, unu a-noduje ezeru

ndzú; mbú ẹka bú: onye -gbua nemadzú; ẹbe o lekebedúru ẹnya; l'ọ gbaru laa ẹka ono. ¹²Mkpukpu ono a-búru unu ẹka unu a-nọduje zeeru ndzú; gbalaaru onye agwata ụgwọ ọchi; g'onye ono, gburu nemadzú ono ta nwúhu jeye teke ọo-fúta bya apfúru l'iphu edzudzu-ọha g'e kpee ya ikpe. ¹³Ọ búru mkpukpu ishii ono, unu a-nú ipfu Lívayi ono a-búru mkpukpu ezeru ndzú ọbu. ¹⁴Unu a-nú mkpukpu, ee-zejeru ndzú ono ẹto l'azú ẹnyimu Jíọdanu azú iya ọwa-a; unu anú ẹto ọzo l'alí Kénanu. ¹⁵Mkpukpu ishii ono bẹ a-búru mkpukpu ẹka ndu Ízurelu; mẹ ndu abúdu ndu Ízurelu; mẹ ndu lwarú alwalwa, bu l'echilabọ phẹ a-gbabajẹ je anọdu zeeru ndzú. Ọ búru onye gburu nemadzú; ẹbe o lekebedúru ẹnya; bẹ a-gbajẹru laa l'ẹka ono.

¹⁶“Obenu lẹ-a; ọ -búru lẹ nemadzú bú iphe-ígwè bẹ o gude chigbua nemadzú ibiya; bẹ onye ọbu búakwaa onye gburu ọchi. Onye ono, gburu ọchi ono lafútajekwa l'ọchi, o gburu. ¹⁷Ọzoo ọ -búru l'ọ nweru onye tọru nemadzú mkpuma tugbua ya; bẹ onye ọbu búakwaa onye gburu ọchi. Onye ono, gburu ọchi ono lafútajekwa l'ọchi, o gburu. ¹⁸Ọzoo l'ọ nweru onye wotaru oshi chia nemadzú; woru iya chigbua; bẹ onye ọbu búakwaa ọchi bẹ o gburu. Onye ono, gburu ọchi ono lafútajekwa l'ọchi, o gburu. ¹⁹Onye bú iya agwata ụgwọ ọchi ono bẹ ee-gbu onye ono, gburu ọchi ono. Mbú-a; g'onye ono, bú iya agwata ụgwọ ọchi ono gbua ya l'ẹka o jefukpọru iya.

²⁰“Onye gude kẹle nemadzú bẹ dú iya ashí; o nwutsua ya; ọ nwúhu; ọzoo l'ọ kwabẹru ẹnya tọ ya iphe shi nno tugbua ya; ²¹ọzoo gude kẹle yẹle onye ọbu dú l'opfu; o je echia ya ẹka chigbua ya; bẹ onye ono, chigburu nemadzú ono bẹ e gbufutajekwa; noo kẹle o gburu ọchi. Onye agwata ụgwọ ọchi ono e-gbu onye ono, gburu ọchi ono teke o jepfuru iya.

²²“Ọle ọ -búru l'ọ nweru onye nwutsuru nemadzú l'ọtulupfu; ọ nwúhu; ọphu ọ búdu lẹ yẹle onye ọbu dú l'opfu; ọzoo l'ọ to lekebedúru ẹnya tua ya iphe; ²³ọzoo l'ọ mkpuma, a-dú ike tugbua nemadzú bẹ ọ tọ húmaduru onye ono; ọ tọ ya woru onye ono tugbua; bẹ eshi ọphu onye ono, ọ tọ-gburu ono bẹ yẹle iya ta adúdu l'opfu; ọphu ọ gbadúru ẹnya gẹ ya meka ya iphe; ²⁴g'edzudzu-ọha kpeshiaru iya onye ono, gburu nemadzú ono yẹle onye ono, agwata ụgwọ ọchi onye ono, o gburu ono. Waa g'ee-gude doshiaru phẹ iya baa; ²⁵G'edzudzu-ọha nafúta onye ono, gburu nemadzú ono l'ẹka onye ono, bú iya agwata ụgwọ ọchi onye ono, o gburu ono; ẹphe eduru iya je edobephu azú lẹ mkpukpu ono, aa-nọduje ezeru ndzú ono, bú ẹka ọ gbaru laa. Ọ nọdu lẹ mkpukpu, aa-nọduje ezeru ndzú ono jeye teke onye-ishi ndu-uke Chileke, bú onye ono, a wúru manú, dú nsọ l'ishi a-nwúhu. ²⁶Ọle ọ -búru l'onye ono, gburu ọchi ono bẹ nweru teke ọ nonyaru; ọ kpọghata oke mkpukpu, ọ nọ ezeru ndzú ono; mbú mkpukpu ono, ọ gbaru je anọdu ono; ²⁷onye ono, bú iya agwata ụgwọ ọchi ono -húma iya l'oke azú mkpukpu, ọ nọ ezeru ndzú ono; ọ -búru l'onye ono, bú

iya agwata ugwo ochi ono be gburu iya nu; be ikpe ochi ta anmakwaru iya. ²⁸Noo kele onye ono, gburu ochi ono nodufutaje le mkpukpu, o no ezeru ndzu ono jeye teke onye-ishi ndu-uke Chileke a-nwuhu. Oo epho; onye-ishi uke Chileke -nwuhuada teme l'o lawarọ alı iya. ²⁹Iphe ono a-bu-kotaru omelalı, a toru okpa iya, a-duru ogbomogbo l'eka unu bukotakpoo.

³⁰“Oo ya bu l'iphe, bu onye gburu nemadzu; be onye ono gburu nemadzu ono be e gbufutaje egbugbu; m'o -buru l'o duru ndu agba iya ekebe ochi, o gburu. Ole g'o to bukwa ekebe, onye lanu agba be ee-gude gbua nemadzu. ³¹G'o to dukwa iphe, unu a-nataje g'e gude gbata ndzu onye gburu ochi, bu onye o gbaru g'o nwuhu anwuhu. E gbufutaje iya egbugbu. ³²Onye gbaru laa le mkpukpu, ezejeru ndzu; bya eworu iphe nu l'ugwo g'a haa ya g'o laa alı phe teme onye-ishi ndu-uke Chileke anwuhu; unu ta natakwa iya iphe obu. ³³Unu te emerwushikwa alı ono, unu eje eburu ono emerwushi; noo kele mee ochi aturwujekwa alı. O to dudu g'ee-shi pfua ugwo ejo-iphe alı eka e gburu ochi; gbahaepho l'e gburu onye ono gburu ochi ono. ³⁴Unu ta turwukwa alı ono, unu eje eburu ono; noo kele mbedua, bu Chipfu be bu l'echilabo unube ndu Izurelu.”

Òkè alı unwada Zelofehadu

(Dit 27:1-11)

36 ¹Ndu-ishi l'enya-unuphu l'unuphu, nogbaa l'ipfu Giladu bya abya-pfuta Mosisu; me ndu-ishi l'enya-unuphu l'unuphu ndu Izurelu. Giladu bu nwa Makiya; Makiya buru nwa Manase. Manase l'onwiya be shi l'onulo Jiosefu. ²Ephe byapfuta phe bya asu: “Chipfu be suru ge gube nnajiuphu anyi, bu Mosisu tua ido gude washia alı ono keeru ndu Izurelu g'o buru oke alı phe. Chipfu sukwapo ge gube nnajiuphu anyi woru oke alı ophu rwuberu Zelofehadu, bu nwune anyi woru nu unwada iya. ³Ole-a; o -buru l'o nweru onye shi l'ipfu ozo, no le Izurelu; bya aluta phe; oniya bu l'aa-gufu okiphe phe l'ime okiphe, shi le ndiche anyi phe; je eworu yekobe le k'ipfu ono, epe laru ji ono. Oo ya bu; eeshi nno wofu iphe l'okiphe, anyi ketaru. ⁴O -rwuepho l'apha-ehu-utso ke ndu Izurelu; ee-wota okiphe phe yekoberu ipfu ono, epe laru ji ono. Okiphe phe be aa-gufu l'okiphe ipfu nna anyi phe.”

⁵Tobudu iya bu; Mosisu bya epfuaru ndu Izurelu iphe, Chipfu pfuru iya su: “Iphe, ipfu unwu Jiosefu epfu be pfukwaru nhamunha. ⁶Wakwa iphe, Chipfu pfuru l'opfu ehunwada Zelofehadu ba. O suru: G'ephe luru onye dukpoo phe ree. Ole eka epe a-lu ji bu l'enya-unuphu ipfu nna phe. ⁷G'okiphe ndu Izurelu te shikwa l'ipfu dasweru ipfu. Iphe, bu ndu Izurelu be e-gudeshichaa okiphe, epe ketaru l'ipfu nna phe. ⁸Iphe, bu nwa nwanyi, ketaru oke l'ipfu Izurelu be lufutaje ji l'ipfu nna iya; k'opfu ee-shi nno g'iphe, bu ndu Izurelu nwekotaru okiphe nna phe. ⁹Oo ya bu l'okè-iphe te eshidu l'ipfu adasweru ipfu ozo; noo kele ipfu nonu le Izurelu be e-gudeshi okè-iphe nkephe.”

¹⁰Ọ bụru iphe ono, Chipfu pfuru Mósísu ono bẹ ụnwada Zelofehadu meru. ¹¹Noo kele ụnwada Zelofehadu ono, ẹpha phẹ bụ Mahula; mẹ Tịza; mẹ Hògula; mẹ Milika; waa Nuwa bẹ bụ ụnwu nwune nna phẹ luru phẹ. ¹²A luru phẹ lụbata l'ipfu ụnwu Manáse, bụ nwa Jíósefu; okiphe phẹ nọdu g'ọ nọ l'ipfu nna phẹ.

¹³Noo ekemu, Chipfu turu; mẹ omelali, ọ gbẹ Mósísu l'ẹka nụ ụnwu Ízurelu lẹ baswaa alí Mówabu; l'agụga ẹnyimu Jíódanu lẹ mgboru Jieriko bụ ono.